

國學基
本叢書
明
詞
綜





書叢本基學國

綜 詞 明

纂 昶 王

行發館書印務商

中華民國二十七年七月初版

86023.11

國學基
本叢書
明詞綜一冊

每冊實價國幣伍角

外埠酌加運費匯費

纂輯者 王昶

發行人 王雲五
長沙南正路

印刷所 商務印書館

發行所 商務印書館
各埠

(本書校對者盧金聲)

G五三六上

序

國初朱竹垞太史集三唐五代宋金元之詞。汰其蕪雜。簡其精粹。成詞綜三十卷。汪氏晉賢刻之。爲後世言詞者之準則。予尙以其不及明詞爲憾。蓋明初詞人。猶沿虞伯生、張仲舉之舊。不乖於風雅。及永樂以後。南宋諸名家詞。皆不顯於世。惟花間、草堂諸集盛行。至楊用修、王元美諸公。小令、中調。頗有可取。而長調則均雜於俚俗矣。然一代之詞。亦有不可盡廢者。故御選歷代詩餘。擷取者一百六十餘家。予友桐鄉汪康古。又謂竹垞太史於明詞。曾選有數卷。未及刊行。今其本尙存。汪氏頻訪之而不得。嘉慶庚申。遇汪小海於武林。則太史未刻之本在焉。於是卽其所有。合以生平所搜輯。得三百八十家。共成十二卷。彙而鐫之。以附詞綜之後。選擇大旨。亦悉以南宋名家爲宗。庶成太史之志云爾。

明詞綜序

嘉慶七年八月青浦王昶撰。

明詞綜目錄

卷一

仁宗皇帝

宣宗皇帝

周憲王

劉基

張以寧

韓守益

貝瓊

梁寅

高啓

楊基

高明

劉昺

黃澄

程本立

姚廣孝

解縉

王洪

胡儼

瞿祐

謝應芳

張冃

卷二

鐵鉉

莫璠

李禎

王直

明詞綜

目錄

一

徐有貞 趙迪 戴璉 商輅

聶大年 王越 張寧 湯允勤

李東陽 姚綬 沈周 桑悅

吳寬 王鏊 吳洪 趙寬

楊循吉 費宏 蔣冕 王鴻儒

夏鍬 史鑑 張旭 祝允明

李夢陽 顧潛 朱諫 王九思

邊貢 顧璘 唐寅 周用

陳霆 王廷相

卷三

陸深 王韋 韓邦奇 丁奉

卷四

吳山

楊慎

齊之鸞

盧雍

張縝

桂華

李濂

崔桐

趙金

夏言

文徵明

陳鐸

謝承舉

陸楫

徐階

盧襄

陸瑯

楊儀

呂希周

王慎中

吳子孝

陳如綸

薛廷寵

閔如霖

駱文盛

許穀

蔡宗堯

陳鏐

萬士和

李攀龍

周思兼

文彭

王世貞

孫樓

王好問

趙大佑

邵圭潔

鄔仁卿

吳邦楨

于木

王世懋

王錫爵

張鳳翼

高濂

徐渭

陳淳

彭年

林章

夏樹芳

支大綸

趙南星

屠隆

馮琦

湯顯祖

袁黃

焦竑

陳繼儒

王冝堂

儲昌祚

卓發之

賀彥發

楊繼禮

卷五

李日華

查應光

范鳳翼

支如玉

吳克

費元祿

俞彥

王衡

吳宗達

雷迅

魏大中

陳翼飛

吳宗儒

焦源溥

方于魯

錢士升

卷六

錢繼登

劉榮嗣

魏浣初

阮大鍼

王坊

鄭士奇

張名由

黃承聖

莫是龍

徐爌

張瑋

彭紹賢

吳鼎芳

馬洪

施紹莘

董斯張

顧同應

馮盛世

范文光

孫茂芝

徐石麒

王屋

葉紹袁

陸錫明

汪膺

范汭

汪廷訥

馮鼎位

葛一龍

茅維

卓人月

湯傳楹

楊士聰

萬壽祺

支如增

劉侗

路邁

吳本泰

錢繼章

歐陽鉉

陳子龍

方大猷

錢棟

夏允彝

來集之

單恂

黃周星

周世臣

王彥泓

金俊明

錢應金

方以智

萬日吉

呂福生

沈宗

宋存標

卷七

朱一是

錢棻

關鍵

魏學濂

吳易

王泰際

宮偉鏐

沈龍

徐遠

吳聞禮

夏完淳

沈泓

吳熙

沈燾

沈自炳

韓曾駒

歸莊

張綱孫

周永年

許友

卷八

韓洽

蔣平階

于儒穎

周積賢

吳騏

計南陽

張天湜

金是瀛

沈謙

李標

魏允栢

張逸

李元組

李明嶽

胡偕行

程爵

張大烈

程可中

秦瀚先

錢繼振

張杞

于玉班

沈懋德

查維宏

胡介

顧德基

俞汝言

戈止

孟稱舜

王化龍

蔣爾璵

周斑

邵梅芳

邵麟

徐士俊

爰丹生

卷九

錢澄之

錢光繡

季孟蓮

賀裳

李燁

王翊

沈日徵

沈際飛

姜實節

錢士賁

杜濬

紀映鍾

陸嘉淑

韓純玉

周箕

朱茂暉

孫紹祖

顧朝楨

顧志

裘昌今

張草

卷十

張文秀

陸亮輔

裘律

唐世瀚

李伊玉

胡文煥

江廣

顧衆

喻綜

張仲立

倪撫

徐爾鉉

卷十一

霍達

吳楨

郭輔畿

沈士鏞

沈鍾鶴

陸釋麟

梁木公

秦公庸

梁希聲

吳莫勝

陳琴溪

張卿玉

天隨子

杜陵生

無名氏

釋涵初

道源

今釋

一靈

張無爲

黃氏

劉碧

端淑卿

顧文婉

袁彤芳

王鳳嫻

陸卿子

龍輔

徐媛

張鴻迷

瞿寄安

朱盛藻

沈宜修

張倩倩

葉小紈

沈憲英

項蘭貞

商景蘭

李玉照

葉紈紈

葉小鸞

沈靜專

儲氏

申蕙

張嫺倩

歸淑芬

吳綰

顧道善

謝季蘭

陳氏

張引元

王朗

吳山

龐蕙纒

沈素嘉

徐元端

周蘭秀

武氏

翁孺安

李端卿

卷十二

韓知珮

吳朏

顧若璞

錢氏

郭璠

紀映淮

黃鴻

張紅橋

范妹

錢涓

馬守貞

劉勝

楊炎

薛素素

朱無瑕

王毓貞

白旃香

趙燕

馬如玉

楊宛

王微

鄭妥

陳冉

花夢月

景翩翩

張婉

朔朝霞

王月

寇體如

崔嫣然

頓文

王賽玉

尹春

呼舉

沙宛在

京師妓

蘇世讓

鎖懋堅

王氏

沈靜筠

元妙洞天少女

鄭婉娥

翠微

王秋英

明詞綜卷一

青浦王昶纂

仁宗皇帝一首

宣宗皇帝一首

周憲王一首

劉基九首

張以寧一首

韓守益一首

貝瓊一首

梁寅二首

高啓四首

楊基七首

高明一首

劉曷四首

黃澄一首

程本立一首

姚廣孝一首

解縉一首

王 洪一首

胡 儼一首

瞿 祐一首

謝應芳三首

張 昇六首

仁宗皇帝

蝶戀花

九月海棠

煙抹霜林秋欲褪。吹破胭脂，猶覺西風嫩。一作潤翠袖怯寒愁一寸。誰傳庭院黃昏信。明月羞一作修容生遠恨。旋摘餘嬌，簪滿宮人鬢。醉倚小闌花影近。一作暈

不應先有春風分。

宣宗皇帝

醉太平

賜學士沈度

濃雲散雨收。花苑內鳴鳩。曉來喜見日光浮。暖融融永晝。麥苗潤澤懷清秀。

榴花濕映紅光溜。田家歌舞盡歌謳。是處慶豐年醉酒。

周憲王

名有嫩。定王長子。

蘭皋集。周憲王遭世隆平。奉藩多暇。留心翰墨。製誠齋樂府傳奇若干種。流傳內府。至今中原絃索多用之。李夢陽汁中元宵絕句云。中山孺子倚新妝。趙女燕姬總擅場。齊唱憲王新樂府。金梁橋外月如霜。

鷓鴣天

賦繡鞋

花簇香鈎淺浣塵。輕風微露石榴裙。金蓮自是慳三寸。難載盈盈一段春。僂已去。事猶存。陽臺何處更爲雲。相思攜手遊春日。尙帶年時草露痕。

劉基

字伯溫。青田人。元進士。入明。以佐命功臣至御史中丞。封誠意伯。正德中。追諡文成。有誠意劉文成公集二十卷。詞附。

古今詞話。青田謁金門云。風嫋嫋。吹綠一庭春草。轉應曲云。秋雨秋雨。窗外白楊自語。青門引云。相憐自有明月。照人肺腑。清如水。漁家傲云。亂鴉啼破樓頭鼓。花犯云。餘香怨繡被。踏莎行云。愁如溪水暫時平。雨聲一夜依然滿。渡江雲云。定巢新燕子。睡起雕梁。對立整烏衣。山鬼謠云。離魂常在郊樹。月深星暗蒼梧遠。化作杜鵑歸去。皆妙麗入神句。王元美云。伯溫穠纖有致。去宋尙隔一塵。

如夢令

一抹斜陽沙觜。幾點閒鷗草際。烏榜小漁舟。搖過半江秋水。風起。風起。權入白蘋花裏。

浣溪沙

細草垂楊村巷幽。白沙素石引溪流。青苔磯上有扁舟。門外好山開罨畫。屋頭新月學簾鉤。窗風一榻似新秋。

眼兒媚

煙草萋萋小樓西。雲壓鴈聲低。兩行疎柳，一絲殘照，數點鴉棲。春山碧樹秋重綠。人在武陵溪。無情明月，有情歸夢，同到幽閨。

少年游

清風收雨。輕雲漏月。涼氣入幽窗。亂葉吟朝。饑蟲啼夜。各自奏新腔。孤鴻又

向天邊落。歸夢阻蒼江。百結愁腸。兩行衰鬢。寂寞對清缸。

小重山

月滿江城秋夜長。西風吹不斷。桂花香。碧天如水露華涼。人難見。有淚在羅裳。
何許鴈南翔。堪憐一片影。落瀟湘。百年身世費思量。空回首。故國渺蒼茫。

臨江仙

街鼓無聲春漏咽。不知殘夜如何。玉繩歷落耿銀河。鵲驚穿暗樹。露墜滴寒莎。
夢裏相逢還共說。五湖煙水漁蓑。鏡中綠髮漸無多。淚如霜後葉。撼撼下庭柯。

千秋歲

淡烟平楚。又送王孫去。花有淚。鶯無語。芭蕉心一寸。楊柳絲千縷。今夜雨。定應
化作相思樹。憶昔歡游處。觸目成前古。良會知何許。百盃桑落酒。三疊陽關

句情未了。月明潮上迷津渚。

瑞龍吟

秋光好。無柰錦帳香消。繡幃寒早。鈎簾人立西風。送書過鴈。依然又到。故鄉
杳空把淚隨江水。夢縈江草。何時賦得歸來。倚松對柳。開尊醉倒。衰鬢不堪
臨鏡。鏡中愁見。蓬飛絲繞。門外遠山。青青長帶斜照。石泉澗月。辜負夜猿嘯。傷
心處。風凋露渚。荷枯烟沼。燕去元蟬老。滿天細雨。鳴羈鳥。花蔓當簷裊。庭院靜。
遙聞清砧聲擣。擁衾背壁。一燈紅小。

張以甯

字志道。古田人。元末官翰林學士承旨。明初。例徙南京。召爲侍讀學士。有翠屏集四卷。

明月生南浦

廣州南漢王劉鋹故宮。鐵鑄四柱猶存。周覽嘆息之餘。夜泊三江口。夢中作一詞。覺而忘之。但記二句云。千古興亡多少恨。總付潮回

去。因隱括爲此詞。

海角亭前秋草路。榕葉風清。吹散蠻烟霧。一笑英雄曾割據。癡兒卻被潘郎誤。

寶氣銷沉無覓處。薜暈猶殘。鐵鑄遺宮柱。千古興亡知幾度。海門依舊潮來去。

韓守益

字仲修。石首人。明初。以儒士攝教宜都。擢春坊中允。有樗壽藁。

蘇武慢

江亭
遠眺

地湧岷峨。天開巫峽。江勢西來百折。擊楫中流。投鞭思濟。多少昔時豪傑。鶴渚沙明。鷗灘雪淨。小艇鳴榔初歇。喜憑闌。握手危亭。偏稱詩心澄澈。還記取。王粲樓前。呂岳磯外。別樣水光山色。烟霞僊館。金碧浮圖。盡屬楚南奇絕。紫雲簫待。綠醕杯停。咫尺良宵明月。擗高歌。一曲清詞。徧徹馮夷宮闕。

貝

瓊

字廷臣。一字廷琚。崇德人。洪武初。徵修元史。除國子助教。有清江集三十卷。

水龍吟

春思

楚天歸鴈千行。一書不寄相思苦。忽忽過了。踏青時節。更愁風雨。燕子黃昏。海

棠春曉。幾番淒楚。問誰能爲寫。重重別恨。算除有江淹賦。尙記銀屏翠箔。抱琵琶、夜調新譜。芳年易度。沈腰寬盡。白頭如許。弱水三千。武陵一曲。重尋何處。柰無情杜宇。年年此日到淮南路。

梁

寅

字孟敬。新喻人。洪武初。徵修禮書。書成以疾辭歸。結屋石門山。有石門集二卷。

浣溪沙

錦樹分明上苑花。晴光宜日又宜霞。碧烟橫處有人家。綠似鴨頭松下水。白于魚腹柳邊沙。一溪雲影鴈飛斜。

高

啓

字季迪。長洲人。隱吳淞江之青邱。自號青邱子。洪武初。召入纂修元史。授編修。擢戶部侍郎。有扣舷詞一卷。

古今詞話。青邱樂府大致以疎曠見長。而石州慢又極纏綿之致。

行香子

芙蓉

如此紅妝。不見春光。向菊前、蓮後纔芳。鴈來時節。寒浥羅裳。正一番風。一番雨。

一番霜。蘭舟不採。寂寞橫塘。強相依。暮柳成行。湘江路遠。吳苑池荒。恨月濛濛。人杳杳。水茫茫。

沁園春 鴈

木落時來。花發時歸。年又一年。記南樓望信。夕陽簾外。西窗驚夢。夜雨燈前。寫月書斜。戰霜陣整。橫破瀟湘萬里天。風吹斷。見兩三低去。似落箏絃。相呼共宿寒烟。想只在。蘆花淺水邊。恨鳴鳴戍角。忽催飛起。悠悠漁火。長照愁眠。隴塞間關。江湖冷落。莫戀遺糧猶在田。須高舉。教弋人空慕。雲海茫然。

楊基

字孟載。嘉州人。大父仕江左。遂家吳中。洪武初。知榮陽縣。歷山西按察副使。有眉菴詞。樂府紀聞。楊孟載少時見楊廉夫。命賦鐵笛詩成。廉夫喜曰。吾意詩境荒矣。今當讓子一頭地。當時有老楊小楊之目。眉菴詞饒有新致。靜志居詩話。孟載詩芳草漸于歌館密。落花偏向舞筵多。細柳已黃千萬縷。小桃初白兩三花。布穀雨晴宜種藥。葡萄水暖欲生芹。兩韻風韻枝外。螻柳遮花映樹頭。鶯燕子綠燕三月雨。杏花春水一羣鵝。江浦荷花雙鷺雨。驛亭楊柳一蟬風。一路詩從愁裏得。二分春向客中過。立近晚風迷蛺蝶。坐臨秋水映芙蓉。羅幕有香鶯夢暖。綺窗無月鴈聲寒。眉暈淺顰橫曉綠。臉

消殘纈膩春紅·小雨送花青見萼·輕雷催箒碧抽尖·蠶屋柘煙
朝焙繭·鶻爐沉火書熏茶·試填入浣溪沙·皆絕妙好辭也·

清平樂

欺烟困雨。拂拂愁千縷。曾把腰肢羞舞女。贏得輕盈如許。猶寒未暖時光。將昏漸曉池塘。記取春來楊柳。風流全在輕黃。

浣溪沙

朝花

鸞股先尋鬪草釵。鳳頭先繡踏青鞵。衣裳宮樣不須裁。軟玉鏤成鸚鵡架。泥金鐫就牡丹牌。明朝相約看花來。

夏初臨

瘦綠添肥。病紅催老。園林昨夜春歸。深院東風。輕羅試著單衣。雨餘門掩斜暉。看梅梁乳燕初飛。荷錢猶小。芭蕉漸長。新竹成圍。何郎粉淡。荀令香銷。紫鸞夢遠。青鳥書稀。新愁舊恨。在他紅藥欄西。記得當時。水晶簾。一架薔薇。有誰知。

千山杜鵑。無數鶯啼。

多麗

問鶯花。晚來何事蕭索。是東風、釀成新雨。參差吹滿樓閣。辟寒金、再簪寶髻。靈犀鎮、重護香幄。杏惜生紅。桃緘淺碧。向人憔悴未舒萼。念惟有、淡黃楊柳。搖曳映珠箔。凭闌久。春鴻去盡。錦字誰託。柰夢裏、清歌妙舞。覺來偏更情惡。聽高樓、數聲羌笛。管多少、梅花驚落。鴛帶慵寬。鳳鞋懶繡。新晴誰與共行樂。料在楚雲。湘水深處望黃鶴。天涯路。計程難定。長恁飄泊。

燭影搖紅

簾

花影重重。亂紋匝地無人卷。有誰惆悵立黃昏。疎映宮妝淺。只有楊花得見。解匆匆、尋芳覓便。多情長在。暮雨迴廊。夜香庭院。曾記揚州。紅樓十里東風軟。腰肢半露玉娉婷。猶恨蓬山遠。閑悶如今怎遣。看草色、青青似翦。且教高揭。放

數點春。一雙新燕。

高

明 字則誠。瑞安人。元至正間。官處州錄事。洪武初。召修元史。以老病辭歸。

鷓鴣天

題顧氏景筠堂

綠玉參差傍短楹。高堂清夢已冥冥。滿枝只帶湘靈點。一曲空聽秦鳳鳴。天
莫問。物多情。此君瀟灑若平生。風聲月色來亭榭。老淚年來濕幾更。

劉

昺 字彥章。鄱陽人。安慶左丞余闕。待以國士。後歸明太祖。授中書博士。應詔議典籤。有春雨軒詞一卷。

浪淘沙

寒食

石逕土牆斜。桃李桑麻。紙錢飛處亂啼鴉。閒趁斜陽攜榼去。寒食人家。苑樹
憶天涯。遺恨琵琶。銅駝衰草臥龍沙。漢寢唐陵無麥飯。暮雨梨花。

滿江紅

寄水北山人徐宗周

水北幽居抱柴門。一溪寒玉。山萬疊。青林當戶。白雲連谷。乳燕落紅春又晚。柴

桑三徑多松菊。喜新晴、布穀又催耕。秧分綠。牀頭酒、何時熟。謀諸婦、明朝澆。
謾黃雞炊黍，共邀鄰曲。舊夢風雲銷俠氣。繁華看破，知榮辱。繫扁舟、罷釣晚歸
來。書還讀。

木蘭花慢

辛酉
九日

寫長空一鴈。又景物、是重陽。甚雨暗東籬。數枝青蕊，未放秋香。揜筇倦登高處。
掩柴門、衰柳映橫塘。日暮江聲袞袞，西風鬢影蒼蒼。當年歌舞翠紅鄉。一曲
杜韋娘。曾擊碎珊瑚。玉人扶醉，銀燭成行。回頭已成陳迹。早歸來、茅屋石田荒。
謾把清樽遣興，都非少日疎狂。

憶秦娥

溪頭柳。青青折贈行人手。行人手。最傷心處，西風重九。陽關一曲長亭酒。停
鞭欲去仍回首。仍回首。少年離別，老來依舊。

黃

澄洪武初人。

賣花聲

人過天街曉色擔頭紅紫滿筠筐。浮花浪蕊畫簾睡醒。正眼橫秋水聽新腔。一回催起。吟紅叫白報得蜂兒知未隔東西。餘音軟美迎門爭買。早斜簷雲髻助春嬌粉香簾底。

程本立

字原道。桐鄉人。洪武九年。以明經薦爲周秦二府引禮。官至僉都御史。有巽隱齋集。

清平樂

山翁歸去記得來時路。雨漲溪泉人不渡。花外鳥啼何處。人間不是山中高。懷都付絲桐。一曲瑤池宴罷。春風吹盡殘紅。

姚廣孝

字斯道。長洲人。幼名天禧。後爲僧。名道衍。以靖難功爲僧錄左善世。加太子少師。復姓。賜今名。有逃虛集。

轉應曲

斜日斜日門外馬蹄聲疾。林棲鳥盡飛還。霞彩紅銜遠山。山遠山遠。山遠莫怪行人歸晚。

解

縉

字大紳。吉水人。洪武二十一年進士。官翰林學士。出爲廣西參議。有春雨齋集十卷。

古今詞話。成祖於中秋夜開宴賞月。月爲雲掩。命解縉賦之。縉遂口占落梅風一調云。嫦娥面。今夜圓。下雲簾。不著羣仙見。拚今宵。倚闌不去眠。看誰過。廣寒宮殿。成祖覽之。歡甚。又賦長歌。成祖益喜。同縉飲至夜半。月復明朗。浮雲盡散。成祖笑曰。卿真奪天手段也。

長相思

寄友

吳山深。越山深。空谷佳人金玉音。有誰知此心。夜沈沈。漏沈沈。閒卻梅花一

曲琴。高松對竹林。

王

洪

字希範。仁和人。洪武三十年進士。永樂初。授吏科給事中。入翰林爲檢討。與修大典。歷修撰侍講。

卜算子

半道春紅

宿雨漲春流。曉日紅千樹。幾度尋芳載酒來。自與春風遇。弱水與桃源。有路

從教去。不見西湖柳萬絲。滿地飛殘絮。

胡

儼字若思。南昌人。洪武三十年會試乙科。官華亭縣教諭。累遷國子監祭酒。有頤菴集。

三臺令

樓上角聲嗚咽。天邊斗柄橫斜。酒醒風驚簾幙。漏殘月在梅花。

瞿

祐字宗吉。錢唐人。洪武中。以薦歷宜陽訓導。陞周府長史。永樂間。謫保安。洪熙元年放還。有樂府遺音五卷。餘清詞一卷。

西湖志餘。瞿宗吉風情麗逸。著翦燈新話及樂府歌詞。多假紅倚翠之語。爲時傳誦。及謫戍保安。當興安失守。邊境蕭條。永樂己亥。降佛曲于塞外。選子弟唱之。時值元宵。作望江南五首。詞旨淒絕。聞者皆爲泣下。凌彥紳于宗吉爲大父行。彥紳作梅詞霜天曉角。柳詞柳梢青各一百首。號梅柳爭春。宗吉一日盡和之。彥紳大驚嘆。呼爲小友。宗吉以此知名。後彥紳自南荒歸葬西湖。宗吉作詩送之云。一去西川隔夜臺。忽看白壁瘦蒼苔。酒朋詩友凋零盡。只有存齋冒雨來。存齋。宗吉自號也。

摸魚子

蘇堤春曉

望西湖。柳煙花霧。樓台非遠非近。蘇堤十里籠春曉。山色空濛難認。風漸順。忽

聽得鳴榔驚起沙鷗陣。瑤階露潤。把繡幕微寒。紗窗半啓。未審甚時分。凭闌處。水影初浮日暈。遊船未許開盡。賣花聲裏香塵起。羅帳玉人猶困。君莫問。君不見。繁華易覺光陰迅。先尋芳信。怕綠葉成陰。紅英結子。留作異時恨。

謝應芳

字子蘭。武進人。寓居青浦。有龜巢集二十卷。詞附。

點絳脣

老眼猶明。著書未了餘生債。客來休怪。淡飯黃齏菜。踏雪觀梅。清興依然在。南門外。夜來尋戴。扶醉馱驢背。

滿江紅

舊約尋梅。蹉跎過、小春時節。忽隴頭、人至。一枝先折。喜見春風顏色好。縞衣不受緇塵涅。把十年、湖海舊相知。從頭說。三江上、滄洲雪。千墩下、珠林月。似許詢支遁。總皆清絕。重看青山攜素手。此情方解相思結。待滿湖、水泮柳風清。孤

舟發。

張

肯字繼孟·浚儀人·
有夢菴詞一卷·

買陂塘

賦東郭
草堂

愛草堂帶村連郭。門前碧水千頃。秋波冷浸遙山晚。青鏡淨涵省影。沙浦迥。怪隔水漁歌鷗夢都驚醒。時乘小艇。向柳外花邊。載詩載酒。獨盡漫游興。謾重省。且得身閑心靜。樂事自甘瓢飲。好懷誰道中年減。佳趣更多吟咏。□轉徑。門正對朝陽。不怕梅花冷。流連暮景。冱容我爲鄰。相依卜築。共爾兩家隱。

浪淘沙

咏沙灘

雨過碧雲秋。占斷灘頭。滄浪翻處濕纖柔。誰展翠茵平似翦。宿鷺眠鷗。沙尾遠凝眸。雨慘烟愁。萋萋不共水東流。幾度漁人來傍宿。綠映孤舟。

醉落魄

咏苦
徑

翠鈿狼藉。綠圓點點濃如積。芳痕漲雨凝寒碧。一片濃陰。休掃坐來石。徑深不教殘陽入。茸茸不似春紅色。芳塵淨洗無纖迹。吟客來時。只恐印行屐。

如夢令

詠石徑

庭掩塵蹤靜。悄雨長苔痕繚繞。行處不妨花。容我醉眠偏好。休掃休掃。待積落紅多少。

聲聲慢

雪晴山隴。月冷江皋。歲寒解后相逢。攜手歸來。輕盈一樣春容。行行間鳴環珮。暗香霏、縹緲東風。弄花手。與安排金屋。共貯芳穠。鴉淡暗通心素。笑桃根桃葉。冶豔妖紅。試問韶華。樽前若箇青農。思是喬家姊妹。可人處。清致皆同。春正好。淡眉山。愁減幾重。

原书空白页

明詞綜卷二

青浦 王昶 纂

鐵 鉉一首

莫 璠二首

李 禎一首

王 直一首

徐有貞一首

趙 迪一首

戴 璉一首

商 輅一首

聶大年三首

王 越一首

張 寧一首

湯允勤一首

李東陽一首

姚 綬一首

沈 周一首

桑 悅一首

章懋一首

王鏊一首

趙寬一首

費宏一首

王鴻儒二首

史鑑一首

祝允明一首

顧潛四首

王九思一首

顧璘二首

周用二首

吳寬一首

吳洪一首

楊循吉一首

蔣冕一首

夏鍬二首

張旭一首

李夢陽一首

朱諫一首

邊貢二首

唐寅一首

陳霆二首

王廷相 一首

鐵

鉉 字鼎石·鄧縣人·洪武中·由國子生授禮科給事中·歷官兵部尙書·死靖難之變·

浣溪沙

晚出閒庭看海棠風流學得內家妝。小釵橫戴一枝芳。削玉梳斜雲鬢膩，鏤金衣透雪肌香。暗思何事立斜陽。

莫

璠 字仲璵·錢塘人·

蝶戀花

蘇堤春曉

十里樓台花霧繞。宜雨宜晴。山色籠春曉。楊柳梢頭殘月小。海棠枝上猶啼鳥。蘭帳玉人初睡覺。試問樓前。畫舫開多少。報道尋芳人起早。紫騮嘶過香塵道。

又

麴院荷風

五月涼風來。麴院綠水芙渠。紅白都開徧。風遞荷香情不斷。採蓮舟過歌聲緩。醉折碧筒供笑玩。翠蓋紅綃。高下翻零亂。向晚新涼生酒面。六銖衣薄停紈扇。

李

禎字昌祺。廬陵人。永樂二年進士。官河南左布政。有倚菴詩餘二卷。

柳梢青

題秋塘圖

落盡芙蓉。收殘菱芡。晚色淒迷。斷荇隨流。枯荷折柄。秋滿蘇堤。沙禽自在幽棲。極浦外。天連水低。粉墜蓮房。波漂菰米。烟暝湖西。

王

直字行儉。秦和人。永樂二年進士。歷官吏部尚書。卒贈太保。諡文端。有抑菴集。

浪淘沙

風暖翠烟飄。殘雪都消。游絲百尺墮晴霄。可惜春光容易過。又近花朝。驅馬第三橋。芳意蕭條。竹林渾未放天桃。瘦盡城南千樹柳。不似宮腰。

徐有貞 初名瑤·字元玉·吳縣人·宣德八年進士·歷官華蓋殿大學士·封武功伯·謫戍雲南·有武功徐先生集·

千秋歲引

風攪柳絲。雨揉花纈。蚤過了清明時節。新來燕子語何多。老去鶯花飛未歇。秋
千院。蹴踘場人蹤絕。踏青拾翠都休說。是誰馬走章臺雪。是誰簫弄秦樓月。
從前已是無情緒。可奈而今更離別。一回頭。人千里。腸百結。

趙迪

字景哲·懷安人·宣德十年舉人·官南海縣知縣·有鳴秋集·

踏莎行

送友人
還山中

逕轉清溪。花飛紅雨。武陵風景知何處。當年厭聽水聲寒。豈知忘却來時路。
水遠人家。烟迷津樹。晚峯江上青無數。幽人此別更多情。移家歸向山中住。

戴璉

字汝器·南海人·正統三年舉人·官訓導·

滿庭芳

竹隱寒煙。菊凝晚露。空階霜月微明。小窗寂靜。四壁響蟲聲。風細金爐香裊。穿花影、數點飛螢。良夜永、悶無情緒。獨坐對長檠。玉人音信斷。巫山雲鎖。洛浦煙橫。奈魚沉雁杳。誰訴衷情。新酒難降舊恨。佳期誤。檐鵲無憑。愁人處。更闌酒醒。孤枕夢難成。

商 輅

字宏載。淳安人。正統十年進士。自鄉會試至殿試。皆第一。歷官吏部尚書。謹身殿大學士。諡文毅。有素菴集六卷。詞附。

古今詞話。商毅菴負鼎鉉重望。而小詞明淨簡鍊。亦復沾沾自喜。今讀其旅情春暮秋月退食諸篇。不墮時趨。自有殊致。其一叢花咏初春云。東風有信無人見。露微意柳際花邊。尤覺妥帖輕圓也。

一叢花
初春

今年春淺臘侵年。冰雪破春妍。東風有信無人見。露微意、柳際花邊。寒夜縱長。孤衾易煖。鐘鼓漸清圓。朝來初日半銜山。樓閣淡疎煙。游人便作尋芳計。小桃杏、應已爭先。衰病少情。疎慵自放。唯愛日高眠。

聶大年

字壽卿·臨川人·正統間·官仁和縣教諭·景泰初·徵入翰林·

堯山堂外紀云·東軒集有玉樓人醉東風曉·高卷紅簾看杏花·真詞筆也·

卜算子

楊柳小蠻腰。慣逐東風舞。學得琵琶出教坊。不是商人婦。
忙整玉搔頭。春筍纖纖露。老却江南杜牧之。懶爲秋娘賦。

又

粉淚濕鮫綃。只恐郎情薄。夢到巫山第幾重。酒醒燈花落。
數日尙春寒。未把羅衣著。眉黛含顰爲阿誰。但悔從前錯。

臨江仙

半道春紅

記得武林門外路。雨餘芳艸蒙茸。杏花深巷酒旗風。紫驄嘶過處。隨意數殘紅。
有約玉人同載酒。夕陽歸路西東。舞裙歌扇繡簾櫳。昔游成一夢。試問賣花

翁。

王

越

字世昌·濬縣人·景泰二年進士·歷官兵部尙書·封威寧伯·卒贈太傅·諡襄敏·有雲山老嫺集四卷·詞附·

浪淘沙

遠水接天浮。渺渺扁舟。去時花雨送春愁。今日歸來黃葉鬧。又是深秋。聚散兩悠悠。白了人頭。片帆飛影下中流。載得古今多少恨。都付沙鷗。

張

寧

字靜之·海鹽人·景泰五年進士·官禮科給事中·有方洲集四十卷·詞附·

滿江紅

題碧梧翠竹
送李陽春

一曲清商。人別後、故園幾度。想翠竹、碧梧風采。舊游何處。三徑西風秋共老。滿庭疎雨春都過。看蒼苔、白石易黃昏。愁無數。嶧山畔、淇泉路。空回首。佳期誤。歎舞鸞鳴鳳。歸來遲暮。冷淡還如西澗草。淒迷番作江東樹。且留他、素管候冰絲。重相和。

湯允勣

字公讓·鳳陽人·東甌襄武王曾孫·歷官延綏參將·有東谷集·

浣溪沙

燕壘離空日正長。一川殘雨映斜陽。鷓鴣驚晒翅滿魚梁。

榴葉擁花當北戶。竹

根抽笋出東牆。小庭孤坐嬾衣裳。

李東陽

字賓之·茶陵人·天順八年進士·歷官吏部尙書·華蓋殿大學士·諡文正·有懷麓堂集·

雨中花

題面

正愛月來雲破那更柳眠花臥。簾幙風微。秋千人靜。酒盡春無那。

迢遞高樓

孤寂坐。縹渺笛聲飛墮。恨曲短宵長。院深牆迥。憑仗風吹過。

姚

綬字公綬·嘉善人·天順八年進士·官監察御史·有穀菴集·

玉樓春

春日

東風寒悄人何處。百里幽閑猶未遇。看春不覺又清明。檻外梨花開幾樹。相

思心逐東流去。老天肯把韶光駐。陌頭楊柳正青青。莫教容易飛花絮。

沈

周字啓南·長洲人·舉賢良·不赴·工詩畫·有石田集八卷·

鷓鴣天 柳

慣得輕柔綺陌中。幾枝斜映驛亭紅。微煙啞雀金猶懶。細雨藏鴉綠未濃。攀
傍岸折隨風管。人離別思無窮。開花更是無聊賴。一片西飛一片東。

桑

悅字民懌·常熟人·成化元年舉人·官柳州通判·有思元集十六卷·

虞美人春曉憶長沙作

細雨梨花春夢破。梁燕將愁訴。薄陰小閣日隴隴。寶篆輕煙一縷。裊東風。星
沙舊占遊歌處。清景難留住。王孫芳草最多情。萬里和煙隨我到邊城。

吳

寬字原博·長洲人·成化八年賜進士第一·入翰林歷官禮部尙書·卒贈太子太保·諡文定·有匏菴集·

者舊續聞·吳匏菴詞有繁花落盡留紅藥、新笋叢生帶綠苔·名句也·時有趙寬字栗夫·爲匏菴所取士·詞名半江集·匏菴嘗曰·不遇吳寬·爭得趙寬·

採桑子

纖雲盡卷天如水。蘆荻風殘。松竹霜寒。更看前溪月滿山。畫舸紅映金尊酒。子夜歌闌。緩吹輕彈。得意人生且盡歡。

王

鏊 字濟之。吳縣人。咸十一年進士。歷官戶部尙書。武英殿大學士。諡文恪。有文恪公集三十六卷。詞附。

阮郎歸

行年六十鬢爛熳。皇恩特放還。高堂設席對青山。秋來正未閒。陰忽霽。暑初殘。笙歌夜未闌。傍人莫笑老嚙頑。人生到此難。

吳

洪 字禹疇。吳江人。成化十一年進士。歷官刑部尙書。

早梅芳

柳將眠。桃欲笑。又是清明到。玉河冰泮。無數金魚弄池藻。聯車油壁軟。並馬絲鞭裊。喜鳳城麗景。游覽趁春曉。望瀛洲。紛翠葆。花滿瓊華島。玉竦西去。金碧

舳舻聳雲表。散衙常過午。下直須歸早。更相期。提壺同藉艸。

趙寬

字栗夫。吳江人。成化十七年進士。歷官刑部郎中。出爲廣東按察使。有半江集。

減字木蘭花

姚江阻雨

寒風吹水。微波皺作魚鱗起。白雨橫秋。秋色蕭條動客舟。疎鐘何處。知在前村黃葉樹。茅屋誰家。荒徑無人菊自花。

楊循吉

字君謙。吳縣人。成化二十年進士。官禮部主事。有南峯逸藁。

洞仙歌

題酒家壁

吳郊春滿。綠艸熏南陌。風弄輕帘小橋側。瞰荒垣濃麗。幾樹夭桃。彷彿似、薄醉西施顏色。醞香飄十里。更着流鶯亂擲。金梭向林織。天宇淨繁芳。日暖蜂遊。早攔住、高陽狂客。便典却、羅衫又何妨。算容易飛花。韶光難得。

費

宏

字子充。鉛山人。成化二十三年。賜進士第一。歷官華蓋殿大學士。卒贈太保。諡文憲。有費文憲公集七卷。

西江月

舟中夜行·獨坐
無酒·撫卷作·

霜月高懸碧漢。畫船自泛寒江。銀鐙獨對夜何長。窗外浮光蕩漾。可怪麴生
疎闊閒來冷落瓊觴。思量無計助清狂。且與青編相向。

蔣

冕

字敬之·全州人·成化二十三年進士·歷官戶部尚書·謹
身殿大學士·卒贈少師·諡文定·有湘臯集二十二卷·
呂調陽云·湘臯樂府若碧水芙
蕖·不假雕飾·而天巧自在·

卜算子

斜日墜荒山。雲黑天垂暮。時見空中一雁來。冷入殘蘆去。驚起却低飛。有意
同誰語。啄盡枝頭數點霜。還向空中舉。

王鴻儒

字懋學·南陽人·成化二十三年進士·歷官
南京戶部尚書·諡文莊·有凝齋集十一卷·

踏莎行

賞
菊

燕子初歸。芙蓉乍老。蒼苔院落桐陰小。一簾疎雨晚來晴。繁香不斷寒花裊。

著譜人非餐英事。杏風流未必今時少。且須痛飲讀離騷。靈修豈肯捐芳草。

轉應曲

金井金井。梧葉銀牀露冷。千門萬戶砧聲。北斗城頭月明。明月明月。偏照旅人華髮。

夏

鍬字德樹·天台人·成化二十三年進士·歷官大理評事·

阮郎歸

賭酒明湖未放船。時節欲開蓮。壁後茶鎗幾點煙。聽雨小窗眠。雲解凍。水平田。蛙聲又一年。晚晴花草落愁邊。呼童問酒錢。

臨江仙

榴葉竹屏閒處好。香街雨夢無緣。聽人說著指瓊鞭。玉樓嗔短舞。書枕愜高眠。幾夜晚眠還早起。城中一半風煙。畫橋架水綠陰連。柳眉傷老大。鶯口弄清

圓。

史

鑑 字明古·吳江人·有西村集八卷·詞附·

浣溪沙

夏夕賞蓮

水面風來晚更宜。酒香荷氣水沉微。誰家長笛倚樓吹。

五月梅花今夜落。千

門梧葉未秋飛。不知零露濕人衣。

又

曲水流通濯錦紅。新門移轉納香風。畫舟時傍彩雲中。

半夜月明歌楚調。雙

蓮波冷泣吳宮。鴛鴦驚散各西東。

望江南

閩尙溫招飲湖中

船櫂處。恰是藕花洲。別處歌聲剛得借。去時春色那堪留。花落水空流。天漸晚。臨去更回頭。山翠遠如眉黛曉。湖光疑似眼波秋。越女不勝愁。

臨江仙

贈余浩

秋水芙蓉江上飲。憐渠無限風流。紅牙低按小梁州。澹雲拖急雨。依約見江樓。
最是采蓮人似玉。相逢並著蓮舟。唱歌歸去水悠悠。清砧孤館夜。明月太湖秋。

解連環

送別

銷魂時候。正落花成陣。可人分手。縱臨別、重訂佳期。恐軟語無憑。盛歡難又。雨外春山。會人意、與眉交皺。望行舟漸隱。恨殺當年。手栽楊柳。別離事、人生常有底。何須爲著。成个消瘦。但若是兩情長。便海角天涯。等是相守。潮水西流。肯寄我、鯉魚雙否。倘明年、來遊燈市。爲儂沽酒。

張

旭

字廷曙·休寧人·成化二十年舉人·有梅巖小稿·

點絳脣

卜盡金錢。閑愁暗逐游思起。雲鬆螺髻。眉減春山翠。試捲珠簾。風□香生袂。
涼如水。惜花心碎。忍把闌干倚。

祝允明

字希哲。長洲人。宏治五年舉人。官應天府通判。有懷里堂集三十卷。

蝶戀花

贈妓

鬧蝶窺春花性淺。未了粧梳。小顰脣朱點。玉絮吹寒飛力軟。深深繡戶珠簾掩。
廝放臨時仍泥戀。一把風情。錯認徐娘減。略綽暈香紅半片。闌干回首東風遠。

李夢陽

字獻吉。慶陽人。徙大梁。宏治六年進士。官江西提學副使。

如夢令

昨夜洞房春暖。燭盡琵琶聲緩。閒步倚闌干。人在天涯近遠。影轉影轉。月壓海棠枝軟。

顧

潛字孔昭·崑山人·宏治九年進士·官御史·有靜觀堂集十三卷·詞附·

醉春風

紫燕歸來兩雲蹤無處訪。桃花開後海棠開。想想落日城邊。斷霞樓角。綠波
蘭漿。錦瑟縈塵網。香篆消羅幌。更闌酒醒夢難成。響響芳樹敲風。空塔滴
雨。倍添愁悵。

洞仙歌

自壽

婁江一碧。動鱸魚佳興。浩蕩鷗波放煙艇。過溪橋十里。香稻垂花。秋未晚。遠渚
芙蓉萬柄。野翁能愛我。酌酒烹雞。何處漁歌更堪聽。醉起試推篷。驟雨初收。
斜陽外。山光雲影。願百歲。逍遙灑西東。任華髮星星。換來青鏡。

憶秦娥

眉山蹙。多愁慵整搔頭玉。搔頭玉。覷他雙鳳。暗憐孤獨。
闔閭城外春波綠。闔閭城外春波綠。

舟載酒歡難續。歡難續。郎歸何日。金錢偷卜。

朱

諫 字君佐·永嘉人·宏治九年進士·官吉安府知府·

梁州令 謝公嶺

着屐登山客。歷盡雲霞天壁。屐痕猶在白雲中。峯迴路轉。千古無人識。春來秋去成塵跡。一代風流歇。斜陽影落溪外長松。幾樹連天碧。

王九思

字敬夫·鄂縣人·宏治九年進士·官吏部郎中·有漢陂集續集十九卷·

蝶戀花 夏日

門外長槐窗外竹。槐竹陰森。遠屋重重綠。人在綠陰深處宿。午風枕簟涼如沐。樹底轆轤聲斷續。短夢驚回。石鼎茶方熟。笑對碧山歌一曲。紅塵不到人間屋。

邊

貢 字廷實·歷城人·宏治九年進士·歷官南京戶部尙書·有華泉集八卷·

明詞綜 卷二

踏莎行

露濕春莎。草生芳甸。漁舟迤邐依山轉。斜陽明滅照村墟。綠槐深護幽人院。
小柵鳴雞。古梁巢燕。柴門不鎖蓬蒿徧。問渠莫是武陵源。一溪流水桃花亂。

蝶戀花

留別吳白樓

亭外潮生人欲去。爲怕秋聲。不近芭蕉樹。芳草碧雲凝望處。何時重話巴山雨。
三板輕船頻喚渡。秋水疎楊。欲折絲千縷。白雁橫天江館暮。醉中愁見吳山路。

顧璘

字華玉。吳縣人。宏治九年進士。歷官湖廣巡撫。加刑部尙書。有憑几集。浮湘藁。息園集。

柳塘詞話云。東橋詞有承平氣象。

摸魚兒

十二月十四日自衡入永

遠山低。半留殘雪。望中清景殊絕。寒雲漸逐西風散。村落午煙搖曳。行路客被

簿領沉迷。又度隆寒節。陽回歲歇。是何日春來。早梅花萼。看透幾分白。憶江
左。多少關河分隔。異鄉空望明月。衡陽飛雁都回矣。欲寄音書那得。情似結。更
斷酒拋詩。幽恨憑誰說。髻霜鬢雪。拚老去年華。禾畦麥壟。覓取舊生業。

臨江仙

雨中柬
譚子羽

抱病登樓無意緒。滿城寒雨濛濛。一樽何日與君同。卷簾芳艸碧。呼酒夕陽紅。
堪恨賞心都不偶。依然枉却東風。扁舟歸興莫匆匆。江梅花自落。別有海棠
叢。

唐

寅

字子畏。吳縣人。宏治十一年南京鄉
試第一。坐事被斥。有六如詞一卷。

一翦梅

雨打梨花深閉門。忘了青春。誤了青春。賞心樂事共誰論。花下銷魂。月下銷魂。
愁聚眉峯盡日顰。千點啼痕。萬點啼痕。曉看天色暮看雲。行也思君。坐也思

君。

周

用

字行之·吳江人·宏治十五年進士·歷官吏部尙書·諡恭肅·有白川集十六卷·

訴衷情

人間何處有丹丘。曾到太湖頭。日高主人猶臥，花影滿重樓。尋畫史，接詩流。老滄洲。一村煙樹，數家茅屋，幾箇漁舟。

滿路花

風前滿地花。雨後連天艸。今年三月裏，春歸早。低雲薄霧，猶自憐清曉。金尊須臾到。無奈離愁，爲他轉傷懷抱。繡簾斜捲，畫靜聞啼鳥。韶華剛九十，勾銷了。綠波無賴，點點青荷小。寄語春知道。桃李多情，莫教惜春人老。

陳

霆

字聲伯·德清人·宏治十五年進士·官山西提學僉事·有水南葉十九卷·

踏莎行

晚景

流水孤村。荒城古道。槎牙老木烏鳶噪。夕陽倒影射疎林。江邊一帶芙蓉老。
風暝寒煙。天低衰艸。登樓望極羣峰小。欲將歸信問行人。青山盡處行人少。

清平樂

遊西湖用
王介甫韻

香車隘住。笑揭紅蓮語。淺蹴芳塵羅韉汗。堤上未乾花雨。
畫船載得琵琶。醉中情思無涯。不管湖煙湖水。東風取次飛花。

王廷相

字子衡。儀封人。宏治十五年進士。歷官兵部尙書。加太子太保。諡肅敏。有家藏集。

桂枝香

朝霞飛散。正微借清霜。林外烘染。搖落年華。宋玉又多幽怨。小樓悄悄闌干倚。
最浮雲、不堪情戀。玉書難寄。碧天空闊。夢迷人遠。歎雙鬢、年來較短。算病旅
中秋、不禁登翫。只見青山。誰見古時人面。鄉心渺渺。隨流水、更不待、商歌魂斷。
新愁頓起。半牕暝雨。一聲歸雁。

原书空白页

明詞綜卷三

青浦 王昶 纂

陸 深一首

王 韋一首

韓邦奇四首

丁 奉一首

吳 山一首

楊 慎十一首

齊之鸞一首

盧 雍一首

張 縉二首

桂 華一首

李 濂一首

崔 桐一首

趙 金一首

夏 言三首

文徵明六首

陳 鐸二首

謝承舉一首

陸楫一首

徐階一首

盧襄一首

陸垹一首

楊儀二首

呂希周一首

王慎中一首

吳子孝四首

陳如綸三首

薛廷寵一首

閔如霖一首

駱文盛一首

許穀一首

蔡宗堯一首

陸

深

字子淵·上海人·宏治十八年進士·歷官詹事府詹事·贈禮部侍郎·諡文裕·有河汾燕閒錄、與玉堂漫筆等集·

風入松

綠窗午枕睡初酣。夢喜脫朝簪。覺來猶是長安客。垂楊裏、空繫歸驂。戀主心依

曉闕思親淚濕春衫。玉河流水碧于藍。花外燕呢喃。新詞譜就憑誰和，重封罷親自題緘。欲待天邊鴻雁，秋風寄與江南。

王

韋

字欽佩·上元人·宏治十八年進士·官太僕少卿·

玉漏遲

元宵奉陳靜齋憲長

今宵春正好。卷簾無那。客中情緒。連日眉梢。暫放片時還聚。薄宦辭家幾許。歎骨肉、水萍風絮。留不住。紛紛客淚。兩行如樹。緬想此日家園。正兒女團欒。燒燈時序。明月依人。空照一樽清醕。深謝東君慰我。喜投贈、玉堂佳句。高唱處。乳鴉亂翻庭樹。

韓邦奇

字汝節·朝邑人·正德三年進士·歷官南京兵部尙書·諡恭簡·有苑洛集二十二卷·詞附·

西江月

春思

殘雪已消往事。東風又報春愁。珠簾不捲玉香鉤。庭院遲遲清晝。細雨繁花

上院輕煙碧草汀洲。一聲啼鳥水東流。春在小橋楊柳。

臨江仙

三月三十日

芍藥牡丹開已罷。明朝不是春光。鶯兒撩亂送斜陽。繁華應不盡。蜂蝶且休忙。
幾架薔薇依碧檻。新荷更滿芳塘。水晶簾外細飄香。推枰聽玉樹。移座倒金觴。

謁金門

珠簾捲。樓外春愁無限。雨過茶蘼春色減。落紅驚滿院。枝上燕慵鶯懶。誰與韶光爲伴。煙柳絲絲迷望眼。闌干空倚徧。

風入松

畫樓簾捲篆煙微。煖雨霏霏。雲山極目家千里。問天涯。何日歸期。寂寞庾愁似海。飄蕭潘鬢成絲。鶯兒壓折海棠枝。飛上薔薇。深紅淺綠應無數。逐東風。滿

院芬菲。最是惜花心切。只憂花落春歸。

丁

奉字獻之。常熟人。正德三年進士。官吏部驗封司郎中。有南湖留稿八卷。

眼兒媚

過華湖

蘆葦蕭蕭奏輕颺。煙雨隔南洲。小航冒冷。孤帆披濕。一路吟謳。閒人儼似天隨子。幽興五湖秋。相知只在渡頭漁叟。沙嘴眠鷗。

吳

山

字靜之。吳江人。正德三年進士。歷官河南四川巡撫。入爲刑部尙書。諡忠襄。

清平樂

秋光如許。雁字排空去。十二闌干凝眺處。簾捲西山暮雨。白沙翠竹柴門。落

霞紅。正倚况是亭皋葉下。蕭蕭最愴吟魂。

用修。新都人。正德六年賜進士第一。授修撰。嘉靖甲申兩上。天禮疏。廷杖。謫戍雲南永昌衛。卒于戍所。有升庵詞二卷。

慶曆紀聞。用修所著書百餘種。號爲博洽。金華胡應麟嫌其熟于稗史。不嫻于正史。作筆叢以駁之。然楊所輯百珠真珠。詞林萬選。王弇州亦謂之詞家。

功臣也。因議禮謫戍永昌。暇時紅粉傅面。作雙丫髻插花。令諸妓扶觴遊行。了不爲愧。詩有羅衣香未歇。猶是漢宮恩句。詞亦華美流利。

轉應曲

雙燕雙燕。金屋往來長見。珠簾半捲風斜。何處銜來落花。花落。花落。日暮長門寂寞。

又

促織促織。聲近銀牀轉急。熏殘百合衣香。消息蘭膏夜長。長夜。長夜。露冷芙蓉花謝。

又

銀燭銀燭。錦帳羅幃影獨。離人無語消魂。細雨斜風掩門。門掩。門掩。數盡寒城漏點。

烏夜啼
梅雨

雨來江漲波渾。沒沙痕。淹過竹橋莎徑到柴門。孤煙起。千樹裏。幾家邨。牛背
一聲長笛報黃昏。

昭君怨

樓外東風到早。染得柳條黃了。低拂玉闌干。怯春寒。正是困人時候。午睡濃
於中酒。好夢是誰驚。一聲鶯。

少年遊

紅稠綠暗徧天涯。春色在誰家。花謝人稀。柳濃鶯嬾。煙景屬蜂衙。日長睡起
無情思。簾外夕陽斜。帶眼頻移。琴心慵理。多病負年華。

浪淘沙

春夢似楊花。繞遍天涯。黃鸝啼過綠窗紗。驚散香雲飛不去。篆縷煙斜。油壁
小香車。水渺雲賒。青樓珠箔那人家。舊日羅巾今日淚。濕盡韶華。

江月晃重山

臘尾金杯灑灑。春頭綵勝翩翩。裁紅暈碧動嫣然。風日好。偷眼豔陽天。一曲玉簫明月。幾絃錦瑟華年。故鄉迢遞水雲連。歸未得。思發在花前。

雨中花

一搦纖腰清瘦。六幅輕紗紅皺。粉熟香生。態濃粧淺。正是愁時候。蕭蕭風雨黃昏後。雲濕仙衣寒透。簾悄窗閒。燈昏酒冷。聽盡蓮花漏。

滿江紅

梨花

露重風香。韶華淺。玉林無葉。誰剪碎、遍地瓊瑤。滿園蝴蝶。嬌淚一枝春帶雨。粉英千片光凝雪。伴鞦韆、影裏月明中。傷離別。花在手。腸如結。人對酒。情難說。憶故園遊賞。清明時節。今日相逢滇海上。驚看爛熳開正月。更收燈、庭院峭寒天。啼鴉歇。

水調歌頭

春宵微雨後。香逕牡丹時。雕闌十二。金刀誰剪兩三枝。六曲翠屏深掩。一架銀
箏緩送。且醉碧霞卮。輕寒香霧重。酒暈上來遲。席上歡。天涯恨。雨中姿。向人
如訴。飄泊粉淚半低垂。九十春光堪惜。萬種心情難寫。彩筆寄相思。曉看紅濕
處。千里夢佳期。

齊之鸞

字瑞卿。桐城人。正德六年進士。官河南按察使。

小重山

清角悲笳響。遏雲平。催涼月上。白紛紛。塞垣砧杵。小城聞。心鐵石。誰解歎離羣。
銀燭水沈熏。引杯嫌獨醉。但微醺。參辰何事。各天分。彈鋏起。台斗氣氤氳。

盧

字師邵。吳縣人。正德六年進士。官監察御史。有古園集。

蝶戀花

徐州晚泊

野樹煙生斜日墮。千里帆檣。又向黃昏過。自據胡牀船上坐。東山月出浮雲破。
細細波流聲繞舵。風葦蕭蕭。兩岸明漁火。吹罷洞庭歌楚些。坡仙恍惚相逢我。

張

縉

字世文·高郵人·正德八年舉人·官武昌通判·遷知光州·有詩餘圖譜·竝南湖集四卷·

古今詞話·維揚張世文著詩餘圖譜·絕不似嘯餘譜辨詞體之舛錯而爲之規矩·

真填詞家功臣也·其所製蝶戀花、風流子、數闋·風流蘊藉·更足振起一時·

蝶戀花

紫燕雙飛深院靜。簾枕紗廚。睡起嬌如病。一線碧煙縈藻井。小鬟茶進龍香餅。
拂拭菱花看寶鏡。玉指纖纖。撚唾撩雲鬢。閒折海榴過翠徑。雪貓戲撲風花影。

風流子

新陽上簾幌。東風轉。又是一年華正。駝褐寒侵。燕釵春裊。句翻詞客。簪鬪宮娃。

堪娛處、林鶯啼煖樹。渚鴨睡晴沙。繡閣輕煙，剪燈時候，青旌殘雪。賣酒人家。此時因重省。瑤臺畔、曾遇翠蓋香車。惆悵塵緣猶在，密約還賒。念鱗鴻不見，誰傳芳信。瀟湘人遠，空採蘋花。無柰疎梅風景，碧草天涯。

桂

華

字子樸·安仁人·正德八年舉人·有古山集·

菩薩蠻

答何用明

帝城三月鶯花繞。笙歌沸徹千家曉。半壁夕陽明。醉眠人未醒。城頭鳴畫角。驚起南飛鵲。回首上林枝。行人腸斷時。

李

濂

字川父·祥符人·正德九年進士·官山西按察使僉事·有嵩渚集·

柳梢青

修武道中

爛漫春遊。人生行樂。山水夷猶。昨夜河陽。今朝修武。明日懷州。平生雅興難酬。信轡去、東風紫騮。問酒花村。題詩松寺。飛夢蓬邱。

崔

桐 字來鳳·海門人·正德十二年進士·
歷官南京禮部右侍郎·有東洲集·

風入松 開居

亭臺簾幙鎖重重。韶景又東風。竹牀習懶，閑春夢，喚鶯聲。醒眼猶慵。短髮烏巾，斜裏尋幽日，傍花叢。碧流橋外小桃紅。徙倚畫欄東。銀鱗玉笋新來美，好情懷、盡付杯中。莫笑海翁醉也，醉時百感成空。

趙

金 字淮獻·烏程人·布衣·正德中·詔徵不赴·有浮休集·

謁金門

湖天渺。一片水雲沙鳥。俯景茫茫空懊惱。孤吟秋色老。自愛琅玕芝草。茅屋碧山環繞。高臥長松心盡了。年來機事少。

夏

言

字公謹·貴溪人·正德十二年進士·歷官吏部尚書·華蓋殿大學士·諡文愍·有桂洲近體樂府六卷·鷗園新曲一卷·
湧瀆小品·夏言以議禮驟貴·世廟因正月降雪·命言等作時玉賦·石塘曾銑·夏之內戚·作漁家傲詞·互相磨唱·遂起河套之議·故黃泰泉有千不買

陳平計。蓋譏之也。蘇苑卮言。我朝以詞名家者。伯溫穠纖有致。去宋尚隔一塵。用修好入六朝麗事。似近而遠。公謹最號雄爽。比之稼軒。覺少精思。錢氏云。公謹喜爲長短句。當其得君專政。聲勢烜赫。長篇小令。草葉未削。已流布都下。互相傳唱。歿後未百年。黯然無聞。花間、草堂、之集。無有及桂洲氏名者。求如前代所謂曲子相公。亦不可得。可一慨也。

鶴沖天

夏初

臨水閣倚風軒。細雨熟梅天。一池新水碧荷圓。榴花紅欲燃。薄羅裳。輕紈扇。

睡起綠陰滿院。曲闌斜轉正閒凭。何處玉簫聲。

阮郎歸

小樓臨苑對青山。朱門草色閑。隔花時有珮珊珊。鞦韆楊柳閒。新綠暗。亂紅殘。慵粧低翠鬟。日長春困減芳顏。無人獨倚闌。

浣溪沙

春暮

庭院沈沈白日斜。綠陰滿地又飛花。岑岑春夢繞天涯。簾幕受風低乳燕。池

塘過雨急鳴蛙。酒醒明月照牕紗。

文徵明

初名璧。以字行。更字徵仲。長洲人。以歲貢入京授待詔。有莆田集。

太平清話。衡山極熟勝國遺事。能口述其故實里居。性介潔。太宰喬白巖。司空林見素。爲延譽於朝。授翰林待詔。卽乞歸。往來姚山。遯浦。小詞散布。隸書尤工。

卜算子

酒醒夜堂涼。雨過湘簾捲。時見流螢度短牆。乍近依然遠。欲睡更遲徊。徙倚闌干徧。不覺西樓闕。月斜。寂寞桐陰轉。

南鄉子

香煖透春肌。滿眼新嬌睡起遲。燕子不來三月盡。依依手撚殘花玉一枝。風
鼻鬢雲垂。無限閒愁隱翠眉。好夢不成春自去。相思只有青團扇子知。

風入松

近來無柰病淹留。十日廢梳頭。避風簾幙，何曾捲，翛然處。古鼎香浮，興至閒書，棊几困來時覆茶甌。新涼如水，篔紋流。六月類清秋。手拋團扇，拈書冊，無情緒。欲展還休。最是詩成酒醒，月明時度南樓。

又

簡湯子重·湯居碧鳳坊。

西齋睡起雨濛濛。雙燕語簾櫳。平生行樂都成夢，難忘處，碧鳳坊中。酒散風生，棋局詩成，月在梧桐。近來多病不相逢。高興若爲同。清樽白苧交新夏，應辜負，綠樹陰濃。憑仗柴門，莫掩，興來擬扣牆東。

又

行春橋望月

夜涼斜倚赤闌橋。天遠碧煙消。酒醒忽見花閒影，輕雲散，月在林梢。野火青山，隱隱漁歌，綠水迢迢。當年曾此醉清宵。共艤木蘭橈。白頭重蹋行春路，同遊伴，半已難招。夜靜單衫露冷，玉人何處吹簫。

滿江紅

漠漠輕陰正。梅子弄黃時節。最惱是、欲晴還雨。乍寒又熱。燕子梨花都過也。小樓無那傷春別。傍闌干、欲語更沈吟。終難說。一點點、楊花雪。一片片、榆錢英。漸西垣日隱。晚涼清絕。池面盈盈清淺水。柳梢淡淡黃昏月。是何人、吹徹玉參差。情淒切。

陳鐸

字大聲，下邳人。徙南京。官指揮使。

錢氏云：大聲以樂府名于世。所爲散套。繼協流麗。被之管弦。能審宮節羽。不差毫末。

浣溪沙

波映橫塘柳映橋。冷煙疎雨暗亭皋。春城風景勝江郊。花蘂暗隨蜂作蜜。溪雲還伴鶴歸巢。草堂新竹兩三梢。

謝承舉

字子象。上元人。

卜算子 題凭
几圖

病影有燈知。心事無人問。上苑春光過二分。應少同遊分。
畫障且相偎。曲几
聊孤隱。窗外紅梅開已齊。似識香闥悶。

陸

楫

字思豫。上海人。
有兼葭堂集。

望海潮

送顧漱
玉入雍

江帆飛雨。汀莎沒雁。玉人方上皇州。酒泛霞觴。潮生煙浦。那堪淚灑蘋洲。雲樹
兩悠悠。蓬窗迷岸草。一任夷猶。羨爾詞源。倒傾三峽楚天秋。清時肯臥林邱。
看詩題杏苑。名徹宸旒。朔月關心。燕風撲面。誰云悔覓封侯。壯志奮吳鉤。故園
芳草。合魚鳥含愁。何日京塵。夜酤清醕瀉牀頭。

徐

階

字子升。由青浦徙居華亭。嘉靖二年進士。歷官吏部
尚書。建極殿大學士。諡文貞。有世經堂集二十六卷

阮郎歸

一春歸思羨冥鴻。青山在眼中。無端秋色又丹楓。滄洲路未通。搔白首，望長空。徘徊意萬重。持杯看爾去匆匆。心隨江水東。

盧

襄 字師陳·吳縣人·嘉靖二年進士·
官兵部郎中·有五塢山房稿·

蝶戀花

徐州晚泊
用師邵韻

城上危樓驚欲墮。北櫂南檣。日日城邊過。猶記昔年樓上坐。樓前景物多題破。今日長年催振舵。萬井蕭條。落日稀煙火。坡老不歸招楚些。雲山隔水如留我。

陸

垞

字秀卿·嘉善人·嘉靖五年進士·歷官河南巡撫·

臨江仙

病後衣裳慵對客。鏡中雙鬢鬢。青山何處著茅庵。向來經濟意。都只是空談。世事悠悠那復論。三杯且放微酣。小窗過午睡還貪。無端春夢繞。猶自在江

南。

楊

儀

字夢羽·常熟人·嘉靖五年進士·官山東按察使·

惜分飛

和陳霞棲韻

月戶花堦凡幾度。盡把芳尊囑付。轉眼濃華故。鸞膠總被秦娘誤。榆莢楊花曾入賦。也解漫天飛舞。夢覺西堂午。琵琶聲斷聞鸚鵡。

榆莢楊花

桃源憶故人

訪周汝寺

單衣曉怯東風冷。忽過湖波千頃。山色倒侵溪影。一路隨孤艇。美人室遠飛雲迴。遙憶小堂春永。睡起碧紗人靜。隔竹敲新茗。

美人室遠飛

呂希周

字師旦·崇德人·嘉靖五年進士·官通政司使·

重疊金

別惜

粉痕未褪梅粧雪。驂鸞忽度梨花月。燈影小紅樓。角聲起暮愁。孤篷憐倦客。

繡被餘香歇。料倚枕鴛單。屏風六曲山。

王慎中

字道思。晉江人。嘉靖五年進士。官河南參政。

點絳脣

光澤寺

門掩青山空庭竹影門長埽。一溪斜繞。水氣香花草。木石幽殊禽鳥傳昏曉。誰知道。白雲鎖了。恰有人尋到。

吳子孝

字純叔。長洲人。嘉靖八年進士。官湖南參議。有明珠集詞一卷。

點絳脣

二月八日夜
汎射瀆歸作

花信風輕爲花日日芳遊。早曲溪繚繞。歸棹情多少。月映清波。良夜春寒悄。長空皎。歌聲縹緲。醉裏愁如掃。

訴衷情

嘉靖癸丑甲寅
東南倭亂

韶光都過亂離中。登眺覺心慵。青山城外望斷。愁絕黛痕濃。閒把酒。倚樓東。

小梅紅。館娃煙草。香徑風蘭。長記遊踪。

清平樂

韶光易變。涼露霏如靄。翠卷香消憔悴遍。一夜池塘秋晚。蘆枯葦折波中。鳧
棲雁宿芳叢。盡日倚闌如畫。白蘋紅蓼西風。

風流子

登虎邱
致爽閣

雨痕消已盡。長空靜。皎日映江流。看寒草都腓。衰林漸薄。翠荷遍沼。黃橘連洲。
新晴好。抱琴遵竹浦。載鶴共松舟。近市炊煙。隔林樵唱。蒼茫望遠。窈窕尋幽。
晚來還著屐。窮巖壑。更上絕頂飛樓。何事西來爽氣。偏對吟眸。指青巒萬疊。澄
川百道。遶闌分列。似畫難收。方信三吳佳景。盡屬清秋。

陳如綸

字德宜。太倉人。嘉靖十一年進士。
官福建布政使參議。有二餘詞一卷。

小重山

題東
川

綠漲粼粼接碧空。可人魚鳥境。著閒翁。蓬萊只在海山東。煙霞迥。杖履任從容。
無分學屠龍。有時移短棹。泛春風。歸來篷底夕陽紅。同酒伴。爛醉水雲中。

眼兒媚 答銘泉
春懷

羅袖輕盈怯風寒。飛夢到長干。蜂慵蝶倦。紅稀綠暗。春色將殘。
三月家書猶未見。錦瑟幾拋閑。相思無奈。千重煙樹。萬疊雲山。

踏莎行 答賈竹
亭春行

楊柳溪橋。桃花野渡。十年車馬同遊處。聯詩曾對月華明。傷心祇見春光暮。
迢遞雙魚。浮沈尺素。相思輾轉愁無數。東風聽徹子規啼。聲聲訴盡空歸去。

薛廷寵

字萃軒。福清人。嘉靖十一年進士。官工科給事中。出使朝鮮。與華察及蘇世讓、成世昌等倡和。有皇華集四卷。

蝶戀花 殘春
風雨

綠楊枝上黃鸝小。長路關情。花鳥三春了。雲水迢迢鄉夢杳。天桃穠李空開笑。

江笛一聲天正曉。雨色愁人。征騎忙多少。紫荇風牽羅帶繞。晚來頓覺輕寒峭。

閔如霖

字思望。烏程人。嘉靖十一年進士。歷官南京禮部尙書。卒贈太子少保。

臨江仙

萬里碧天清似洗。銀河珠斗迴杓。秋千院落月兒高。柳陰牆外轉。花氣戶邊飄。春色惱人應不寢。何人更品鸞簫。靈雞未唱夜迢迢。玉階清露濕。金鼎碧煙銷。

駱文盛

字質甫。武進人。嘉靖十四年進士。官編修。

南鄉子

夏日遊竹隱寺

古寺隱叢篁。石徑逶迤碧蘚荒。夾道松枝低拂臆。蒼涼。清露沾衣濕不妨。緩步上迴廊。老衲相邀入竹房。旋汲山泉供茗椀。悠颺。風送閒雲下石牀。

許

穀字仲貽·上元人·嘉靖十四年進士·官南尚寶卿·有歸田稿·

風入松

癸亥端午

薰風吹滿舊都城。斜日映鍾陵。佳辰恰喜收殘雨。正榴花、照眼烘晴。閉戶恐辜令節，開尊獨坐閑庭。一年春夏等閑更。冷煖不須驚。瓜棚豆架空尋遍。笑王郎、好夢難成。弔屈添來餘恨，江邊嗚咽潮聲。

蔡宗堯

自號東郭子·天台人·嘉靖十六年舉人·官松溪縣教諭·有龜陵詞一卷·

點絳脣

寒雨溪橋。卷簾半醉春風好。早鶯來了。疎影梅花老。吟破狂愁。燕落江天渺。山城小。馬蹄多少。露濕王孫草。

明詞綜卷四

青浦 王昶 纂

陳 鏜一首

萬士和一首

李攀龍一首

周思兼一首

文 彭二首

王世貞八首

孫 樓一首

王好問二首

趙大佑一首

邵圭潔一首

鄔仁卿一首

吳邦楨一首

于 未一首

王世懋一首

王錫爵一首

張鳳翼一首

高 濂二首

陳 淳一首

林 章二首

支大綸一首

屠 隆一首

湯顯祖二首

焦 竑二首

王肯堂一首

卓發之一首

楊繼禮一首

徐 渭一首

彭 年一首

夏樹芳一首

趙南星一首

馮 琦一首

袁 黃一首

陳繼儒三首

儲昌祚一首

賀彥發一首

陳

盜字子兼·吳縣人·嘉靖十八年進士·官四川右布政·有已寬堂集·

風中柳

上湖

萬頃平湖勝在吳山高處。兩峯閒、蘆汀鷗渚。隨波蕩漾。見漁舟無數。雲帆外、幾
邨煙樹。茶磨郊臺。千古浮雲去住。越溪中、五湖東注。橋邊楊柳。已條條金縷。
且留連、莫教春去。

萬士和

字思節·宜興人·嘉靖二十年進士·
歷官禮部侍郎·諡文恭·有貴行集·

臨江仙

同楊魏村少
叅登桐君山

睡裏釣臺相失。尋仙且上桐山。亂峰環合碧波寒。笑攜黃鶴伴。來坐白雲間。
二十年前遊處好。趨庭猶憶紅顏。而今狼籍鬢垂斑。西風衰草外。長嘯下松關。

李攀龍

字于鱗·歷城人·嘉靖二十三年進
士·歷官河南按察使·有滄溟集·

長相思

秋風清。秋月明。葉葉梧桐檻外聲。難教歸夢成。
砌蛩鳴。樹鳥驚。塞雁行行天

際橫偏傷旅客情。

周思兼

字叔夜。江南華亭人。嘉靖二十六年進士。官工部員外。出爲廣西提學副使。王元美云。叔夜小詞。咸嫵媚蕭疎。令人自親。

浣溪沙

天上青鸞月下逢。玉窗斜掩影重重。吹簫人在畫樓中。問道綠陰今幾許。兩竿長日舞春風。瀟湘秋色總無窮。

文

彭字壽承。長洲人。官國子監博士。

漁父詞

余有別業在笠澤之上。常課耕於此。偶閱黃太史漁父詞。喜而繼作。

吳淞江上是儂家。每到秋來愛荻花。眠未足。日先斜。妻笑船頭看落霞。

又

夜深結網一燈紅。吹笛鄰舟攪睡濃。雲夜月。雨晴風。都在漁家爛醉中。

王世貞

字元美·太倉人·嘉靖二十六年進士·歷官刑部尚書·有弇州四部稿·

堯山堂外紀·弇州少讀書·駱行簡奇之曰·他日必以文章名世·汪伯玉云·詩如孫武·韓信·用兵·宮嬪市人·無不可陣·詞則沾沾自喜·亦出人一頭地·李于鱗云·惟某敢與狎主齋盟·而小詞弗逮也·

浣溪沙

窗外閒絲自在遊。隔花山鳥弄鞦韆。一庭芳草怨清幽。權把東書鈎午夢起。沾卮釀潑春愁。放教殘日過牆頭。

望江南

歌起處。斜日半江紅。柔綠篙添梅子雨。淡黃衫耐藕絲風。家在五湖東。

重疊金

回文

斷風依約愁砧亂。亂砧愁約衣風斷。無語對燈孤。孤燈對話無。冷香留去影。影去留香冷。思後夢來期。期來夢後思。

虞美人

摩訶池上金絲柳。慣愛纖纖手。折來將表片時心。記取淺黃柔綠淚痕深。博
山香細銀燈吐。乍識黃昏雨。嬌花欲展半鶯紅。錯道褪殘春事罵東風。

又

浮萍只待楊花去。况更廉纖雨。鴨頭虛染最長條。醞造離亭清淚幾時消。珊
瑚翠色新豐酒。解醉愁人否。薄寒攬送汝南雞。偏向碧紗廚畔醒時啼。

漁家傲

細雨輕煙裝小暝。重衾不耐春寒橫。裊盡博山孤篆影。閒自省。天涯有個人同
病。十二巫峰圍畫永。黃鸝可喚梨花醒。雨點芳波揩不定。臨晚鏡。眞珠簌簌
胭脂冷。

河滿子

卵色遙垂別浦。魚鱗淺鰓平沙。小拂東風無氣力。悠揚自在楊花。輕暖輕寒天氣。半村半郭人家。碧貯蓮花露酒。香分穀雨泉茶。呼取自斟還自勸。烏紗任汝欹斜。返照一行歸騎。隔林幾點殘鴉。

玉蝴蝶

記得秋娘家住皋橋西弄。疎柳藏鴉。翠袖初翻金縷。鈎月暈紅牙。啓朱唇、含風桂子。喚殘醉、微雨梨花。最堪誇。玉纖親自濃點新茶。嗟呀。顛風妒雨。落英千片。斷送年華。海角山尖。不應飄向那人家。惹新愁、高樓燕子。賺人淚、芳草天涯。况潯陽、偶然江上。一曲琵琶。

孫

樓

字子虛·常熟人·嘉靖二十五年舉人·官湖州府推官。

念奴嬌

用東坡赤壁懷古韻

紅塵深處。轉愁腸却憶江南景物。鬢鬢雲開梅雨霽。一片蒼崖翠壁。竹裏鳴淙。

松間瀉瀑衣袂飛珠雪。流觴遞詠。山中誰是奇傑。而今歸路迢遙。宦途迢逗。彈劍悲歌發。去住無憑。眠未穩。好夢隨生隨滅。過雁牽情。吟蛩送淚。聽裏堪華髮。青山不負。有時還醉蘿月。

王好問

字裕卿。樂亭人。嘉靖二十九年進士。歷官南京戶部尚書。有春照齋集十一卷。詞附。

趙符庚云。西塘如秋水芙蓉。寒江映月。吳三樂云。西塘詩餘可伯仲有宋。無愧作者。

賀聖朝寄遠

嫋嫋西風歛暝煙。日啣山陰陰。楊柳暗長川。水如天。一別玉京成遠夢。幾經年。錦魚千里爲誰傳。思依然。

點絳脣

春愁

九十春光可憐。長日空辜負。別離情緒。最怕黃昏雨。倚遍樓頭。望斷春歸處。人無語。落花飛絮。又過秋千去。

趙大佑

字世伏·太平人·嘉靖二十八年舉人·官瀘州知州·

菩薩蠻

畫梁雙燕春江曲。翠樓掩映垂楊綠。往事幾憑欄。關山風露寒。綵雲無覓處。回首桃源路。惆悵月華明。新歡舊恨并。

邵圭潔

字伯如·常熟人·嘉靖二十八年舉人·

謁金門

江草碧。又見一年寒食。風雨落花春可惜。捲簾人獨立。十里青山咫尺。兩岸綠楊如織。酌酒賦詩俱未得。浪將光景擲。

鄔仁卿

字汝元·丹徒人·嘉靖三十年舉人·官湘潭縣知縣·

沁園春

招隱看梅

十里江城共向東風尋到梅花。想三更幽夢。悄移石罅。一枝春影。扶上窗紗。鐵

骨峻嶒。冰姿修潔。可是神仙萼。綠華今宵醉。且休吹玉笛。只按紅牙。槎枒綺
席橫斜。恨知己難逢。好句賒。但已擽零落。金鈴莫繫。不甘爭媚。錦幕休遮。冷欲
侵人。清能絕俗。肯讓狂蜂坐晚衙。爭憐惜。怕角聲吹徹。片片飛霞。

吳邦楨

字子寧。吳江人。嘉靖三十年進士。官太僕寺卿。

虞美人

西溪十里漁邨路。猶記看梅處。暗香疏影最關情。更憐雪外一枝橫。雨初晴。
而今別去梅花久。梅好應如舊。風霜媿我漸蒼顏。長教老鶴怨空山。幾時還。

于

未字勵庵。金壇人。嘉靖三十四年舉人。

清江裂石

忽見推簾起暮鴉。風逼小燈斜。又被打牕雪片。巡簷問、可壓梅花。正開釭、初試
屠蘇酒。舉杯誰勸。強半惜年華。縱博得、玉壺香暖。畢竟是天涯。渾一片雲山。

四圍隱隱飛巒帶不起煙霞。驢背歎行頻。墟頭暫醉，料醒來、孤蹤依舊塵沙。正醒醉含愁，猛聽征鴻嘹唳，哀怨過誰家。

王世懋

字敬美·太倉人·嘉靖三十八年進士·官太常寺少卿·有奉常集詞·

如夢令

枝上子規猶鬧門外碧梧誰掃病起不禁秋倚盡小樓殘照寒峭寒峭一夜白蘋天老。

王錫爵

字元馭·太倉人·嘉靖四十一年賜進士第一·歷官吏部尚書·建極殿大學士·諡文肅·有文肅集·

南歌子

遊仙詞

月色依微照雲光淺淡流捲簾同上最高樓試看海天萬里好清秋酌酒金螺小調笙玉指柔更深鶴背冷颼颼勸我今朝且住莫歸休

張鳳翼

字伯起·長洲人·嘉靖四十三年舉人·

如夢令

七夕風雨

狼籍芳筵瓜果。妬煞無情風雨。拆了鵲邊橋。怎把佳期留住。知否知否。一夜淚痕深注。

高

濂

字深甫。杭州人。

沈詞隱云：高深甫詞獨出清裁。不附會於庸俗者。

西江月

情題

有恨不隨流水閒。愁慣逐飛花。夢魂無日不天涯。醒處孤燈殘夜。恩在難忘。銷骨情含空自酸牙。重重疊疊剩還他。都在淋漓羅帕。

風入松

濃煙稠白望中深。雪色雲陰。梅花剩有西冷約。攜樽不負追尋。蕩日冰澌萬頃。搖風玉瘦千林。寒空倚閣費孤吟。坐有知音。一鳥不飛天影黑。微茫山樹俱

沈歌出陽春白雪情憐遠水遙岑。

徐

渭

字文清·更字文長·江陰人·有闕編櫻桃館集·

浣溪沙

湖鑑

淺碧平鋪萬頃羅。越臺南去水天多。幽人愛占白鷗莎。十里荷花迷水鏡。一

行遊女惜顏酡。看誰釵子落清波。

陳淳

字道復·長洲人·監生·

柳塘詞話·王父一泉公過桃山訪白陽山人·白陽贈以詩云·重重煙樹鑲招提·野客來尋路不迷·纔過石橋塵又隔·落花無數鳥爭啼·作孽窠書併詠松浣溪沙以爲壽·王父作三臺令以答之云·酒在孤樹不醉·客來共憩無譁·薄業垂楊江岸·一聲橫竹漁家·今閱喪亂後·而得手蹟于大覺寺僧家·幸也·

如夢令

吟罷小池楊柳。酌盡玉壺春酒。水面正風來。吹亂一天星斗。消瘦消瘦。愁在憑闌時候。

彭

年 字孔嘉·長洲人·布衣·

風入松

元州畫贈素安
聯床夜話圖

雨餘山閣洗炎囂。絳燭頻燒。故人住近攜琴至，豈煩折簡相邀。新瓮景山斟酌，小團鴻漸烹調。畫檐風動響芭蕉。梧竹翛翛。石牀涼思清肌骨。□□紈扇都拋。辨馬極談申旦，聞雞起舞中宵。

林

章

字初文·福清人·
萬歷元年舉人

孤鸞

爲誰拋撇。似海燕初分。林鶯乍別。回首天涯。滿目雲山愁絕。東風不憐春色。把一枝楊花吹折。直恁粘煙帶雨。更盈盈似雪。奈夢兒、相隔恨難說。想昨夜孤衾。今朝雙頰。比這青衫上。有幾重啼血。一聲晚鐘動了。又送人、斷腸時節。莫把琵琶亂撥。正春江潮咽。

更漏子 啼詠

春山愁。秋水怨。鬪下兩行珠串。梅子雨。蓼花霜。長亭十里粧。和月說。因風咽。
一一鶯喉燕舌。帕上點。枕邊聲。聲聲點點情。

夏樹芳

字方卿。江陰人。萬歷元年舉人。有消渴集。

醉落魄

團冰握雪。天公幻箇人。孤潔。最憐誤向風塵撇。貌似春花。命似晚秋葉。酒邊
燈下曾相洽。重逢不耐匆匆別。新來真箇音書絕。歡似浮雲。愁似半殘月。

支大綸

字心易。嘉善人。萬歷二年進士。官奉新縣知縣。有華萃詞一卷。

山花子

楓葉霜催暮色殘。相思人在碧雲間。何處瓊簫吹月下。倚闌干。夢斷雨聲雞
塞遠。愁移花影鳳樓寒。莫恨王孫消息斷。萬重山。

趙南星

字拱極·高邑人·萬歷二年進士·官吏部尙書·諡忠毅·

水龍吟

楊花用章質甫韻

春閨忒恁愁人。已看盡、落紅翻墜。楊花更慘，連空映日，撩人情思。飛過高城，尋來小院，從教門閉。偶蘋風乍定，商量暫住，低飛燕，還扶起。何處疑花亂玉。幾曾堪、髻簪衣綴。蘭閨人倦，多愁牽夢，難成易碎。小玉聲喧，晴天雪下，香塔無水。憶遼西何處，神魂蕩漾，暗拋紅淚。

屠

隆

字長卿·鄞縣人·萬歷五年進士·官禮部主事·有由拳集·

清江裂石

湖西

淼淼重湖背郭斜。永日坐蒹葭。四面山青不斷，樓閣外，亂水明霞。有畫船、錦纜載詞客。金翹雜珮，強半挾吳娃。水窮處，長林古寺，夏木綠陰遮。回首望空明。白鷗隱隱飛來，帶一片輕沙。把酒問西湖，今來古往，都不管，興亡舊恨年華。且

與君權扁舟。聽取哀絃急。筑散髮弄荷花。

馮琦

字用韞。臨川人。萬歷五年進士。歷官禮部尙書。諡文敏。有北海集。

如夢令

竹外瑤華千頃。更與素梅掩映。雙雀噪寒枝。蹴落飛花無影。相並相並。明月驚
棲不定。

湯顯祖

字義仍。臨川人。萬歷十一年進士。官禮部主事。有玉茗堂詞一卷。柳塘詞話。義仍精思異彩。見於傳奇。出其餘緒。以爲填詞。後人詠其迴文。必指爲義仍傑作也。

好事近

簾外雨絲絲。淺恨輕愁碎滴。玉骨近來添瘦。趁相思無力。小蟲機杼隱秋窗。黯淡煙紗碧。落盡紅衣池面。又西風吹急。

阮郎歸

不經人事意相關。牡丹亭夢殘。斷腸春色在眉彎。倩誰臨遠山。排恨疊怯衣。
單花枝紅淚彈。蜀妝晴雨畫來難。高唐雲影間。

袁

黃 字坤儀·嘉善人·萬歷十四年進士·官兵部郎中·

鷓鴣天

題村叟
屋壁

數疊煙林散翠鬟。莫嫌此地少青山。酒逢社日添酬應。花到開時費往還。松
老大竹平安。柴門雖設不曾關。旁人方訝茅齋窄。鶴柵蜂房割半間。

焦

竑 字弱侯·上元人·萬歷十七年賜進士第一·官修撰·有澹園集·

菩薩蠻

梅花坐對天如水。月明千里人千里。莫上最高樓。長江生別愁。百年今夕會。
且共罇前醉。明日又離歌。天涯奈爾何。

江神子

西風吹袂弄新晴。月籠明。小梅橫。席上孤琴。又作斷腸聲。人去青山衰草裏。憑誰共。遶花行。強拈綵筆賦離情。憶平生。到深更。欲寫年來意思。苦難成。但把深杯留客醉。知何日。笑相迎。

陳繼儒

字仲醇。江南華亭人。有晚香堂詞二卷。

柳塘詞話：眉公早歲隱於九峯。工書畫。與董宗伯其昌善。爲延譽公卿間。每得眉公片楮。輒作天際真人想。但傳其居佘山。只吟咏過日。不知宏景當年。松風庭院中。作何生活。其小詞瀟灑。不作豔語。

攤破浣溪沙

梓樹花香月半明。棹歌歸去草蟲鳴。曲曲柳灣茅屋矮。挂魚罾。笑指吾廬何處是。一池荷葉小橋橫。修竹紙窗燈火裏。讀書聲。

又

蜂欲分衙燕補巢。陰陰落葉遍江皋。一陣窗前風雨到。打芭蕉。驚起幽人初

睡午茶烟繚繞出花梢。有箇客來琴在背。度紅橋。

浪淘沙

風雨霎時晴。荷葉青青。雙鬟捧著小紅燈。報道綠紗窗底下。蕉月分明。枕簟
嫩涼生。茉莉香清。蘭花新吐百餘莖。撲得流螢飛去也。團扇多情。

王肯堂

字字泰·金壇人·萬曆十七年
進士·歷官福建布政司參政·

多麗

步花陰。滿園春色飄零。過橫塘、曲闌斜折。崎嶇轉入荷亭。坐無聊。起看畫障。行
還倦。閒撥爐薰。暗覺聲喧。微窺影亂。映門一線露羅裙。雙扉啓。縞衣翠袖。相簇
度銀屏。霎時見。虛窗雪豔。素壁霞明。細看伊蓮隨步起。果然蘭並肌芬。臉盈
盈。疑開蛤帳。腰細細。堪試香塵。膩髮盤雲。修眉偃月。珊瑚一顆蹙朱櫻。擎檠處。
春纖如削。渾是玉雕成。臨別去。流波迴覷。障面笑狂生。

儲昌祚 字肩宇·宜興人·萬歷十七年進士·官四川按察司僉事·

清平樂 春雪

雪眠風掃飄泊知多少。盼斷天涯春色杳。一夜青山都老。金猊桂橐重燃烟。
籠修竹千竿。只有梅花添恨。幾枝早落階前。

卓發之 字左車·仁和人·

王阮亭云·左車詞尙駿逸·頗有宋人風味·至珂月而格調尖新·語意儼側·極詞家之變態矣·

菩薩蠻 落花

小玉樓前風雨急。春光一霎都狼籍。桃葉與桃根。誰家最斷魂。
昨夜花成浪。總是雨收時。月明空滿枝。尊前回首望。

賀彥登 丹陽人·

菩薩蠻

綠窗擁被鶯呼醒。紅雲微皺愁難整。檀炷裊薰籠。羅衣三兩重。流蘇休便揭。欲起愁無力。楊柳小腰肢。春來瘦不支。

楊繼禮

字彥履·婁縣人·萬歷二十年進士·官右諭德·

浪淘沙

錦席綺筵重。蘭炷香濃。隔簾鸚鵡喚秋風。六曲闌干頽玉處。夢到巫峰。金縷翠雲中。寶髻輕鬆。綠窗月色正朦朧。說到飛觴傳永夜。怕聽飛鴻。

明詞綜卷五

青浦 王昶 纂

李日華一首

查應光一首

范鳳翼一首

支如玉一首

吳 充一首

費元祿一首

俞 彥二首

王 衡二首

吳宗達一首

雷 迅一首

魏大中一首

陳翼飛一首

吳宗儒一首

焦源溥一首

方于魯一首

錢士升一首

錢繼登一首

魏浣初一首

王坊一首

張名由二首

莫是龍一首

張瑋一首

吳鼎芳二首

施紹莘八首

顧同應二首

范文光一首

徐石麒一首

劉榮嗣一首

阮大鍼一首

鄭士奇一首

黃承聖一首

徐勗一首

彭紹賢一首

馬洪四首

董斯張一首

馮盛世一首

孫茂芝一首

王屋一首

葉紹袁一首

陸錫明一首

汪 膺三首

范 汭一首

汪廷訥一首

李日華

字君實·嘉興人·萬歷二十年進士·
官太僕寺少卿·有紫桃軒雜綴·

玉樓春

題柳洲待別圖·
送劉躍如·

輕暖輕寒無意緒。朝來幾陣梨花雨。粧成獨自倚闌干。暗數落紅愁不語。

杜

宇一聲人欲去。殘雲片片依沙渚。橫塘十里柳煙濃。維舟正在煙深處。

查應光

字賓王·休寧人·萬歷二十五年舉人·有麗崎軒詞一卷·

浪淘沙

白髮亂侵頭。嬾上高樓。朦朧新月曲如鉤。檻外蘋風驚乍起。暑氣潛收。

漲迴流。喜泛輕鷗。蓼花一望滿汀洲。正好開襟延賞處。無限新秋。

宿雨

范鳳翼

字異羽·通州人·萬歷二十六年進士·歷官光祿寺少卿·有勳卿集·

王阮亭云·勳卿白狼蒼頡·所著小詞·曠冽似半山·而風味過之·

減字木蘭花

邗江歸思

晴雲如絮。霎時飛入銀河去。露洗遙空。廿四橋頭一笛風。客窗無暑。片霎芳

塘清曉雨。月冷邗溝夢破。狼峰絕頂秋。

支如玉

字寧瑕·嘉善人·萬歷二十八年舉人·官刑部主事·有半衲庵集·

酷相思

新柳月痕初墜。恨春鳥、催人起。想盟言、花片隨波逝。欲住也、留無計。印舊添
新衣上淚。左右拚憔悴。問九峰、桃李曾開未。人遠也、書難寄。春盡也、愁難寄。

吳

兗 字魯于·武進人·萬歷二十八年舉人·

漁歌子

千頃蒹葭一釣翁。家居南浦小橋東。桃花水。鯉魚風。短笛橫吹細雨中。

費元祿

字無學。錫山人。有秀甲集。

賀新郎

瑞腦燒金鼎。捲重簾、庭陰正午。畫堂人靜。春落天涯知何處。糝地楊花飛盡。印玉枕、流鶯催醒。梅雨紗窗寒欲透。更長年、三月厭厭病。愁不語、懶窺鏡。江南舊事須重整。隔花陰、傳消寄息。月娥難倩。夢斷秦樓相思久。芳草佳期未準。倚徧了、梧桐金井。蝴蝶已歸煤麝冷。枉教人、揉碎丁香影。誰共我、步香徑。

俞彥

字仲茅。上元人。萬歷二十九年進士。歷官光祿寺少卿。

花草蒙拾。俞仲茅小詞云。輪到相思沒處辭。眉間露一絲。視易安纔下眉頭。又上心頭。可謂此兒善盜。詞衷。少卿刻意填詞。工於小令。持論極嚴。且以刻燭廣唱爲奇。不無率露語。至其備審源委。不趨佻險。而遵雅淡。獨見典型。

長相思

明詞綜 卷五

九五

折花枝△恨花枝△準擬花開人共卮△開時人去時△
怕相思△已相思△輪到相思沒
處辭△眉間露一絲△

鷓鴣天

瓶梅

淺渚明沙聚碧流△依然春信鎖枝頭△金徽昨夜初賡曲△羌笛何人更倚樓△朝
露重△晚煙浮△幾回花下月如鉤△而今貯向紗窗裏△點點寒香入夢愁△

王

衡字辰玉·太倉人·萬歷二十九年進士·官編修·有緱山集·

點絳脣

送陳仲醇

濕夢沉沉△芭蕉雨響燈花卸△月兒來也△人又隨潮下△
最怕登高醉面秋風灑△
紅堪把△茱萸看罷△半刻重陽假△

如夢令

蘆鴈

風起蘆花如醉△歷歷鴈行成字△一點一聲寒△霜重曉楓羣碎△知未知未知△只在淺

深沙際。

吳宗達

字青門·武進人·萬歷三十二年進士·官大學士·諡文端·

滿庭芳

蕉長青箋。筍抽斑管。悶懷欲寫無多。鸞臺鳳閣。心事久蹉跎。小構數篆茅屋。但
傍取千頃澄波。扁舟繫酒筒茶竈。隨意泊煙蘿。知音三兩客。朝朝暮暮。百徧
相過。判冷吟閒醉。雅謔狂歌。風雨不妨閉戶。凭欄處。嫩蕊柔柯。君知否。才情標
格。千載憶東坡。

雷迅

字聖肅·青浦人·萬歷三十四年舉人·官夔州府推官·

蘇幕遮

春惜

柳含絲。梅破萼。報道東風。一夜穿簾幕。春光依舊人非昨。忽訝春光。不是人情
薄。花前醉月下樂。只恐韶華。易去難留閣。明朝雨暗胭脂落。莫怨春光。不管

人消索。

魏大中

字孔時·嘉善人·萬曆三十五年進士·歷官吏科給事中·諡忠節。

臨江仙

錢唐懷古

埋沒錢塘歌吹裏。當年卻是皇都。趙家輕擲與強胡。江山如許大。不用一錢沽。只有岳王泉下血。至今泛作西湖。可憐故事眼中無。但供儂醉後。囊句付奚奴。

陳翼飛

字元朋·平和人·萬曆三十八年進士·官宜興縣知縣·有慧閣集。

字字雙

戊婦

長城飲馬嘶復嘶。古木寒雅棲復棲。空牀獨守啼復啼。從軍蕩子西復西。

吳宗儒

字次魯·休寧人·有巢雲軒集。

如夢令

春暮別張允升

花落春歸時節滿。日楊花飛雪。杯酒幾多情。愁對東風話別。聲咽。聲咽。去後相思啼鳩。

焦源溥

字涵一。三原人。萬歷四十一年進士。歷官僉都御史。巡撫大同。殉國難死。

王阮亭云。豹人述中丞殉難事甚烈。爲選小詞登之。正如陳了翁、文信國、諸公。令讀者愛其寸璣殘璧也。

醉花陰

紅綴繁枝鶯語巧。弱柳和煙裊。玉勒慢尋芳。踏徧東皋。滿眼青青草。煙岫重
重霞氣表。無數山花繞。古寺梵音沉。曲徑疎籬。纔信郊居好。

方于魯

字建元。歙縣人。有佳日樓詞一卷。

臨江仙

曹載信來訪山中。偕飲溪上酒家。

小市橋橫堪繫馬。雙溪水暖浮鷗。青帘風亞酒壚頭。垂楊當戶牖。芳草帶煙流。
千里故人雞黍約。百錢挂杖登樓。竹林把臂及春遊。休嗟逆旅客。且作醉鄉

侯。

錢士升

字抑之·嘉善人·萬歷四十四年賜進士
第一·歷官太子太保文淵閣大學士·

滿庭芳

次東
坡韻

往事千端閒愁萬斛。世情無數嵯峨。電光石火，變態閱來多。坐見新亭洒淚，空回首，麥秀興歌。方悟得，金羈脫去，細草落平坡。桃源何處是，忙呼漁艇，來往如梭。長消受寒蘆。皓月銀波。更喜蘋香菱熟，駕舴艋，閒傍蒼柯。何多事，羊裘五月，江上好披蓑。

錢繼登

字龍門·嘉善人·萬歷四十四年進士·官饒州府知府·有壑專堂集·

浣溪沙

蟬避濃炎靜不譁。東憐伊軋線絲車。豆棚瓜架野人家。翠莢嫩堪浮茗氣，黃雞肥欲待薑芽。閒搔短髮日西斜。

劉榮嗣

字敬仲·曲周人·萬歷四十四年進士·歷官工部尚書·有半舫集·

長相思

山悠悠。水悠悠。水遠山長湘渚秋。衡陽天盡頭。
風滿舟。雨滿舟。細雨斜風生暮愁。誰登江上樓。

魏浣初

字仲雲·常熟人·萬歷四十四年進士·歷官廣東提學參政·有四如山樓集·

望江南

江南憶。佳味憶江鮮。刀鱗霜鱗婁水斷。河豚雪乳福山船。齊到試燈前。

阮大鍼

字集之·懷寧人·萬歷四十四年進士·歷官兵部尚書·

減字木蘭花

春光漸老。流鶯不管人煩惱。細雨窗紗。深巷清晨賣杏花。眉峯雙蹙。畫中有
幽人如玉。小立簷前待燕歸來。始下簾。

王

坊字元表·江南華亭人·萬歷四十年舉人·官信陽州知州·

一斛珠

花落

翻空紅雨多。隨春信紛紛去。萬千綠葉無情緒。連夜生新。占盡花開處。一霎辭根無定所。傷心紅粉成黃土。憐香只有鶯啼樹。似勸東風。略做些兒主。

鄭士奇

字平子·嘉興人·萬歷四十六年舉人·官興國縣知縣·

百字令

自述用
東坡韻

先生拂袖賦歸來。曾見義熙人物。老去懶搖白羽扇。只愛青林石壁。坐引桐風。書研竹露。詩淨峨眉雪。山中皓首。那知世上豪傑。自笑癡興還濃。紫芝採就。高詠林間發。午後松濤翻雪乳。片縷茶煙明滅。世事如棊。臣心似水。老濯滄浪髮。寒梅吹綻。一林香影明月。

張名由

字公路·嘉定人·諸生·有張公路集八卷·詞附·

清平樂

綠楊陰裏桃徑吹紅雨。金勒玉驄何處去。滿目天涯飛絮。別離情緒難禁。餘香猶在羅襟。盡日翠鈿慵整。菱花暗襲芳塵。

南歌子

夏新

晚霽收梅雨。輕陰舞楝花。前林煙縷暖殘霞。平蕪雙燕飛去受風斜。悵望迷南浦。愁心水一涯。滿溝新漲澆田家。不勝聒耳青草有鳴蛙。

黃承聖

字奉倩。太倉人。有蘿窗詞一卷。

霜天曉角

春日小窗獨坐聞鷓鴣聲有感

淒涼曉色。衣帶雲英濕。芳草春來破凍。闌干外。一痕碧。鷓鴣聲正急。綠窗人怨泣。休向東皇訴恨。狂風在。女牆側。

莫是龍

字雲卿。以字行。更字廷韓。江南華亭人。以諸生貢入太學。

青浦詩傳云·雲卿爲方伯如忠子·幼而聰慧·工詩詞·又善書畫·以貢入太學·時稱翩翩佳公子·王道思贈以詩云·風流絕世美何如·一片瑤枝出樹初·畫舫夜吟留客駐·練裙晝臥有人書·又嘗作送春賦·皇甫汙稱之曰·以翔鸞羸鳳之勢·橫行雲滯雨之情·王世貞云·若阿嬌出長門·小玉枕臂·掩泣殊不勝情·惜勿令少年見之·年三十而歿·

清平樂

春光已半。無語空腸斷。亭院落花脂粉亂。掃卻坐來還滿。玉關消息難憑。機頭錦字初成。愁似故園芳草。東風一夜還生。

徐

爌 字與公·閩縣人·布衣·有鼇峯集·

望江南

城上角吹動。薜蘿煙。別意難忘燈下約。歸期空向夢中傳。消息杳如年。孤館客。今夕不成眠。萬井寒砧敲夜月。數聲黃葉墜秋天。人在碧雲邊。

張

瑋 字韋玉·武進人·萬歷四十七年進士·官左副都御史·諡清忠·

雙雙燕 秋日過
橫山堂

披蓬探隱到幽草。溪頭碧陰山曲。竹韻松姿媚。卻吟眸詩腹。是處翠峯成簇。更
新秋雨涼如沐。深林宛轉芳禽淺澗瑤漱玉。孤獨簡編娛目。有紉佩芳蘭。
供食茂菊。藤牀閒憩。夢入華胥應樂好。是月明簾軸恰一枕清酣睡足。小小花
童低報瓦鼎烹茶剛熟。

彭紹賢

字孔嘉。海鹽人。萬歷
間官參將。有擊壺集。

浣溪沙

途次
有感

曉發離亭春日遲。暖風陣陣弄遊絲。嫩黃吹上去年枝。別恨陡隨芳草遠。歸
心先被杜鵑知。落花無賴點征衣。

吳鼎芳

字凝父。吳縣人。
後爲僧。號唵。

梅墩詞話。吳凝父有春游曲云。雨餘芳草綠新齊。亭榭無人
絲幕低。忽慢好風傳語笑。流鶯飛過杏花西。則詩亦詞也。

惜分飛情閨

紅界枕痕微褪玉。喚起那禁幽獨。好鳥啼春足。歸期不準花鬢卜。盡日眉峯
雙凝綠。十二繡簾低軸。人在闌干曲。楊花却羨無拘束。

虞美人

海棠不礙牕紗影。鬢鞦鴛鴦領。繡棚吹落唾花紅。但見餘香一點裊晴風。柳
眠無力輕煙惹。春色撩人也。羅衫閒搭畫闌邊。日暖融融好箇洗頭天。

馬

洪字浩瀾·仁和人·有花影集三卷·

詞品·馬鶴窗善咏詩·尤工長短句·雖皓首韋布·而含吐珠玉·錦繡胸腸·
斐然若貴介王孫也·詞名花影·蓋取月下燈前·無中生有·以爲假則真·謂
爲實猶虛之意·徐伯齡云·鶴窗與陸清溪同出劉菊莊之
門·清溪得詩律·鶴窗得詞調·異體齊名·可謂盛矣·

少年遊

弄粉調脂。梳雲掠月。次第曉粧成。鸚鵡籠邊。鞦韆牆裏。半晌不聞聲。原來卻

在瑤塔下。獨自踏花行。笑摘朱櫻。微揜翠袖。枝上打流鶯。

行香子

紅遍櫻桃。綠遍芭蕉。鎖窗深、春思無聊。雙飛燕懶。百轉鶯嬌。正漏聲遲。簾影靜。篆香飄。惜月前宵。病酒今朝。有誰知。臂玉微銷。封題錦字。寄與蘭翹。恨樹重重。雲渺渺。水迢迢。

滿庭芳

花落

春老園林。雨餘庭院。偏惹蝶駭鶯猜。薦紅皺白。狼籍滿蒼苔。正是愁腸欲斷。珠箔外。點點飄來。分明似。身輕飛燕。扶下碧雲臺。當初珍重意。金錢競買。玉砌新栽。更翠屏遮護。羯鼓催開。誰道天機繡錦。都化作。紫陌塵埃。紗窗裏。有人憐惜。無語托香腮。

東風第一枝

梅花

餌玉餐香。夢雲惜月。花中無此清瑩。儼然姑射仙人。華珮明璫。新整五銖衣薄。應怯瑤臺淒冷。自駢鸞。來下人間。幾度雪深煙暝。孤絕處。江波流影。顛顛也。春風銷粉。相思千種。閒愁聲聲翠禽啼醒。西湖東閣。休說當時風景。但留取一點芳心。他日調羹翠鼎。

施紹莘

字子野。青浦人。有花影詞四卷。

青浦詩傳云。子野少負雋才。作別業于柳上。又營精舍于西余。極煙波花藥之美。時陳眉公居東余。管絃書畫。兼以名童妙伎。來往嬉遊。故自號浪仙。亦慕宋張三影所作樂府。著花影集行世。

如夢令

日約樓陰初整。風暖煙消人靜。早起未梳頭。閒埽小園芳徑。清淨清淨。只剩數枝花影。

浣溪沙

半是花聲半雨聲。夜分浙瀝打窗檣。薄衾單枕一人聽。密約不明渾夢境。佳期多半待來生。淒涼情況是孤燈。

菩薩蠻

春深加倍心情惡。慵歌懶笑梳粧薄。獨自掩窗紗。鶯啼訴落花。夢回剛拭淚。偷立秋千背。風起亂紅飛。不知雙淚垂。

點絳脣

御橋次韻

寺枕荒塘。時時雪浪吞僧屋。橋頭路曲。廢井當枯木。如此幽閑。恰好閑人宿。窗敲竹。酒醒茶熟。天水鸚哥綠。

浣溪沙

夜月

如鏡窺粧逗小樓。眞珠簾外半痕收。倒簪花影上人頭。品得秦箏初度曲。花前和露耍鞦韆。柳絲濃翠拂鞋鈎。

又

愁臥寒冰六尺藤。懶添溫水一枝瓶。亂雞啼雨要天明。等得夢來仍夢別。甫能驚覺又殘燈。西江別路繞圍屏。

謁金門

春欲去。如夢一庭空絮。牆裏鞦韆人笑語。花飛撩亂處。無計可留春住。只有斷腸詩句。萬種消魂多寄與。斜陽天外樹。

滿庭芳

夏初

樹染橙香。花燃榴火。曲池蓮蓋初張。槐陰半畝。引起竹牀涼。門靜閑花自落。小園中。無數新篁。凭欄久。閑調鸚鵡。摘葉戲螳螂。日長。真似歲。輕施冰簟。閒夢羲皇。正孤蟬吟樹。乳燕依梁。且喜黃梅過也。建蘭開。囉芥茶香。東齋晚。一壺村酒。新月上松窗。

董斯張

字遐周·烏程人·監生·有靜嘯齋詞一卷·

柳塘詞話·潯上董遐周與周永年、茅維爲詞友·周有懷響齋詞·茅有十齋堂詞·而遐周詞並不隨人口吻·陳黃門大樽謂其風流調笑情事如見者也·

鵲橋仙

感悟

輕暖輕寒。不晴不雨。辜負韶光九十。
落花飛絮兩無情。仗千尺、遊絲作合。
塗抹東西。飄零南北。從此扁舟一葉。
夢回始覺未歸休。恨一點、窺人明月。

顧同應

字仲從·崑山人·萬歷四十三年副榜·子炎武·

柳梢青

螢

六曲窗紗。夜涼如許。秋在誰家。
簾外星移。屋梁月墮。逗得些些。
玉階悄憶年華。曾幾照、釵橫鬢斜。
長信宮閒。摩訶池冷。光黯秋花。

浪淘沙

生小教人憐。嬌孽瑤牋。春來獨自在窗前。
謝女簾櫳飛柳絮。秀句先傳。香夢

逗春煙。一晌留連。吟情多半爲花牽。還憶從郎徵險韻，譜入冰絃。

馮盛世

字念羅·嘉善人·天啓元年貢生·官鎮海衛訓導。

感皇恩

詠鏡

有福共嬋娟。相依白首。看拂雙蛾似垂柳。此中何處。有個人兒。爭瘦。笑效顰難效。腸迴九。春塵飛處。有時昏黝。洗面還同美人鬪。芙蓉映入。疑是瀟湘清瀏。怪東風起處。吹難皺。

范文光

內江人·天啓元年舉人·歷官僉都御史·巡撫川南·後殉難死。

浣溪沙

再贈梁姬文正

夙世剛修半面緣。西風吹上五湖船。秋來瘦骨倍堪憐。癡想只教魂孟浪。閒情空對影留連。相思同入藥鑪煎。

孫茂芝

字若英·嘉善人·天啓元年副榜·官沔陽州同知。

蝶戀花

春暮

柳絮捲將春色去。芳草多情。別作娛人具。寶馬香車忙不住。鞦韆正在陰濃處。
蝶趁蜂交隨滿路。畫扇輕衫。逐處人爭聚。若個醒然歸可據。酒香一路青松樹。

徐石麒

字寶摩·青浦籍·嘉興人·天啓二年進士·歷官刑部尙書·明亡·殉節·國朝賜諡忠懿·

拂霓裳

望中原。故宮錦樹障烽煙。驚坐起。涼宵夢斷蔣陵前。金人傾寶露。玉女繡苔錢。
問當筵。誰能醉鼓漸離絃。西臺哭罷。三戶裏。識遺賢。欷皂帽。吹簫乞食總堪憐。
英雄身未死。屠釣技常連。又何顏。許青門瓜種故侯田。

王

屋字孝峙·嘉善人·有草賢堂詞十卷·

臨江仙

顧四城北新居

獨訪柴門深竹裏。板橋流水斜通。漁舟泊處暮雲重。數家橫浦上。一徑入煙中。
叢木暗妨樵路遠。鶯鶯飛破霞紅。輕雷隱隱小池東。藕花鮮着雨。菱蔓弱牽風。

葉紹袁

字仲韶。吳江人。天啓五年進士。官工部主事。後爲僧。

梅墩詞話：葉天寥水部詞。偶見其浣溪沙云：銀粉畫雲乾蝶夢。繡鍼拋雨溼鵲愁。冶笑博開雙臉白。春愁不上小眉青。先輩遂有此新豔過人之句。其詞三十三首。名遷聊集。

水龍吟

寫懷

寂寥蘋渚蘅皋。道書讀罷香銷篆。松聲人坐。藥欄紅亞。美人蕉。極目平蕪。天高水遠。蓮歌遊遍。且藤壺汲煮。青衣小袖。點取鳳團香片。自把秋棠手洗。粉牆西。翠梳新鈿。開簾風動。畫屏琴石。輕陰滿扇。挹酒盈尊。摘花侵暝。夜涼迎面。更堪娛又有。椒篇絮句。麗詞常見。

陸錫明 字幼輿·平湖人·天啓五年
進士·官江西提學副使·

點絳脣 琵琶

三尺冰絃。夜深彈破青天竅。意中人杳。只有清光到。
蘆荻蕭蕭。都入相思調。愁懷抱。嫦娥心照。訴與伊知道。

江 膺 字元御·長洲人·天啓七
年舉人·有寸碧堂集·

浣溪沙

薄薄香雲穩稱肩。鳳頭剛襯小紅箋。揭來堤畔蹋輕煙。
烏學新聲窺翠幃。蝶
知芳氣上花鈿。箇人何處不堪憐。

又苦
雨

宿雨酣花黯未收。綠漪新漲小鱗浮。柳綿欲下不成毬。
飛沫卷珠過水面。濕
煙拖雨上雲頭。多情強半爲登樓。

范

汭 字東生·烏程人·
有范東生集·

望江怨

蘭房曉。絡緯繅絲聲未了。一霎愁多少。桐陰斜壓闌干。小人悄悄。羅幕手慵開。惟恐驚棲鳥。

汪廷訥

字昌朝·
新安人·

玉樓春

春懷
迴文

畫圖開處飛鶯燕。新漲春湖垂柳線。架書淹日盡窮搜。下幃孤坐碁彈倦。掛簷晴翠山當面。如如悟卻忘欣厭。瀉玉寒泉遶石臺。夜中歸鶴棲松院。

明詞綜卷六

青浦王昶纂

馮鼎位五首

葛一龍一首

茅維一首

卓人月一首

湯傳楹四首

楊士聰一首

萬壽祺一首

支如增一首

劉侗一首

路邁一首

吳本泰一首

錢繼章四首

歐陽鉉一首

陳子龍十七首

方大猷一首

錢榛一首

夏允彝一首

來集之一首

單恂二首

黃周星一首

周世臣一首

王彥泓一首

金俊明一首

錢應金二首

方以智一首

萬日吉一首

呂福生一首

沈案一首

宋存標一首

馮鼎位

字素人·江南華亭人·崇禎元年拔貢生·官待詔·

南鄉子

花朝

曉霧如煙△。輕寒細雨嫩晴天△。紅杏枝頭鶯對語△。飛去△。昨夜玉人春夢處△。

減字木蘭花

長亭淒絕。去歲傷秋曾送別。楊柳灣頭。一曲煙波一曲愁。高城何許。正在歸鴻欲沒處。滿袖西風。人倚朱闌第幾重。

鹽角兒

半春

春分過也。小樓昨夜。棠梨花謝。章臺折柳。西園拾翠。暗香隨馬。午風輕。鶯聲乍。盈盈侶。秋千初罷。再相約。黃昏踏月。牕下綠蛾重畫。

攤破浣溪沙

行郊

遲日青驄緩轡行。輕寒輕暖弄春晴。細草平沙花夾道。有啼鶯。嫩綠翻風煙樣軟。小溪過雨鏡般明。歸近黃昏新月起。晚霞生。

子夜歌

上西樓。曲屏暮靄。記得燭花紅處。自心字香消。彩雲飛散。萍蹤難聚。春水畫橋。煙溪芳草。夜夜相思路。悵重來。情事依然。惟有半簾淡月。照人離緒。酒闌後。

無聊短夢。尙逐紫簫聲去。楊柳梢頭。寒梅影裏。曾看弓彎舞。想章臺信杳。淒涼
京兆眉嫵。啼帕遺紅。唾裙留碧。憔悴鶯花主。倩誰傳。桃葉桃根。斷腸新句。

葛一龍

字震父。吳縣人。官雲南布政司理問。

憶王孫

春風吹後滿天涯。繫馬高樓春日斜。歸夢悠揚隔柳花。不如他。一路青青直到
家。

茅

維 字孝若。歸安人。

柳塘詞話。盛明以帖括之餘。而涉爲詩詞者。十不一工。孝若獨浸淫于古。其詞以宋人爲圭臬。而才情又橫放傑出。故一時豔稱之。

浣溪沙

顧默孫納姬

四月陂塘水半扉。姬人梳裹入羅幃。佛樓先禮六銖衣。花午枕拋紅印起。月
斜爐遠篆煙微。百花深處玉郎歸。

卓人月

字珂月。仁和人。有寤歌詞十二卷。

花草蒙拾·卓珂月自負逸才·詞統一書·蒐采鑒別·大有廓清之力·乃其自運·去宋人門廡尙遠·王言遠云·藥澗於詞家·有意出新·獨闢生面·但于宋人蘊藉處·不無快意欲盡之病·

瑞鷓鴣

湖上元

城中火樹落金錢△城外湖波起碧煙△夜夜夜深歌子夜△年年年節度丁年△玻

璃一段湖稱聖·琥珀千鍾酒號賢△自分嬾追兒女隊·玉梅花下拾花鈿△

湯傳楹

字卿謀·吳縣人·諸生·有湘中草一卷·

柳塘詞話·湯子卿謀多才早天·著賓病秋箋·卿謀死·其友尤悔菴爲文哭之·并爲刻湘中草·小詞特多秀發之句·陸靈長云·卿謀風神俊美·人比之杜宏治·衛叔寶·配丁氏·亦有林下風·每日暮相與登南樓·燒燈置酒·援豪微咏·旦則成之·詩詞皆幽豔·故其散曲云·秋色冷·曉聽明△淺立銀屏弄玉箏△綵筆題殘無處贈·粧臺畫出小眉青△

菩薩蠻

垂楊解帶圍青閣。暖風微拂金鈴索。燕子不知愁。銜花上小樓。璧車牽夢去。江草縈心住。酒困未全蘇。春光一半無。

阮郎歸

玉臺曉鏡試輕涼。薄施秋水粧。空庭對影怯昏黃。微風吹霧裳。珮洛浦。髻巫陽。憑闌問海棠。夜深多露倚誰旁。折來伴綺窗。

鷓鴣天

一片傷心花影重。美人初出曉雲宮。簾前泥落常憎燕。髻側花搖數避蜂。鈎月翠。暈潮紅。倚煙欺雨咒東風。碧紗窗掩喁喁處。塞北江南春夢中。

風流子

西山
晚眺

東風吹細雨。斜陽外。芳草未曾休。奈錦纜牙檣。香車寶馬。還春舊例。誰事清遊。聊爾爾。去攜金谷酒。來泛木蘭舟。雲脚垂青。煙梢漲綠。吟魂欲斷。望眼頻收。

長堤共搔首。看晚山無數。圍住閒愁。度盡籃輿逕裏。柳岸橋頭。看二分詩料。一肩林影。兩行歸客。幾曲春洲。人逐飛鴉爭渡。月在中流。

楊士聰

字朝徹·濟寧人·崇禎四年進士·官左諭德·

阮郎歸

秋

風吹黃葉客心驚。暗雲秋雨生。青山飛鶴入樓輕。標搖連暮聲。沾壘潤。灑溪清。疎煙藏橘橙。江天千里一樽傾。蕭蕭白髮更。

萬壽祺

字年少·徐州人·崇禎三年舉人·有隰西草堂集·

眼兒媚

贈下
核書

花弄香紋春滿樓。桃葉引江流。箇人何事。斜陽獨倚。曲曲腸柔。垂簾淡淡撲楊毬。私心好處投。侍兒斂態。閉門作意。不上金鈎。

支如增

字小白·嘉善人·崇禎三年副榜·

如夢令

春風

又見東風吹遍歲歲擾儂庭院。皺了綠萍紋。又皺却桃花面。埋怨。埋怨。忽地暗將人換。

劉侗

字同人。麻城人。崇禎七年進士。除吳縣知縣。未任卒。

王阮亭云。同人帝京景物一書。詮志輿軼。爲善長水經註之繼。填詞是其餘技。亦非纖宕者可比。

金菊對芙蓉

壁書

華紫移楓。荷香在桂。又成一種風光。正輕寒氣候。好整衣裳。幾時送却堂前燕。計雲程。故國煙茫。遊人何事。獨勝秋色。猶帶他鄉。空有迴文錦句。儘聽殘白露。捱過重陽。任青樓賞遍。酒水歌長。千里平安慵啓帙。都忘却。家在湖湘。蘆蓼池塘。芙蓉亭沼。橘柚垣牆。

路邁

字廣心。宜興人。崇禎七年進士。

浪淘沙

暮春
閨思

花柳漫凝眸。誰與同遊。曉粧無力倚珠樓。望斷天涯眉黛鎖。減盡風流。燕舞
觸簾鉤。絮語輕柔。纖纖閒整玉搔頭。怕聽子規啼不住。攪動離愁。

吳本泰

字藥師。錢塘人。崇禎七年進士。
官吏部郎中。有綺語障一卷。

滿江紅

和王
昭儀

白雁南飛。搖落盡、漢宮秋色。笳吹起、霓裳聲斷。絳河仙闕。翡翠巢空金殿裏。鴛鴦瓦碎瑤臺側。憶春風、拂檻露華濃。都銷歇。塵黯淡。燈明滅。蛩語似、支離說。怨琵琶空抱。杜鵑啼血。戍柝驚回雞帳夢。玉容羞照龍沙月。莫悲傷、環子繫羅衣。君恩缺。

錢繼章

字爾斐。嘉善人。崇禎九年舉人。有菊農詞一卷。

柳塘詞話。魏里錢爾斐。五十三年填詞手也。曾貽我菊農長短句。見其編以歲月。感慨係之。其詞亦整而有法。

浣溪沙

春盡園林褪鬧紅。陰陰靜綠意從容。鬢眉俱碧住山翁。
花捲半堦通履舄。柳開一面出簾櫳。管人閒事是東風。

又

睡損眉黃澹未添。鳳屏殘麝透花尖。下階幽夢背人占。
柳外疎鶯聲睨睨。竹邊歸燕語呢喃。斜風細雨隔重簾。

浪淘沙

雪意壓山尖。故故相黏。繞籬敗葉夜重添。不見黃花開一點。孤負陶潛。悶坐
了無歡。舊恨新拈。西風一霎捲茅簷。欲買秋光無計可。笑拾榆錢。

謁金門

斜陽促。彌望暮煙修竹。弱柳堤邊芳草屋。一汀雲影簇。
趁取晚涼新浴。碧檻

薄垂冰穀。小院落花香斷續。月明風簌簌。

歐陽鉉

字子玉。泰和人。崇禎十年進士。官休寧縣知縣。有野稷堂集。

柳梢青

春情

春去楊花無情有思。閒到牕紗。暮雨急催。峭寒輕透。香屑慵加。小樓孤倚堪嗟。風一翦。雲欹鬢斜。燕子飛來。青梅如豆。不奈天涯。

陳子龍

字臥子。青浦人。崇禎十年進士。官兵科給事中。進兵部侍郎。明亡。殉節。國朝諡忠裕。有湘真閣江離檻詞二卷。

古今詞話。大樽文宗兩漢。詩軼三唐。蒼勁之色。與節義相符。乃湘真詞一集。風流婉麗如此。傳稱河南亮節。作字不勝羅綺。廣平鐵石。賦心偏愛梅花。吾於大樽益信。倚聲集。詞至雲門。湘真、諸集。言內意外。已無遺議。柴虎所謂華亭腸斷。宋玉魂銷。所微短者。長篇不足耳。梅墩詞話。明季詞家競起。妙麗惟湘真一集。江離檻諸什。如咏黃昏則云。青燈冷。碧紗煙盡。半响愁難定。咏五更則云。愁時如夢。夢時愁。角聲吹到小紅樓。咏杏花則云。微寒着處不勝嬌。一番弄雨花梢。咏春閨則云。幾度東風春意惱。深深院落芳心小。皆黃門意到之句。王阮亭云。大樽諸詞神韻天然。風味不盡。如瑤臺仙子。獨立却扇時。而湘真一刻。晚年所作。寄意更綿邈悽惻。

望江南

思往事。花月正朦朧。玉燕風斜雲鬢上。金猊香盡畫屏中。半醉倚輕紅。

如夢令

紅燭逢迎何處。笑倚玉人私語。莫上軟金鉤。留取水沉香霧。難去。難去。門外杏花春雨。

浣溪沙

半枕輕寒淚暗流。愁時如夢夢時愁。角聲初到小紅樓。風動殘燈搖繡幕。花籠微月澹簾鉤。廿年舊恨上心頭。

醜奴兒令

春水

赤欄橋下煙波急。欲問西洲。莫寄東遊。千里清江一線浮。落花亂點湘紋皺。昨日瓊樓。今日蘭舟。爲送多情曉夜流。

原书空白页

蝶戀花

雨外黃昏花外曉。催得流年。有恨何時了。燕子乍來春又老。亂紅相對愁眉掃。
午夢闌珊歸夢杳。醒後思量。踏遍閒庭草。幾度東風人意惱。深深院落芳心小。

又

裊裊花陰羅韞軟。無限芳心。初與春消遣。小試嬌鶯纔半轉。海棠枝上東風淺。
一段行雲何處剪。掩過雕闌。送影湘裙展。隔著亂紅人去遠。畫樓今夜珠簾捲。

天仙子

十二畫屏圍楚岫。一縷水沈攜滿袖。小桃纖甲印流霞。聽玉漏。人歸後。兩點橫波微暈透。
荳蔻梢頭春雨瘦。雲膩暖金燈下溜。鏡臺斜背解羅衣。芙蓉繡。丁

杳扣寶椽酥溫紅影皺。

又

古道棠梨寒惻惻。子規滿路東風濕。留連好景爲誰愁。歸潮急。暮雲碧。和雨和晴人不識。北望音書迷故國。一江春雨無消息。強將此恨問花枝。嫣紅積。鶯如織。儂淚未彈花淚滴。

山花子

楊柳淒迷曉霧中。杏花零落五更鐘。寂寂景陽宮外月。照殘紅。蝶化綵衣金縷盡。蟲銜畫粉玉樓空。惟有無情雙燕子。舞東風。

畫堂春

艷陽深染杏花梢。曉煙初注櫻桃。滿堂春思捲紅綃。昨夜春消。拾翠綠雲斜。驪門棋紅子閒敲。無邊芳草玉驄驕。人去迢迢。

千秋歲

章臺西弄。纖手曾攜送。花影下。相珍重。玉鞭紅錦袖。寶馬青絲鞵。人去後。蕭聲
永斷秦樓鳳。菡萏雙燈捧。翡翠香雲擁。金縷枕。今誰共。醉中過白日。望裏悲
青塚。休恨也。黃鶯啼破前春夢。

清平樂

繡簾花散。難與東風算。拈得金鍼絲又亂。尙剩檀心一半。幾回黛蹙雙蛾斜。
添紅縷微波。閒看燕泥欲墮。柳綿吹滿輕羅。

桃源憶故人

小樓極望連平楚。簾卷一帆南浦。試問晚風吹去。狼籍春何處。相思此路無
從數。畢竟天涯幾許。莫聽嬌鶯私語。怨盡梨花雨。

醉紅粧

詠螢

空庭星露暗香消。冷熒熒、煙外飄。一簾涼影點清宵。明還滅。弄花梢。多情飛上翠雲翹。倩他照、晚粧嬌。更喜玉纖輕拂下。偏不見、落紅綃。

方大猷

字鷗餘·德清人·崇禎十年進士。

南歌子

思秋

蓬鬢驚堆雪。衰容艷拒霜。莫持瓊管弄清商。吹得萬千林葉一時黃。誰道春如剪。裁成百樣芳。那知秋色是干將。天外羣峰處處割愁腸。

錢棟

字仲馭·嘉善人·崇禎十年進士。

浣溪沙

思秋

小立幽塔數綠苔。鴛鴦未繡怕人催。深秋簾幙幾曾開。霜葉半隨溪鳥去。寒煙獨裏暮鐘來。一番消瘦自驚猜。

夏允彝

字彝仲·江南華亭人·崇禎十年進士·官吏部考功司主事·明亡·殉節·國朝賜諡忠節。

千秋歲引

麗譙

澤國微茫。海濱寥廓。萬堞孤城逼天角。雲外龍車碧樹懸。霜前雁字當窗落。亭城花。秦山月。都蕭索。刺史風流攜琴鶴。暇日高吟倚軒閣。醞酒新亭幾忘却。三泖沙明繞郡樓。九峯嵐翠扶城郭。銅壺響。曉更催。宛如昨。

來集之

字元成。蕭山人。崇禎十二年舉人。

玉樓春

窗外松篁初過雨。半天爽氣開煙霧。狂懷無計奈花飛。倚樓獨自和鶯語。偏是春來無意緒。隻身沒箇安排處。溪流一派送愁來。山圍四面裹愁住。

單

恂

字質生。江南華亭人。崇禎十三年進士。官麻城縣知縣。有竹庵詞。

柳塘詞話。曾見蕁生與同學論詞所向當行者。選旨遙深。含情麗楚。縱復絃中防露。衿裏迴文。要不失三百篇。與騷賦古樂府之遺意。故其竹香庵詞。工於言情。而藻思麗句。復不猶人也。

采桑子

畫簾微雨春風暮。最苦今番。羅袖痕斑。留待歸時逐點看。桃花門巷無人到。蹙損蛾彎。手約雲鬟。斜倚殘紅第幾闌。

浣溪沙

荳蔻花紅滿眼明。小簾貼燕雨如塵。踏青時節又因循。倦蝶有情隨鬢鞦。遠山無賴學眉顰。冷清清地奈何春。

黃周星

字九煙·上元人·崇禎十三年進士·官戶部主事·

滿庭芳

送友人
還會稽

新綠方濃。殘紅盡落。多情正自凝眸。不堪南浦。又復送歸舟。便倩江郎作賦。也難寫。別恨離愁。消魂久。斜陽芳草。天際水悠悠。問君何處去。若耶溪畔。宛委山頭。有千嵒競秀。萬壑爭流。愧我江湖跡遍。到如今。仍坐書囚。遲君至。開襟散

髮詠月醉南樓。

周世臣

字穎侯·宜興人·崇禎十三年進士·官漢川縣知縣·

應天長

春日田家樂

溪南溪北橋橫木，賴得行人影孤獨。柳數圍，傳新綠。剛覆三閒茆屋。牀頭樓野鷺。閒個籬邊眠犢。黃土矮牆堅築。安頓初添竹。

蝶戀花

舟中有懷

今夜相思有幾許，又怕他宵無計安排去。野岸蕭蕭蘆自語。各天默默人無據。好事豈教長久聚。強把鴛儷一霎分何處。睡眠朦朧多惡緒。披衣坐觀東方曙。

王彥泓

字次回·金壇人·官華亭縣訓導·

古今詩話·王次回喜作小豔詩·最多而工·凝雨集二卷·見者沁入肝脾·里俗爲之一變·幾於小元白云·詞不多作·而善改昔人詞·殊有加毫頰上之致·

滿江紅

眼角眉端誰道是、便成拋散。怕向那、定情簾下、訴愁牕畔。幾度卸裝垂手望。無端夢覺低聲喚。猛思量、此際正天涯。啼珠濺。欲寄語、加餐飯。難囑付、憑魚雁。隔雲山牽挽。寸心如線。善病每逢春月臥。長愁多向花前歎。況如今、憔悴已難堪。何曾慣。

金俊明

字孝章·吳縣人·諸生。

生查子

北平驛秋夜

逼暝轉深林。瑟瑟松濤沸。日落旅魂驚。嘶馬停還未。燈檠獨夜情。劍吼清秋氣。涼月照無眠。應見征人淚。

錢應金

字而介·嘉興人·有古處堂詞二卷。

憶秦娥

珠簾揭。東君欲別鶯聲咽。鶯聲咽。亂堆柳絮。平鋪荷葉。玉人午夢殘粧怯。落花愁殺雙飛蝶。雙飛蝶。可憐風雨。送春時節。

踏莎行

銅雀春深。紙鳶書暖。繡床無力拋鍼倦。朝來不是懶看花。羞顏怕與花相見。粉蹟啼痕。羅消裙襪。紅泉脉脉流松澗。湘琴一曲美人愁。雲連猿路秋連雁。

方以智

字密之。桐城人。崇禎十三年進士。官檢討。有浮山集。

憶秦娥

花如雪。東風夜掃蘇堤月。蘇堤月。香銷南國。幾回圓缺。錢塘江上潮聲歇。江邊楊柳誰攀折。誰攀折。西陵渡口。古今離別。

萬曰吉

字允康。黃岡人。崇禎十三年進士。官崑山縣知縣。

踏莎行

春寒

芍藥香凝。海棠絲裊。東風吹透相思草。綠紗深處自調箏。一絃一柱寒聲早。
苔滿階庭。月留昏曉。萋迷碧砌殘紅少。畫梁燕子未歸來。黃昏春鎖花關小。

呂福生

字吉士。會稽人。

多麗

夜未央。蛩聲一片侵牀。漏滴瀝、雲頹雨咽。譜成半枕淒涼。空悵望、纖林帶月。不堪聞、孤雁啼霜。燈淚紅殘。香心字冷。難將樽酒倩疎狂。恨人去、天涯路遠。拋却好春光。向只道、相思有夢。畢竟荒唐。破愁煩、蠅頭繡句。花箋印疊鴛鴦。更關情、樓西倚悶。最消魂、燈下凝粧。月不長圓。花原易落。一時也抵百年長。終凝戀、斜陽衰草。別袂共離觴。一點點、鮫衫欲濕。界破檀黃。

沈

案

字木公。嘉善人。

菩薩蠻

朦朧倦蝶和花睡。一鈎新月，
啣山翠。鸚鵡夢偏驚，
小鬟簾外燈。畫圖披粉墨。
樹樹留春色。忽憶舊時情，
雙眉柳樣青。

宋存標

字子建·江南華亭人·官翰林院孔目。

醉花陰

香散飛花衣袖窄。浪浴雙鴛翼。明月愛隨人，
一縷紅雲，暗裏爭顏色。獨立迴廊聞太息。
夢裏曾相識。玉指映柔荑。欲折花枝，
睡起嬌無力。

明詞綜卷七

青浦 王昶 纂

朱一是二首

錢 棻一首

關 鍵一首

魏學濂二首

吳 易一首

王泰際一首

宮偉鏐一首

沈 龍一首

徐 遠一首

吳聞禮一首

夏完淳五首

沈 泓一首

吳 熙一首

沈 爨二首

沈自炳三首

韓曾駒一首

歸莊一首

張綱孫一首

周永年一首

許友一首

韓洽四首

蔣平階一首

于儒穎一首

周積賢二首

吳騏一首

計南陽二首

張天湜一首

金是瀛一首

沈謙十一首

李標一首

朱一是

字近修·海寧人崇禎十五年舉人·有梅里詞一卷·

憶少年

怨別

沉沉永夜闌。干芍藥。嬌容沾雨。分明五更夢也。淚流如許。
雲水漫漫。江北路。盼不到。客帆停處。鴛鴦渡邊樹。記郎從此去。

二郎神 登燕子磯秋眺

岷峨萬里見渺渺水流東去。指遠近關山參差宮闕。起滅長空煙霧。南望滄溟天邊影辨不出。微茫盡處。嘆三楚英雄。六朝王霸。消沉無數。從古長江天塹。飛艫難渡。自玉樹歌殘。金蓮舞罷。倏忽飛鳥走兔。燕子堂前。鳳凰臺畔。冷落丹楓白露。但坐看狎鷗隨浪。漁父扁舟朝暮。

錢

棨 字仲芳。嘉善人。崇禎十五年舉人。

踏莎行 園居

萬乘徒空。一邱儘足。小園但種千竿竹。蒼陰深處掩高齋。黃鸝啼過山頭屋。壁掛嵇琴。村疑阮曲。白雲邀我同歌宿。幽花遶砌不知名。柴門秋水添新綠。

關

鍵 字六鈴。錢塘人。崇禎十六年進士。

鷓踏花翻 落梅

明詞綜 卷七

澹沲瓊粧，悠颺綺袂。臨期腸斷，風流盡。憐伊似水年光，和夢心情，難忘林下風前韻。蕭絮撲玉樓遙，迷離雪擁金爐近。借問玉貌幾時消損。笛聲三弄空。貽恨未見杏靨梨渦。柳綿桃綬，早與春風趁。羅浮仙夢不堪追。夜寒月冷誰傳信。

魏學濂

字子一·嘉善人·崇禎十六年進士·官檢討·

阮郎歸

去年拋葯種池塘。今年墜粉香。幾時得藕，便絲長。何曾解斷腸。驅燕子，打鴛鴦。摘蓮偷卜郎。擘開多半是空房。羞看枕簟雙。

浣溪沙

漠漠微寒到水濱。半秋無恙似初春。鴛鴦來啄影中人。柳拂浪痕輕似夢，苔沿農步細于塵。釀成閑恨爲誰顰。

吳 易 字日生·吳江人·崇禎十六年進士·官兵部主事·授尙書·明亡·殉節·國朝賜諡節愍·有南湖倡和詞二卷·

滿江紅

斗大江山經幾度、興亡事業。瞥眼處、英雄成敗，底須重說。香水錦帆歌舞罷，虎邱鶴市精靈歇。尙翻來、吳越舊春秋，傷心切。伍胥恥，荊城雪。申胥恨，秦庭咽。羞比肩種蠡，一時人傑。花月煙橫西子黛，魚龍沫歎鴟夷血。到而今、薪膽向誰論。衝冠髮。

王泰際

字內三·嘉定人·崇禎十六年進士·有冰抱集·

浪淘沙

高閣掩春殘。香冷衾單。滿城桃李盡朱顏。自分與花同福命，長是心關。道遠寄書難。盼煞平安。多因身在翠微間。歸看雙鸞妝鏡裏，一樣春山。

宮偉鏐

字子元·秦州籍·靜海人·崇禎十六年進士·有采山外紀入燕集·

念奴嬌

別意用辛稼軒韻

蕭娘樓畔，恰匆匆過了菊花時節。帆影拖霜逢小至，畫舫水嬉微怯。繡閣春心，芳洲密約，執手何曾別。玉樓人去，此玉誰與傳說。漫道青邱朱簾彩毫長擅，對引金波月。舊夢燕山看不盡，新夢濤聲千疊。喜得今宵，錦屏瞥見，展放雙眉折。悄聲低問，多情付與華髮。

沈

龍 字友夔·江南華亭人·崇禎十六年進士·有雪初堂集·

踏莎行

施公關村居九日

水滿江天，沿堤釣艇。空村客遠風煙冷。丹楓消翠草堂開，天晴襯出重陽景。竹掃茶煙，鶴窺香鼎。芙蓉照面潮紅醒。一痕淡月上蛾眉，松臺人散烏紗影。

徐

遠 字屆甫·嘉善人·崇禎十六年進士·

踏莎行

零雨初收。金波乍轉。搗衣雙袖臨風捲。銀牀玉簟陡生涼。遲眠且撲流螢扇。
草綠長門。荷殘別院。如絲情緒如雲亂。無端蟋蟀響西堂。并梧葉葉關心顫。

吳聞禮

字去非·休寧人·
崇禎十六年進士·

浪淘沙

水宿

枕畔水泠泠。併作秋聲。布衾初擁別愁生。風露自寒天自遠。夢隔江城。篷底
漏疎星。何處漁燈。桐江釣後一裘輕。宦海不如歸去穩。煙渚蘆汀。

夏完淳

一名復·字存古·江南華亭人·允彝子·官中書舍人·年
十七以明亡殉節·國朝賜諡節愍·有玉焚堂詞一卷·

柳塘詞話·夏存古玉焚堂詞·向得之曹顧庵五集中·見其詞致慷慨淋漓·不
須易水悲歌·一時悽感·聞者不能爲懷·留此數闕·以當東京夢華錄也·

卜算子

秋色到空閨。夜埽梧桐葉。誰料同心結不成。翻就相思結。十二玉闌干。風有

燈明滅。立盡黃昏淚幾行。一片鴉啼月。

王阮亭云·寓意卽
工·自是再來人·

一翦梅詠

柳

無限傷心夕照中。故國淒涼。剩粉餘紅。金溝御水日西東。昨歲陳宮。今歲隋宮。往事思量一餉空。飛絮無情。依舊煙籠。長條短葉翠濛濛。纔過西風。又過東風。

千秋歲憶

舊

幾番薄倖。無限傷心景。眉前事。心頭病。殘燈餘一點。卻把羅衣整。窗櫺外。一枝帶雨梨花影。獨步東風靜。訪當時。花徑寒悄悄。花光淨。人去多時也。往事猶堪省。飄紅淚。銀缸露滿鞦韆冷。

魚遊春水

春暮

離愁心上住。捲盡重簾推不去。簾前青草。又送一番愁句。鳳樓人遠。簫如夢。鴛枕詩成。機不語。兩地相思。半林煙樹。猶憶那回去路。暗浴雙鷗。催晚渡。天涯

幾度書回。又逢春暮。流鶯已爲啼鶻妬。蝴蝶更禁絲雨誤。十二時中。情懷無數。
燭影搖紅

辜負天工。九重自有春如海。佳期一夢斷人腸。靜倚銀釭待。隔浦紅蘭堪採。上扁舟。傷心欸乃。梨花帶雨。柳絮迎風。一番愁債。回首當年。綺樓畫閣生光彩。朝彈瑤瑟夜銀箏。歌舞人瀟灑。一自市朝更改。暗銷魂。繁華難再。金釵十二。珠履三千。淒涼千載。

沈

泓 字臨秋·嘉善人·崇禎十六年進士·後爲僧·名宏堅·

江城子

村居

長堤細柳隱虹橋。弄笙簫。伴漁樵。醉倚楓林。仰面掛詩瓢。釋卷正逢秋水漲。臨古渡。放輕舠。夕陽西下暗窗綃。雁聲高。笛聲遙。碧簾涼生。細雨燕辭巢。隔岸篝燈孤艇泊。沽濁酒。短扉敲。

吳

熙 字止仲·嘉善人·
有非水居詞三卷·

臨江仙 居村

醉裏衡門聊自適。短垣松竹蕭森。日斜羅幕掩清陰。心孤聞遠磬。愁重理瑤琴。
幾點落英寒著地。行來寂寞空林。有人閒坐愛微吟。平橋新漲水。一徑野雲深。

沈

麋 字天鹿·江南華亭人·一作秀
水人·有羨庵遺集二卷·詞附·

如夢令

醉後題畫
蘭贈陳姬

月枕紗籠酒後打點玉容柔瘦。灑墨亂春粧。香雨沾人衣袖。成就成就。今夜風情消受。

江城子

秋日
行舟

浮萍瀠曲小橋邊。似荷錢。似花鈿。秋艇宜人。一路棹添煙。三徑高情來訪菊。無

事爾此身前。新生野水碧涓涓。躍魚淵。釣絲牽。疎柳依依。坡岸弄輕妍。日落
殘霞分夜影。鐘斷處。塔鈴傳。

沈自炳

字君晦。吳江人。
官中書舍人。

中興樂

芙蓉池上露初涼。桐花月轉迴廊。秋滿紋簾。孤燈漏長。夢入紅樓畫牆。見蕭
娘。覺來枕畔。玉釵猶響。無限思量。

更漏子

憶情人。南浦去。攜手向人低語。眉樣淺。翠衣輕。鶯啼畫舫行。香闥掩。珠帷斂。
春剩楊花千點。愁不禁。黯銷魂。黃昏獨倚門。

虞美人

春景

竹籬陣陣飛花雨。棲燕銜香語。孤雲細草小溪晴。攀梅拾豆打流鶯。短橋橫。

楊花一似郎情薄。相見還飄泊。空餘三月斷腸春。萬重山外楚江濱。有行人。

韓曾駒

字人毅。烏程人。有悟雪齋集。

虞美人

落花不爲隨春去。別有閒情緒。尋花偶過野人家。偏是菜花開盡見桃花。無
情每恨良宵月。圓少翻多缺。上弦數到下弦時。問有幾多明月上花枝。

歸莊

字元恭。崑山人。有恆軒集。

王阮亭云。元恭爲太僕文孫。詩歌行艸。無不適麗卓絕。小詞疎快。直逼六一原唱。

朝中措

平山堂和歐公韻

山連霄漢草連空。樓閣碧虛中。第五泉邊試酌。颯然兩腋生風。千秋勝槩。殘
陽綠樹。暮靄疎鐘。非復當年欄檻。風流猶想僊翁。

張綱孫

字祖望。錢塘人。

浣溪沙

紅橋

白舫青簾映碧流。西風初透芰荷秋。玉簫聲裏度揚州。二十四橋今寂寞。隋隄芳草莫添愁。如淮美酒醉紅樓。

周永年

字安期。吳江人。有懷響齋詞一卷。

柳塘詞話·安期以博洽著名。冢宰白川之孫。固世其家學者。虞山錢氏撰列朝詩選·從中補輯·與有力焉。著詞規未竟而歿。懷響齋詞如宿雨皆磨新月色。晚風擡舉好花枝。新豔如是。

山花子

夏夜

低髻攏花夢半醒。重攜枕簟向閒庭。何處玉簫風送遠。倚闌聽。趁着螢光看絡緯。卷開珠網放蜻蜓。不是夜長愁不寐。候雙星。

許友

字有介。侯官人。有米友堂集。

眼兒媚

明詞綜 卷七

一五三

精魂石上憶三生。寒夜與君盟。簾前明月，窗間小飲，樓上殘更。而今閒坐記芳情。龐兒較可憎。鞦韆肩倚案，低頭弄筆，斜眼挑燈。

韓

洽字君望·長洲人·諸生·有蟾香堂集·

菩薩蠻

疎簾淡月和煙入。琵琶深夜愁弦澀。莫奏踏羅裳。沙寒聞鴈娘。重衾宵夢午。夢憶蓮花浦。歸棹帶星瀾。隔船窺舞鸞。

又王氏園

玉鱗狼籍殘梅片。輕禽倒挂垂楊線。春沼綠波融。香吹蝶翅風。峯巒橫小翠。竹徑通幽邃。縮取六橋山。移來繡陌間。

法曲獻仙音

擬周美成

遲日籠晴。溫飈薦暑。入夏炎光初爍。扇翦輕紈。裙裁白苧。松吹半掀華幕。看槐

柳濃陰滿。儵然似巖壑。夙寥寞。恨佳遊。星分雨散。流年換。憔悴幾孤舊約。彷彿綠琴聲。記秦樓。權笑如昨。歲月欺人。懼芳華。先秋搖落。任花開花謝。誰叩草元亭閣。

瀟湘逢故人慢

擬王和甫

園亭晴敞。正梁飛舊燕。林唱新蟬。望清景無邊。有青峯迴合。碧渚相連。葛衣紗幘。對南薰。一曲虞弦。起無限。鄉心別恨。瀟湘夜雨朝煙。曲終也。餘韻在。見游魚浴鷺。山沒波閒。愛禱草芊綿。更穠柳垂池。翠柏參天。日長人倦。向北窗。欹枕高眠。愁魂繞。滄浪雲夢。片時行盡三千。

蔣平階

字大鴻。江南華亭人。官兵部司務。遷御史。

浣溪沙

紅橋卽事

柳外高樓一帶遮。門前偷下六萌車。玉環雙臂縮紅紗。十二闌干閑倚遍。黃

鶯啼上內人斜。隔江愁聽後庭花。

于儒穎 字弢仲
金壇人。

浣溪沙

一片心情眼底柔。倦容疎態越風流。未經惆悵不知愁。
鴛譜怪來鍼線減。工夫強半爲梳頭。日西初見下妝樓。

周積賢

字壽王。江
南華亭人。

南歌子

玉篆沉疊永。金鋪小鳳斜。杜娘無力繡春紗。閒倚綠萍池畔數楊花。

望江南

遙想憶殘淚溼輕紗。斜倚畫樓簾半卷。東風微雨落楊花。腸斷七香車。

吳

騏 字日千。江
南華亭人。

沈去矜云·日千詞專工小令·讀之不繼不
諛·不淺不深·生色真香·在離卽之間·

蝶戀花閨情

淡月溶溶花映綠·琴底離愁·吹滿相思曲·頻整羅裳檀鈕束·碧紗明滅紅膏燭·
玉漏聲低良夜促·斗帳蓮鉤·半挂鸞綃幅·倚枕夢成風曉觸·瀟瀟亂擊窗前
竹·

計南陽

字子山·江
南華亭人·

花非花

同心花·合歡樹·四更風·五更雨·畫眉山上鷓鴣啼·畫眉山下郎行去·
王阮亭云·
可作古樂府·

如夢令

紀事

長樂晨鐘初動·睡熟紫綃嬌鳳·翠輦一時移·十騎紅粧雲擁·如夢·如夢·城上烏

啼相送。

張天湜

字止鑒·江
南華亭人·

歸自謠

更漏歇。一夜珠簾風自揭。寒鴉影碎梧桐月。

玉關征戍音塵絕。當年別江南。

鶯語花時節。

金是瀛

字天石·江
南華亭人·

河滿子

憶在玉窗金戶。彎環曉月西斜。城角數聲留不住。暗香攜得還家。梁上雙棲燕子。庭中一樹梨花。

沈謙

字去矜·仁和人·
有東江詞二卷·

柳塘詞話·去矜列名於西泠十子·填詞稱最·大意以薄倖一篇·語真摯情·幽折以勝人·宋歇浦特以書規之·及貽我東江別集有云·野橋南去不逢人·

濃淡一片楊花雪。此卽小山夢魂慣得無拘束。
又踏楊花過謝橋也。誰謂其僅僅言情者乎。

清平樂

帶羅

香羅曾寄小鳳盤雲膩。要識春來腰更細。剩得許多垂地。玉鈎移孔難尋。有時燃着沉吟。蹤蹟可知無定。兩頭都結同心。

浣溪沙

繡領垂髻不解愁。小眉如畫眼波秋。翠毬風定裊香毬。窗下悔棋曾握臂。帳前臨鏡看梳頭。粉雲今日障紅樓。

蘇幕遮

立春

樹鶯藏。蘭雪擁。浪說春回。又被東君哄。面藥口脂呵復凍。一樣愁顰。便覺朝來重。負深盟。思好夢。懶簇酥山。花影簾鉤控。此夜歌樓誰與共。火照堆鴉。勝裏金人動。

又病闋

燕聲嬌。花影醉。日過窗西。猶自懨懨睡。一線情絲常似醉。九十春光。半擁鴛鴦被。靨銷紅。眉斂翠。便到沉身。總是多情淚。說與東風都不會。鏡子裙兒。曉得人蕉萃。

鵲橋仙

早梅

粉痕微坼。檀痕尙淺。迤邐因香尋著。一枝偷采雪中春。敢驚燕、全然未覺。銀瓶水暖。翠鬟手膩。又把軟簾垂卻。溪橋煙冷月初斜。怎消受、五更寒角。

月籠沙

九日題南樓壁間

簾外瀉瀉暮雨。江邊隱隱寒潮。亂鴻縹渺寄書遙。滿地黃花人病酒。蜂蝶空勞。自惜明珠離掌。誰憐小帶垂腰。畫樓西畔是虹橋。只恐粉雲遮不斷。怕殺登高。

又

半暖闌邊玉手微溫帳裏蘭胸。楊花漠漠水溶溶。隔水隔花看不見，恨煞銀驄。
旅店催將鞍卸，孤衾尙覺香濃。曉鶯啼過畫樓空。料得那人眠未穩，斜靠熏籠。

東風無力

南樓春望

翠密紅疎，節候乍過寒食。燕衝簾，鶯睨樹，東風無力。正斜陽樓上，獨憑闌，萬里春愁直。情思慳慳，縱寫徧新詩，難寄歸鴻雙翼。玉簪恩，金鈿約，竟無消息。但蒙天捲地，是楊花，不辨江南北。

滿江紅

柳詠

一翦鶯梭，早織就，千絲萬縷。最苦是，蘇堤欲曉，灞橋將暮。媚眼未醒開又合，纖腰半倚扶難住。又沉沉，搭在玉闌干，和煙雨。還記得，長亭路。曾折送，行人去。

恁牽纏似我。別時情緒。簾黑夢回應有淚。樓高日斷。渾無語。隔青山。不見紫騮歸。蒙天絮。

喜遷鶯寄俞季慄

水鳩鳴屋。見春陰不散。漸飛霰霖。小燕初來。聞花又落。故把餘香頻蹴。煙迷半林深翠。風翦一池輕縠。憶舊日。正此時相見。掌杯盈綠。幽獨。衰更甚。雲擁亂山。咫尺歡難續。王粲情多。江淹才盡。晚節眞成碌碌。途窮笑吾增慟。雅奏須君終曲。春難待。怕城南握手。櫻桃將熟。

一萼紅春情

漫窺簾。愛桃花萬樹。新雨拆紅緘。近水無言。隨風有恨。欵斜直恁嬌憨。棲不穩。畫梁雙燕。爲營巢。終日語呢喃。似喜仍憂。乍暄還冷。情緒懨懨。盡道西郊堪賞。便倡條冶葉。誰再沾黏。淚豈因花。病非中酒。羞稱宋玉江淹。生受盡。孤眠况

味。眠又起。真欲似春蠶。忽見隔牆山影。想殺眉尖。

李

標

字子建·嘉善人·
有東山遺稿·

踏莎行

硯點飛花。簷沾弱絮。爐煙小誤湘簾暮。春風不解動人情。人情怕送春歸去。
細草粘天。斜陽挂樹。天涯離別人何處。休休莫更倚危欄。遠山正是愁人路。

原书空白页

明詞綜卷八

青浦王昶纂

魏允枬一首

張逸一首

李元組一首

李明嶽一首

胡偕行一首

程爵三一首

張大烈二首

程可中一首

秦瀚先一首

錢繼振一首

張杞一首

于玉班一首

沈懋德一首

查維宏一首

胡介一首

顧德基一首

俞汝言一首

戈止一首

孟稱舜一首

王化龍一首

蔣爾璵一首

周斑二首

邵梅芳十二首

邵嶙一首

徐士俊一首

爰丹生一首

魏允枏

字交讓·嘉善人·有維風集·

金明池

金陵懷古

燕子磯邊鳳凰山上。又是狂風驟雨。金砌玉階何處問。儘燕麥、兔葵滿路。問秦淮、桂楫蘭橈。却只是衰草垂垂將暮。嘆絳闕蛛縈。紗窗塵漬。一片晚鴉來去。想王謝風流何處。便紫燕黃鶯。一時無主。看當日、詞臣狎客。空剩得、白楊黃土。最傷心、景物三春。教苑裏蛙聲。公私相訴。但渡口寒煙。亭中皓月。兀自依依芳

樹。

張逸

字秦庵
嘉興人。

桂枝香

寄友
村居

天高氣肅正一派秋聲。悲吟萬木。瀟灑遠山抹翠。澄溪漾玉。故人家住殘陽外。
小楓村。低低茅屋。煙生蘆渚。霜霑菊圃。酒香茶熟。疎籬畔。山中野服。想竹欄
琴韻。松窗棋局。四壁清幽。閒掛雲林幾幅。鯉魚風起。天橫雁。待一葉。尋他剡曲。
開樽長嘯。池邊蟹紫。牆頭橘綠。

李元組

字子占
嘉興人。

望江東

一幅春光明。更美鶯。滿院啼花碎。飛絮落紅相點綴。人立在。秋千背。長思短
憶。供憔悴。算只有。花前淚。已將心事隨流水。闌干下。金釵墜。

李明嶽

字青來·嘉興人·

阿那曲

舟中待友

幾回閒夜停機杼·支枕蓬窗風許許·吹盡蘋香不見人·繞塘寒月鵝鶻語。

胡偕行

字與行·太倉人·貢生·

離亭燕

白下懷葉君實師

歸雁行行啼啁喚破一宵秋夢·夢醒封題忙寄與·又不曾將書送·悵望碧山頭·遙囑幾聲珍重·踏遍長安何用·滿目煙雲寒凍·簷外錚錚風弄咽·急戰雨聲還恐·多少客金陵·今夜離愁誰共。

程

靜

字墨仙·休寧人·有石交堂集·

柳塘詞話·休寧程墨仙不爲金粉遮障閨幃鋪張之語·而情至之作·自能沁入心脾·如玉樓春之密怨·蝶戀花之憶別·推閨情第一·要不數嚴次山也·

西江月

秋興

盡日荷鋤治圃。有時捉杖尋泉。山翁招我坐橋邊。笑指菊花開遍。隔岸重重竹樹。近溪點點潭煙。灘頭流下小魚船。轉過蘆花不見。

玉樓春

子規啼過楊花路。緘淚函情無寄處。君如南浦往來潮。妾似西陵朝暮雨。當年祇恨傳金縷。何必相逢成別苦。夜深蜀國十三絃。紫女青皇私自語。

錦堂春

怨秋

玉簾寒生暮雨。冰綃淚染朝霞。多情記得還家未。叢桂已無花。譜入銀箏恨切。窺來寶鏡愁加。無端雁去書難寄。飛盡總由他。

張大烈

字言沖。錢塘人。有詩餘類函。

阮郎歸

立夏

綠陰鋪野換新光。薰風初晝長。小荷貼水點橫塘。蝶衣曬粉忙。茶鼎熟。酒卮

揚醉來詩興狂。燕雛似惜落花香。雙銜歸畫梁。

少年遊秋思

蕭瑟秋風古渡橋。江風壯晚潮。夕陽衰柳，何堪輕折，瘦損小蠻腰。碧雲澹遠，澄波靜，慘怨散林臯。山海情深，石尤風急，留住遠征橈。

程可中

字仲權，休寧人。

浣溪沙

來青閣

複道懸空踏翠微。芳林過雨濕臙脂。卷簾嵐氣撲人衣。半榻午陰銷剩暑，一窗寒碧送斜暉。曲闌十二綠成圍。

秦瀚先

字會洋，無錫人。

如夢令

九月晦日，尙未得歸。

亭外桂花香滿秋。芙蓉過半。衰柳不禁風。黃葉亂飄無限。目斷。目斷。愁望故

鄉偏遠。

錢繼振

字爾玉
嘉善人。

搗練子

春睡足。落花平。草架茶蘼送晚晴。梅子弄黃茶炙翠。梢頭猶賸一聲鶯。

張

杞

字迂公。黃陂人。
有和花間詞。

詞統：西蜀南唐而下。獨開北宋之壘。又轉爲南宋之派。花間致語。幾于盡矣。黃陂張迂公起而全和之。使人不流于庸濫之句。謂非其大力與。

浣溪沙

苔草無人半入泥。妒風狂雨綠窗西。閒來夢斷苦鶯啼。蝶媚常黏飛絮浦。燕

嬌慣舞落花谿。曉天深夜冷幽閨。

于玉班

字清卿。
金壇人。

念奴嬌

茉莉

明詞綜

卷八

簾櫳午寂。正陰陰窺見。後堂芳樹。綠徧長叢。花事杳。忽見瓊葩丰度。豔雪肌膚。蕊珠標格。消盡人間暑。還憂風日。曲屏羅幙遮護。長記歌酒闌珊。微聞暗麝。笑覓衣沾露。月沒闌干。天似水。相伴謝娘牕戶。浴後輕鬟。涼生滑簟。無限風流處。惹人幽夢。枕邊零亂如許。

沈懋德

字雲嵩。嘉善人。有湖日齋詞。

菩薩蠻

江遊

江聲洶洶魚龍老。雲情煙色從空繞。千里一扁舟。看完無限秋。蘋花隨浪急。白鷺迎風立。天外倚高樓。有人添暮愁。

查維宏

字彥符。休寧人。有懸藻亭詞。

臨江仙

庭院深深愁幾許。落花妬殺東風。天涯人遠思無窮。綠牕夢覺。扶起玉釵鬆。

漫憶當年行樂處。而今酒懶詩慵。捲簾悄步曲廊東。惱人燕子雙舞夕陽中。

胡

介

初名上登。字彥遠。錢塘人。諸生。有河渚詞。

滿江紅

走馬歸來西陵下。斜陽滿樹。回首處。酒壚猶在。河山非故。久客不知家遠近。重來卻怪人驚顧。聽啼鴉。也道不如歸。歸何處。草元閣。蘭臺署。揚州夢。秦淮渡。走人間未徧。蒼涼日暮。惆悵遼東丁令鶴。當年華表誰爲主。但相逢。莫負故人心。三生路。

顧德基

字用晦。常熟人。

祝英臺近

飲將闌。天欲曙。無奈逼人去。唱罷陽關。折柳惹飛絮。斷魂畫角尊前。錦帆江上。但私祝。東風留住。更相覷。且問甚日歸來。叮嚀不多句。把袂踟躕。欲判淚如

雨長年不管人愁。揚舫方遽。知此夜、棹停何處。

俞汝言

字右吉，秀水人。諸生。

浪淘沙

芳草偏天涯。幾引流霞。小樓宛轉暮雲遮。記得當時歌舞地，眷柳憐花。歸路
一鞭斜。斷送年華。紅闌幾曲碧窗紗。酒醒更殘燈又地，夢落誰家。

戈

止

字永清，嘉善人。貢生。官松江府教授。

風入松

興漫

生涯應作浣花翁。事事疎慵。結廬恰喜塵囂外，栽花地、雨碧霜紅。家在亂雲深處，人來流水聲中。年年相識舊東風。排我小簾櫳。榆錢落盡萍錢落，奚囊在、不畏詩窮。夜泛試移短棹，曉眠常過高春。

孟稱舜

字子塞，烏程人。

卜算子

回首望西陵。隔別人南浦。縹緲孤雲自往來。寂寞歸時路。蓼渚小鴻飛。夢斷風吹雨。江外峯青似劍鉞。難割愁腸去。

王化龍

字封可。廣漢人。

蝶戀花

小院幽窗風弄曉。柳織煙籠。開罷棠梨了。枝上流鶯啼更早。惜花人共春花老。金鴨香深簾外裊。繡到鴛鴦。轉惹儂情惱。鏡掩孤鸞羞獨照。眉山一點愁多少。

蔣爾瑣

字魯鎮。諸暨人。

浣溪沙

剪剪輕雲片片霞。玉鈎纖月短屏遮。黃昏風颭繡簾斜。花蕊半含多抱蝶。柳

條猶軟不勝鴉。一番春夢落天涯。

周

玘 字上衡·嘉善人·有疑夢詞·

如夢令

深院一番風起。狼籍殘紅滿地。點點露珠濃。應是別離人淚。無寐。無寐。閑卻半牀鴛被。

定風波

客園看桂

蟋蟀聲寒黯淡。風謝家池館。九秋中。叢桂四山香滿院。一片粧成金屋。畫闌東。對酒不知身是客。堪惜。夕陽容易散。晴空卻待夜深明月好。須早。扁舟隔岸采芙蓉。

邵梅芳

字景悅·青浦人·貢生·

點絳脣

元上

車馬三更香風一帶笙歌路。月華初度。萬點春星曙。曾記當初今夜相逢處。君休去。玉簫聲住。簾捲梅花樹。

柳梢青

春雨

昨夜今宵。東風不斷。細雨絲飄。暗鎖銀塘。微沾玉砌。草綠蘭皋。落紅一溜江潮。香斷處。平蕪畫橋。楊柳煙低。梨花雪重。多半春銷。

望江南

春光好。芳草綠初齊。新雨翠搖雕檻外。輕潮紅漲畫樓西。約伴著羅衣。何處去。桃李更芳菲。鳳額帳深垂柳帶。鴉頭襪染落花泥。憔悴踏青期。

西江月

咏雪

柳絮空中吹早。梨花檻外開遲。紅爐翠幌玉堂西。欲墮因風扶起。望去一山明月。踏來幾寸銀泥。春光寒峭暮煙低。小立早梅香裏。

憶漢月

詠
蝓

芳草誰知前度。正值寒塘欲暮。因風零亂玉堦前。偷炤綺羅香處。憐他垂柳外。千萬點。長堤碧樹。黃昏細雨。悄無人。管取夜深來去。

眼兒媚

燕
詠

東風一剪過池塘。曾識舊紗窗。烏衣未改，紅妝如昨，穩上雕梁。年年花下相逢處。何事更商量。多應是訴來時春短，別後秋長。

少年遊

別
曉

五更天曉漸雞鳴。斜月半牀橫。樹杪風疎，馬啼霜滑，銀漢帶疎星。看他渺渺垂鞭去。望裏不分明。一線江流，幾層山色，千里隔長亭。

浣溪沙

水殿涼生咽暮蟬。亭臺百尺映清泉。數聲雨過小荷錢。紈扇輕搖圓似月。冰

綃斜映薄如煙。鬢雲撩亂墮香肩。

風中柳

花落

一夜東風南陌落紅吹急。正芳時、畫橋寒食。鞦韆庭外，挂游絲百尺。怎淒涼、粉愁香泣。半啓朱扉。又是青陰如織。更凝眸、有誰憐惜。但教飛去，向銅溝流出。及早透、三春消息。

醉花陰

病起閒愁消永晝。香鈕鬆金扣。時節近清明。燕子雙來，翠幄輕寒透。杏花新雨池塘後。莫道春依舊。昨夜更東風。一樹海棠，零落胭脂瘦。

秋蕊香

葉落

門外秋聲不絕。簌簌空階吹徹。寒枝影亂鴉啼歇。滿院清霜斜月。和風帶雨難分別。還淒切。綺窗敲處燈明滅。夢醒三更時節。

南柯子

杏雨新沾砌。梨花冷閉門。幾重映色上湘紋。斷送牆腰長日又黃昏。澹澹斜陽下。微微碧樹分。樓高莫倚數歸人。望去浮雲千里怨王孫。

邵

麟 字雲章。
青浦人。

賀新涼

鴈聲

睡覺秋窗罅。正閒階、商飈蕭颯。明蟾低亞。嘹唳數聲天際響。直透茆檐竹瓦。這淒怨、憑誰堪話。辛苦塞垣千萬里。又明星、幾點湘煙挂。稻梁好、究須怕。娟娟涼露橫空灑。好似聽、哀絃密拍。楚歌悲咤。難比閒鷗和野鷺。隨意蘆鄉蟹舍。任沙觜、沿緣上下。今夜重幃寒信緊。又荳棚、絡緯蕭蕭者。銅仙泪、泫然瀉。

徐士俊

字野君。錢塘人。
有雁樓詞一卷。

柳塘詞話·野君與余論詩·如康莊九達·車驅馬驟·易爲假步·詞如深岩曲徑·叢篠幽花·源幾折而始流·橋獨木而方渡·非具騷情賦骨者·未易染

指·其言正
爲吾輩長價·

好事近

剪亂海棠絲。拋卻春心不管。楊柳那知人意。惹鶯兒啼怨。臉紅眉翠不堪銷。擁着半牀懶。二十四番花信。數春宵愈短。

爰丹生

字彤實·
嘉善人·

金明池

秣陵
懷古

斷雁西風瘦。驢黃葉。又是關門日暮。仙梵度、清涼山寺。對鳳闕、絳雲留處。見長干、寶塔輦飛。總閱盡天界。茫茫塵土。任沽酒南岡。壚頭人老。莫問少年歸去。裙屐風流。嘆如許。便畫面薰衣。隱囊揮麈。倚司馬、長城卻敵。空剩春燈燕語。再休言、六代繁華。與半壁乾坤。殘棋孤注。想虎踞龍蟠。江山形勢。都付冷煙疎雨。

原书空白页

明詞綜卷九

青浦 王昶 纂

錢澄之一首

錢光繡一首

季孟蓮一首

賀裳二首

李燁二首

王翹一首

沈自徵一首

沈際飛一首

姜實節一首

錢士賁一首

杜濬一首

紀映鍾一首

陸嘉淑一首

韓純玉六首

周質六首

朱茂爰二首

孫紹祖一首

顧朝楨一首

顧志一首

裘昌今一首

張草四首

錢澄之

字斂光·初名秉鐙·桐城人·有藏山閣藁、田間集·

鶴冲天

題蕪鮫小像·和葆勳原韻·

雲沙月渚夢裏曾遊處。春草夜來生。催佳句。爲金門待詔。總交付漁家住。賴詩
朋酒侶。唱和新聲。譜入舞中歌筵。扁舟曉暮。難趁秋風去。覓取故鄉鱸。和煙
煮。又飛觴刻燭。且同聽。燕山雨。吾衰心未許。扶醉追歡。不減舊年情緒。

錢光繡

字聖月·寧波人·

臨江仙

春情

酒國投時輒醉。硯田荒久慵耕。不堪落葉兩三聲。病從秋後減。愁向雨中生。

拊劍還歌白石焚香閒展黃庭。徘徊山寺又鐘鳴。鴉啼歸曉樹。蛩語伴疎燈。

李孟蓮

字叔房。無爲州人。

滿江紅

春情

燕子何時啣去了。舊年人約。鎮簾櫳。慳慳春睡。東風徧惡。夜雨忽添窗外草。曉晴亂惹樓頭鵲。算贏來一段好相思。何曾學。而今事。當初錯。別時淚。空流落。怕歸來重問。有詞難卻。天遠夢隨驄馬倦。晝長人並風箏弱。望河橋。萬柳纖黃。煙愁遮幕。

賀裳

字黃公。丹陽人。有紅牙詞一卷。

王阮亭云。紅牙詠燕詞。斜日拖花。微風撲絮。不獨措語之工。正如柳塘花塢之詩。讀之便覺春光駘宕。彭羨門云。紅牙一集。其刻劃迷離處。西陵松柏。北里菖蒲。屢遺纓絕。宛然在目。鄭程村云。余過金閨。拓庵爲余言。黃公少時風流倜儻。在青樓桃葉間。大有佳話。醉花陰卽事。入之北里志中。猶令讀者想十四樓風味也。

蝶戀花

春暮

薄暮銀塘風色靜。閑倚雕闌。自賞娉婷影。一簇芙蓉相掩映。唾花落處游鱗競。
女伴潛呼渾未醒。橫睇迴波。纔訝紅粧並。飛盡殘霞天又暝。柳梢笑指新懸鏡。

漁家傲

別曉

啼罷荒雞衰雁接。熒熒寒焰窗猶黑。欲別重將酥手執。行又立。門前瘦馬嘶殘月。
遞得金鞭紅袖濕。回頭已被疎林隔。獨倚高樓看去轍。鈴音絕。纖腰憑久雕闌熱。

李

煒

字赤茂
嘉善人

浣溪沙

修竹天寒倚翠蛾。鴛鴦霜重雁聲過。更長無寐倚雲和。
桃葉渡頭頻問信。石

尤江上怨風波。人生憔悴是情多。

南鄉子感懷

談笑解吳鉤。客滿西園花滿洲。記得河橋分手路。悠悠。哀笛山陽幾度秋。
灑落向神州。極浦遙天不盡愁。花月春江渾是夢。休休。老作人間馬少游。

王翹

字介人。嘉興人。布衣。有二槐堂詞。

陳臥子云。介人詞有俊逸之韻。深刻之思。與昇元父子。汴京諸公。聯鑣競逐。何得有下駟。王邁人云。余兄介人專習詞。集必備諸調。調復備諸體。二槐堂稿遂以千計。迨遭盜。盡沈之江。身亡。無有存者。余兒援聞鹿城何太初有選本。求得之。乃十之二三也。陳大樽序之。余梓之以俟世之閱者。

水龍吟花落

春陽恰照空園曉。鶯啼倦殘紅冷。芳魂無據。冰簾斜撲。亂拋芳徑。力弱絲遊。心
疎蝶過。召還煙景。問餘春未遠。悠揚何事。依然就。風中影。門外晚寒猶遑。正

無聊、斷腸人醒。新巢燕子，啣來尙濕。小樓初暝，露重晨留。泥香夜葬，沾衣微省。更一溪暗水，吹成罨畫，繡萍千頃。

沈自徵

字君庸。吳江人。

朱竹垞云：沈氏多才，自詞隱生環訂正九宮譜，爲審音者所宗。君庸亦善填詞，所撰輓歌伎、灞亭秋、諸雜劇，慨當以慷，世有續錄鬼簿者，當日爲第

一流。

鳳凰臺上憶吹簫

閱古今名媛詩集

霧鎖春風，煙埋秋月，一生心事全休。恰雨窗弔古，檢點鴛儔。多少名姝珠淚，虛染就、錦筆銀鈎。傷情處，金環不見，玉葉空留。擡頭斜陽荒塚，原來是、綺閣粧樓。悵塵緣雖破，夢境難收。說甚裁雲好手，也幾度、驚徹雞籌。沉吟久，知音罕嗣。若個能酬。

沈際飛

字天羽。崑山人。

虞美人

春晚

塔前嫩綠和愁長。坐憶眠還想。花紅破夢似相憐。起望小林殘萼損容顏。雙
鶯又向愁人絮。春也知歸去。個人只是不思家。生卻楊花心性落天涯。

姜實節

字學在萊陽人

臨江仙

紀遊

夢斷羅幃春睡淺。小樓風竹頻敲。溪流一曲抹山腰。雨香初拂柳。日氣漸烘桃。
笑解金龜同買醉。故人雅集金宵。鬪詩量酒興還饒。曉鐘齊女墓。殘月大姑橋。

錢士賁

字巖燭嘉善人

行香子

上溪

桃浪溶溶。絲裊晴空。喜盟鷗、獨自攜筇。春衣催浣。試付奚童。見苔痕染。酒痕漬。

墨痕濃。水流雲去。相看無盡。愛吾廬。近隔溪東。晚廚煙翠。歸步從容。有柴桑柳。輞川杏。灤西松。

杜

濬 字于皇。黃岡人。

浣溪沙

紅橋卽事

曲曲紅橋漲碧流。荷花荷葉幾經秋。誰翻水調唱涼州。更欲放船何處去。平山堂下古今愁。不如歌笑十三樓。

紀映鍾

字伯紫。上元人。

風中柳

春曉

春盡荒城。白水溶溶一片。小橋橫。綠楊如線。幽禽罷浴。相喚平沙軟。晝偏長。凭闌人倦。朱輪寶騎。儘與年光流轉。問王孫。歸期何晚。連山芳草。遮斷天涯面。悄冥冥。珠簾頻捲。

陸嘉淑 字冰修·海寧人·諸生·有辛齋遺稿·

漢宮春 客中九日

極目平蕪。見疎林蕭颯，遠水瀾漫。舉頭一聲衰鴈，別淚空彈。秋容慘淡，但心傷、行路艱難。何況是、重陽時節，天涯風景淒然。長恨征途憔悴，嘆敝裘風雨，疲馬關山。爲問故園黃菊，知有誰看。風吹破帽，漫憑高一醉尊前。渾未解、遠遊何意。白雲回首江天。

韓純玉 字子蓮·歸安人·有蓮廬詞一卷·

虞美人

一簾花影春風夜。月到薔薇架。綺疏一半晚猶開。只爲畫梁雙燕未歸來。挑燈約莫黃昏過。猶自薰香坐。星河耿耿傍闌干。留取小窗相對晚妝殘。

浣溪沙

明詞綜 卷九

手捲蝦鬚上玉鉤。疎疎急雨下梧楸。韶生怕付東流。紅葉窗中無俗事，白雲鄉裏有溫柔。好留雙鬢莫教秋。

菩薩蠻

夏日訪潘子見歸舟作

夾山一帶山平遠。湘溪問字歸家晚。荷氣晚來多。斜陽雨半簑。吾生何所寄。泛宅浮家去。蒼水碧於天。孤舟獨往還。

清平樂

春來消息早。過三之一。乍暖餘寒無氣力。二十四番風急。日長花事相宜。只愁開到荼蘼。偶向晴窗弄墨。拈詩又是無題。

小重山

和稼軒韻

萬頃玻璃水接空。雨蓑煙笠下。一漁翁。荷香斷續柳西東。秋光好。兩岸插芙蓉。十里水晶宮。有時隨浪去。笑兒童。三秋幾陣鯉魚風。斜陽外。沉醉荻花中。

江城子

眉峯煙鎖未分明。過秦青。恨零星。一樹櫻桃。微雨夢難醒。月在當頭杯在手。愁似海。總填平。春宵三五好心情。繞紅亭。笑聲盈。促席傳觴。倚醉聽搗箏。嫌煞銅壺銀漏短。香炷燼。燭花橫。

周 貧

字青士·嘉興人·布衣·

生查子

切切亂蛩悲。暗與羈魂語。深夜苦懷人。臥聽芭蕉雨。煙霧障林巒。秋夢行何處。孤鴈落西風。聲咽寒蘆渚。

又

徑轉翠屏開。一片茶蘼雪。不待晚妝成。自下香階折。鶯是故園鶯。月是當時月。誰分比來心。祇覺看承別。

踏莎行

蘆月凝霜。蕉風作雨。飄飄葉落梧桐樹。蛩吟底事動哀音。不知人在愁深處。
鶴怨空鳴。鴻孤遠度。傷心又被秋光誤。怪他有夢不歸來。雲山豈礙魂歸路。

蝶戀花

芳草生煙橫野渡。綠到春山。山色深於樹。離恨年年縈別緒。桃根桃葉秦淮路。
眼底韶華容易度。燕子斜陽。說與歸期誤。婪尾餘花春已暮。柳絲不解牽伊住。

東風第一枝

春日

南浦拏舟。東郊列幕。中甸準擬攜酒。恁教壓雨欺煙。幾時小桃紅透。魚牋訊遠。
要修禊。山陰人舊。倩好風爲掃苔茵。池水儘他吹皺。更明日、垂楊繞堠。早今日、芳蘭密牖。麗詞一曲歌成。那尋雪兒繡口。無多春色。總莫負、燕前鶯後。可憐

是幾個黃昏，多半憶君時候。

又遊峽山

六寺煙深，雙峯黛冷，嬉遊時際暄暖。曲塘畫鷁參差，艤來荻芽沙淺。嬌春羅綺，映綠淨、波紋吹軟。儘瘦生、掌上誰擎，漫認倚風輕燕。簾乍捲、垂楊拂眼。門半掩、小桃窺面。歌雲日趁新妝，淚竹幾巡古苑。微茫林角，掛一抹、殘楊如線。怕後遊、晴雨無憑，有約也應難見。

朱茂凋

字子容·秀水人·諸生·

驀山溪

雲藍小袖約素隨堤柳。翠黛遠山橫。描不就。一雙眉秀。嬌波明盼，著處更留人。情初逗。盃殘酒。雙陸垂纖手。芳心半有。玉紐教郎扣。不道解相思。恁花枝、爲誰消瘦。幽窗曲檻，燈火二更餘。歡未久。宵空負。那正歸時候。

選冠子

聞秋蟲有感

半枕留寒。一簾凝露。四壁秋蟲愁聽。淒其訴月。斷續吟風。不管孤眠不穩。還似初離別時。絮語喁喁。柔情耿耿。助幽懷。作出悲涼情緒。伴他長恁。記那日。步襪宮彎。蒼苔移印。寫盡梧桐清影。迴廊笑織。曲檻鳴絲。攜手紅樓嬌俊。誰分今宵。對伊荒館。敗籬喚人孤另。歎行雲。何日重逢。枉憶露臺玉井。

孫紹祖

字君裘。嘉善人。諸生。

謁金門

春雨足。香嫩枝頭微綠。渭水清清寒漱玉。客來茶正熟。午倦不堪重讀。點就乳花飛瀑。七碗可人涼氣肅。瀟瀟風助竹。

顧朝楨

字以寧。有匏園初集。

菩薩蠻

次爾斐韻

籠煙弱柳絲如帶。鶯梭織就朱闌外。芳草意綿連。王孫醉欲眠。
牛背斜陽笛。杜宇月三更。淒清分外明。新蘿蔭古壁。

顧

志字存英·有
暉吉堂稿·

生查子

臘梅

幽香度月遲。瘦骨凌霜老。瀟灑自天然。驛路花開早。
從教纖手栽。眉黛晨粧巧。獨有歲寒心。別笛聲吹曉。

裘昌今

字梅倩·有
書仙閣詞·

醉花陰

雨夜

窗前疎雨冷瀟瀟。銀燈暗復挑。斷腸清漏永。聲聲葉上。滴碎可憐宵。
半閒衾枕轉無聊。相思興復饒。楚天人遠。倩得夢兒嬌。

張

草字石陽·有
繡香集·

明詞綜 卷九

生查子秋怨

寒井下梧桐。葉葉秋風繞。何處寄相思。月落燈殘了。淚界臉波紅。夢怪巫山杳。記得別郎時。雞唱千林曉。

南鄉子

芳草翠煙濃。蕉葉零零夜雨中。無數浮萍風皺轉。情同。殘夢天涯斷遠鐘。獨立在簾櫳。雙燕新扶柳岸風。鷓鴣衝寒花事晚。繁紅。滴濕胭脂落幾叢。

河滿子中秋

月破秋寒灑背。霜沾露影侵牀。玉笛幾聲今夜起。記來曲子霓裳。孤杵愁連村落。吹笛夢入瀟湘。鉛水瀉如清淚。江楓絢似紅粧。啼鴈半行蘆荻老。晶晶波下橫塘。往事思君一夜。明朝直欲迴腸。

金菊對芙蓉閨怨

寒漏初更。枕函虛冷。惱來索性思量。見臨風敗葉。月下清光。樽前恨滿。幃幃寂。
灞陵路。煙水茫茫。竹聲動處。箇人不見。影到紗窗。空房幾遍。回腸。想尋閒鬪
草。遣悶吟香。奈燕儂鶯倦。空誤年芳。生盟念念。猶難冷。輕離別。屢變星霜。最傷
情是。春花啼鳩。秋雨鳴螿。

原书空白页

明詞綜卷十

青浦 王昶 纂

張文秀一首

陸亮輔一首

裘律一首

唐世瀚一首

李伊玉一首

胡文煥一首

江廣一首

顧衆一首

喻綜一首

張仲立一首

倪撫一首

徐爾鉉一首

霍達一首

吳楨一首

郭輔畿一首

沈士鑛一首

沈鍾鶴一首

陸釋麟一首

梁木公一首

秦公庸一首

梁希聲一首

吳莫勝一首

陳琴溪一首

張卿玉一首

天隨子一首

杜陵生一首

無名氏三首

釋涵初一首

道源一首

今釋二首

一靈八首

張無爲一首

張文秀

見西湖志餘

念奴嬌

西湖

平湖秋霽。見銀蟾光閃。波紋搖綠。天上飄來風韻細。桂子香生金粟。玉戶玲瓏。

瑤臺皎潔影落嫦娥屋。夜深雲際一聲誰弄橫竹。醉倚六曲雕闌望中懸白練。兩峰垂瀑淨洗塵腸。擣秀句一唾珠璣千斛。更欲凌空鏗鏘環珮。仙駕駢鸞。鵲鳳樓人遠。獨憐不見秦玉。

陸亮輔

字左臣。見蘭皋明詞。

桃源憶故人

舟次瓜步。徐姬石蓮懷。

桃花碎影江如靛。隔斷相思一半。昨夜曾題紈扇。鏡裏蓮如面。無邊春草江南怨。好夢被誰偷換。柳外老鶯啼遍。報道看花晚。

裘律

見西湖志餘。

小重山

湖上春遊

山遶平湖鏡。遠山隄邊千樹柳。綠穆穆。杏花嬌倚玉闌干。秦樓畔。小鳥語綿蠻。紅粉試輕紈。笙歌吹畫舫。漾飛鸞。酒旗撩亂繫雕鞍。春色暖。芳草弄晴灣。

方文席

字我劬。見東白堂詞選。

河滿子

客歸

簾下楊花似雪。枕邊香膩如雲。爲我飄零蹤不定。幾年獨自黃昏。誰信桃花依舊。只留月印重門。鈿鑽龍膏不煖。繡殘鳳履猶存。日暮碧雲空自合。漫教燕語殷勤。簡得鮫綃紅淚。今朝借作招魂。

唐世瀚

字宗之。見歷代詩餘。

攤破浣溪沙

初夏

寂寂閒庭雨乍晴。綠陰如幄午風輕。幾轉柳塘迷斷岸。野橋平。滿架薔薇花欲謝。趁風燕子掠浮萍。慵臥小窗驚喚醒。被流鶯。

李伊玉

見歷代詩餘。

惜分飛

握扇美人圖

花雨繽紛迷小院。蓮步踏殘香片。粉汗搖紈扇。輕紗微露黃金釧。夕照山橫
天一線。水影分光上面。錦帶隨風纏。釵斜爲逐雙飛燕。

胡文煥

見蘭皋
明詞

一剪梅

秋感

雲葉銀牀落井柯。望斷關河。腸斷關河。年華冉冉去如梭。秋影婆娑。鬢影婆娑。
越女含情竹上歌。嬌斂雙蛾。愁斂雙蛾。芭蕉冷語咽聲多。客裏風波。夢裏風
波。

江廣

見蘭皋
明詞

昭君怨

柳色

低映垂簾庭院。蟬語不知深淺。斷續好風牽。幾曾閒。侵晚翠筠同茜。渾了雲
山一片。欹影幾條妍。夕陽邊。

顧 衆 一作顧同應
見蘭皋明詞。

浪淘沙 閨思

生小弄冰鉉。未撥先憐。澀鶯嬌燕語春煙。一點幽情傳未得。殘月窺簾。銅雀鎖嬋娟。驚數流年。小桃窗下背花眠。誰唱西陵腸斷句。夢到君邊。

喻 綜 見歷代
詩餘。

南浦 滕王閣
懷古

天高氣爽。看平楚。落葉動秋聲。南國驚霜。征雁帶影下寒城。漠漠輕舟過雨。濕帆飛遠。幾點微星。更蕭條鴉集。陌頭衰柳。殘照萬峯青。瑟瑟江城染練。從前何事不凝情。日月銷磨。今古不見舊旗旌。青雀黃龍何在也。堦除惟有樹長生。嘆去來。月上欄杆。空際水波明。

張仲立

見蘭皋
明詞。

浣溪沙

情題

淺東深粧最可憐。明眸玉立更娟娟。撩人多在夜燈前。旖旎海棠初着雨，飄
蕭江柳乍含煙。倚窗一樣受春妍。

倪

撫

字曼倩。見蘭皋月詞。

菩薩蠻

送春

年年白放春歸去。無端又是風和雨。倦態不成妝。春宵恨轉長。一燈紅夜午。
城上聞更鼓。魚鑰鎖雙扉。愁他夢裏歸。

徐爾鉉

字核庵。見蘭皋明詞。

臨江仙

春盡

春光不奈人煩惱。夜來也動歸心。輕紗敲雨濕窗明。風多花有恨。林暗蝶無情。
竹杖閒攜隨徑去。斜陽一派松聲。茶旗酒陣破愁城。借雲邀片月。倩鳥喚新

晴

霍

達

字魯齋。

見蘭皋明詞。

意難忘

雨夜

雨顛風搖。正百花時候。夜截春梢。挑燈驚鼠夢。拭淚掩鮫綃。釵鈿冷。珮環遙。玉
鑑遠山消。更可憐。心香燼夜。幼子啼宵。當年攜手遊遨。似丁香、心展芭蕉。尋
花纔減繡。話雨暗添膏。思往事。付春朝。賺殺舊魂飄。誓今生、夢長睡短。暮暮朝
朝。

吳

楨

字永錫。
見歷代詩餘。

西江月

泛秋

極目煙波渺渺。停舟楊柳家家。櫓聲咿軋戰風鴉。寂寞寒潮西下。呼我埽愁
紅友。看殘籬畔黃花。人生適志不須他。竹屋蓬窗聊且。

郭輔畿 字咨署·
見蘭皋明詞·

浣溪沙 春
閨

海北相思尚有涯，輕寒驀地惱情懷。羞看孤影鏡慵揩。戲向海棠花下過，惹他珠露濕羅鞋。摘雙梅子戴金釵。

沈士鑛 字寶臣·
見歷代詩餘·

鵲橋仙 漁
父

澄潭集網，寒江垂線，雪白鱸魚成串。西風吹送酒花香，促步向、壚頭索換。竹篙枕月，蓑衣遮面，一曲滄浪天半。乾坤水上最清閒，也自分、煙波占斷。

沈鍾鶴 字同庵·
見歷代詩餘·

虞美人 春
雨

春光九十誰分取，斷送晨昏雨。桃花和淚濕胭脂，檢點殘紅一半未開時。長

空擬把愁雲埽。如夢渾難曉。柔腸不斷却迴環。咫尺相思人隔萬重山。

陸釋麟 字嬰彌。見歷代詩餘。

八聲甘州 曉發

曉風清灩灩。待潮生潮落始行舟。正雞聲茅店。孤城斷角。欵枕悠悠。偶爾掀篷一笑。起舞也風流。問誰人領取。此景清幽。極目長空杳靄。但寒煙衰草。江練明樓。羨雙雙白羽。天水共沉浮。待乘桴。漸窮湖海。莫思量。錦纜與鳴騶。菰蒲裏。煙波釣叟。分付盟鷗。

梁木公

見草堂新集。

蝶戀花

春景

野草含煙鋪紫陌。海燕來時。芳徑多凝碧。影月低枝漸漸側。惜花微雨輕輕滴。靜掩朱扉春院寂。芍藥欄邊。 一作開時。 睡起嬌無力。宿鳥不須尋比翼。有人獨

倚閒亭北。

秦公庸

見草堂
新集。

卜算子

憶
昔

憶昔約佳期。花月爲盟主。共對花前月下時。幽恨從頭數。拜月月無言。問花
花不語。月轉闌干花卸枝。雙淚多於雨。

梁希聲

見草堂
新集。

浣溪沙

清
明

滿徑殘花襯履行。煖風吹颺薄羅輕。綠楊拖覆小橋橫。日午繡簾酣睡燕。雨
餘芳樹嚙流鶯。暮春天氣更關情。

吳莫勝

見草堂
新集。

浣溪沙

春
閩

明詞綜 卷十

午夢誰驚樹影搖。玉樓人倦倚紅綃。遊絲繫滿杏花梢。蜂逐窗櫺迷去路。燕尋壘草未歸巢。風箏線斷傍雲高。

陳琴溪

見草堂
新集。

漁家傲

蕩漾明波晴晝永。淡煙疎柳湖邊景。一葉水雲深處艇。天未暝。片帆掛破殘陽影。篷背落霞人半醒。溶溶千頃搖金鏡。繡被還愁添暮冷。風不定。蘆花飛滿雙吟鬢。

張卿玉

見詩
餘醉。

青門引

水曲紅波冷。幾樹小桃搖影。憐春情性未分明。天台人近。一線香風引。青陽踏破芳魂醒。十二欄杆靜。口脂紅印。鸚鵡窗前。難數春歸恨。

天隨子

見蘭皋
明詞。

南鄉子

華亭
弔古

風雨滿長亭。鶴唳灘頭夢未平。故國王孫何處去。傷情。煙月空濛白苧城。往
事恨飄零。江上青山雲自橫。聞說尊鱸秋更好。淒清。漫憶風流張步兵。

杜陵生

見蘭皋
明詞。

南歌子

塞
上

草煖鴛鴦泊。沙寒雞鹿城。蘆管一聲聲。故鄉千里月。夢難成。

無名氏

見詩
餘醉。

踏莎行

香罷宵熏。花孤晝賞。粉牆一丈愁千丈。多情春夢苦拋人。尋郎夜夜離羅幌。
好句刊心。佳期束想。纔愁春到還愁往。銷魂細柳一時垂。斷腸芳草連天長。

又

佳約偏乖。韶華難駐。柳絲點點江頭樹。朝來爲甚不鈎簾。殘花飛滿簾前路。
春賞纔闌。春歸何遽。問春歸向何方去。有情燕子不同歸。呢喃獨伴春愁住。

臨江仙

昨夜驚眠梅雨大。枕前窗上頻敲。天明翻覺夢魂遙。起來看女伴。熏袖半香消。
雲鎖房櫳煙鎖竹。捲簾微溼鮫綃。菱花低照映眉梢。玉梳雲髮潤。不喜上蘭膏。

涵初

柳梢青

詠螢

碧燄疎篁。斜飛秋水。輕點蓮香。忽影風簷。半明苔壁。又入繩牀。夜深露冷清
光。度殘月。亂點蒼茫。羅幌眠雲。松窗幽磬。心地空涼。

道源

字石林·常熟破山寺僧·有寄巢集·

浣溪沙

寄衍公

故侶湖南不肯歸。水洲貪看野鳧飛。竹房辜負綠蕉肥。 鱸冷博山清話隔。簾開湘水倦眠稀。信音莫待寄秋衣。

今

釋字澹歸·杭州人·

小重山

得程民部詩却寄

落落寒雲曉不流。是誰能寄語。竹窗幽。遠懷如畫一天秋。鐘徐歇。獨自倚層樓。 點點鬢霜稠。十年山水夢。未全收。相期人在別峯頭。閒鷗意。煙雨又扁舟。

八聲甘州

留別阿字無兄

歎離情一往一重來。可似海門潮。已千秋期許。十年建立。兩地憂勞。又道如形伴影。彼此不容招。底事扁舟上。回首迢迢。待向梅關北去。倩賓鴻寄語。雲關

天高想聞聲欲下，轉眼失鷓鴣。更有時，連牀續夢，怕冰霜、折斷歲寒梢。晨鐘起，添些風雨，相助蕭蕭。

一 靈

滿庭芳

蒲城惜別

金粟堆邊冰蒲水畔，紫驢迢遞迎來。月中驚見光艷似雲開。桑落霑唇半醉，將長笛、弄向秦臺。天明去，鞭揮岸曲，愁殺渡人催。徘徊空歎息，桃花易嫁，鳳子難媒。和香雨氣氳飛作塵埃。墜井銀瓶永絕，誰復取，僊渡盈杯。應知爾，三春繡閣幽寂，委蒼苔。

浪淘沙

春草

嫩綠似羅裙。寸寸銷魂。春心抽盡爲王孫。不分東風吹漸老，色映黃昏。蝴蝶不留痕。飛過煙村。紅藏幾點落花魂。雨過苔邊人不見，濕欲生雲。

一落索

杜宇催春從汝。莫催人去。人留卽是好春留。更一任、風和雨。怕見遊絲飛絮。爲伊無主。落花爭似淚花紅。只滴在、分襟處。

離亭燕

漸到鷓鴣多處。愁作一天風雨。芳草可憐千萬里。長共夕陽無主。且莫返鄉關。已有斷魂飛去。雲際片帆難駐。江上一竿誰許。空妬白鷗來復往。笑我飄零倦羽。掩淚似春山。終日濛濛洲渚。

調笑令

芳草、芳草。生向江邊太早。連天一片春愁。不管王孫淚流。流淚、流淚。點點桃花吹墜。

江城梅花引

黃花和我滿頭霜。怕重陽。又重陽。不分早梅。還與鬪寒香。老去看花如霧裏。被
花惱。一枝枝。總斷腸。斷腸斷腸。苦參商。夜已長。天已涼。一葉一葉。落不盡。悲
似瀟湘。那得羅浮清夢。到蘭房。明月笑人眠太早。飛去也。影徘徊。尙半牀。

摸魚兒

與友人別

放蘭舟。溯江西上。渺茫雲樹何處。天涯相見頻相別。同作水邊風絮。春欲去。恨
故苑鶯花。總付煙和雨。離情罷訴。教夜半啼鴉。聲聲向月。爲寫此愁苦。思重
會。定在吳閭古渡。吹簫城下。應許英雄失路。皆無策。漸使浣紗憐汝。君莫取。鴻
鵠在他時。自有凌霄羽。功名糞土。且滿酌霜醪。還攜漁艇。共醉白蘋渚。

張無爲

嗣漢四十三代天師。
有峴泉集。詞附。

風入松

和虞學士韻

江城淹病酒難酣。疎髻訝朝簪。暑消已覺秋光遍。紅塵遠。斜日回驂。蕙帳累留

殘宿青霜猶濕春衫。春淮潮定碧如藍。歸燕息呢喃。白雲幃幔寒偏早，更誰
問、雁字魚緘。早晚淖聲歸也。黃花白酒村南。

原书空白页

明詞綜卷十一

青浦王昶纂

黃氏一首

劉碧一首

端淑卿一首

顧文婉三首

袁彤芳一首

王鳳嫻二首

陸卿子二首

龍輔一首

徐媛一首

張鴻逵一首

瞿寄安一首

朱盛藻一首

沈宜修五首

張倩倩一首

葉小紈一首

沈憲英一首

項蘭貞一首

商景蘭一首

李玉照一首

葉紈紈二首

葉小鸞七首

沈靜專一首

儲氏一首

申蕙一首

張嫺倩一首

歸淑芬一首

吳綃一首

顧道善一首

謝季蘭一首

陳氏一首

張引元一首

王朗一首

吳山一首

龐蕙纓一首

沈素嘉一首

徐元端二首

周蘭秀一首

武氏一首

翁孺安一首

李端卿一首

黃氏

遂安人。楊慎室。

晚香堂清語·升庵夫人黃氏寄外詩·有曰歸曰歸愁歲暮、其雨其雨怨朝陽之句·傳誦人口·又有滿庭芳、巫山一段雲、諸詞·皆爲雅麗·或比之趙松雪管夫人·然管工畫竹耳·詩詞鄙俚·不及黃遠矣·

巫山一段雲

巫女朝朝豔。楊妃夜夜嬌。行雲無力困纖腰。媚眼暈紅潮。阿母梳雲髻。檀郎整翠翹。起來羅襪步蘭苕。一見又魂銷。

劉碧

字映清。安陸人。

浪淘沙

新秋

昨夜雨綿綿。寒澀燈煙。薄衾倦擁不成眠。曉起床頭看歷日。換了秋天。桐樹小庭偏。碧蔭爭圓。教他知道也淒然。最是西風消息早。一葉堦前。

端淑卿

當塗人。教諭廷弼女。歸芮氏。有綠窗詩稿。

阮郎歸

園林春到清明節。花柳愁攀折。人生何事輕離別。水遠山重疊。杜宇啼殘更月。銀釭照明滅。昨宵有夢輕飛蝶。關心猶未說。

顧文婉

自號避秦人。無錫人。

浣溪沙

風雨妨春苦不寬。開簾怕見嫩紅殘。錦屏深護早春寒。新嬾一身扶不起。愁痕萬點鏡慵看。空拈斑管寫長歎。

又

曉日凝粧上翠樓。惱人春色遍枝頭。溜簾風細蕩銀鈎。燕子未歸寒惻惻。梅花初落恨悠悠。重門深鎖一天愁。

西樓子

月初

雕闌漫倚凝眸。月如鈎。一段晚香薄霧織成愁。
懷人意思鄉味幾時休。除是
夢中暫借廣寒遊。

袁彤芳

字履貞。吳縣人。自稱廣寒仙客。

長相思

風滿樓。月滿樓。月白風清動客愁。征鴻聲且留。
燈半篝。香半篝。燈燼香沉殘
夢悠。歸舟天盡頭。

王鳳嫻

字瑞卿。江南華亭人。進士張本嘉室。有貫珠集。

浣溪沙

行郊

曲徑新篁野草香。隨風閃閃蝶衣忙。柳綿飛墮點衣裳。
人在鏡中憐影瘦。燕
翻波面舞春長。小橋古渡半斜陽。

臨江仙

珠簾不卷銀蟾透。夜涼獨自憑闌。瑤琴欲整指生寒。鶴歸松露冷。人靜井梧殘。
天際一聲新度雁。翱翔似覓回灘。浮生幾見幾多歡。三秋今已半。楓葉醉林丹。

陸卿子

長洲人。尚寶卿師道女。太倉趙宦光室。有元芝、考槃、二集。

憶秦娥

感舊

砧聲咽。梅花夢斷紗窗月。紗窗月。半枝疎影。一簾淒切。
心前舊願難重說。花飛春老流鶯絕。流鶯絕。今宵試問。幾人離別。

畫堂春

晴空煙裊柳絲微。亂紅風定猶飛。杏花零落燕空歸。門外鴉啼。
慵病不禁寬帶。諱愁無那尖眉。香消斜倚畫屏時。此恨誰知。

龍 輔 湖廣人·有女紅餘志·

相見懽

黃鸝啄下紅櫻曲。笑取泥金小扇撲蜻蜓。牽得住。推不去。是春情多少。

柔腸囑付護花鈴。

徐

媛 字小淑·吳縣人·范允臨室·有絡緯吟·

霜天曉角 采石磯蛾眉亭

雙峰鬪碧寒玉橫。秋壁兩道彎環天際。凝無限。青螺色。斷岸濤聲急。似奏臨

邛瑟。鸞鏡綠窗人去。惟留取春山跡。

張鴻逵

字琴友·慈谿人·姚興祚室·有清音詞·

孫蕙媛云·每有廣咏·意到卽成·不煩推敲·聲出金石·

點絳脣

與馮太君話舊

明詞綜 卷十一

相見空憐許多心事難傳與不如歸去又被黃昏雨
明月多情還照橫塘路
添愁緒幽闈深處重憶連牀語

瞿寄安

韓敬室

長相思

寄于夫人

朝含顰暮含顰風動疎簾疑是君相思欲斷魂
試羅裙褪羅裙鴛瓦霜飛病
又新天涯兩地人

朱盛藻

字瓊猗黃州人楚宗女

蝶戀花

柳影

永日三眠顰較嫵困態初舒莫遣紅妝妬自有明珠生遠浦舞低恍向樓心覷
拂地長條誰是主露下芙蓉只恐難留住好趁煙光凝地護交枝漫鎖長門路

沈宜修

字宛君·吳江人·葉紹袁室·

浣溪沙

淡薄輕陰拾翠天△。細腰柔似柳飛綿△。吹簫閒向畫屏前△。詩句半緣芳草斷△。鳥啼多爲杏花殘△。夜寒紅露濕秋千△。

虞美人

立春

東風已上堤邊柳△。雪意還依舊△。畫羅綵勝學裁新△。不道閑愁又送一番春△。年華只是侵雲鬢△。花信何由問△。待看雙燕幾時來△。猶憶杏花長對月徘徊△。

浣溪沙

侍女隨春·羞作嬌憨之態·諸女咏之·余亦戲作·

袖惹飛煙綠鬢輕△。翠裙拖出粉雲屏△。飄殘柳絮未知情△。千喚嬾回佯看蝶△。半含嬌雨恰如鶯△。嗔人無賴惱秦筝△。

如夢令

蕭瑟西風初動。又是一番涼送。燈蕊小窗斜。往事不堪新夢。愁重。愁重。綆短銀屏水凍。

望江南

秋暮

河畔草一望盡淒迷。金勒不嘶新寂寞。青袍難覓舊葳蕤。野燒又風吹。蝴蝶去。何處問歸期。一架鞦韆寒月老。滿庭鷓鴣故園非。空自怨萋萋。

張倩倩

吳江人。沈自徵室。

蝶戀花

丙寅寒夜與宛君話君庸作

漠漠輕陰籠竹院。細雨無情。淚濕桃花面。落葉西風吹不斷。長溝流盡殘紅片。千徧相思纔夜半。又聽樓前。叫過傷心雁。不恨天涯人去遠。三生緣薄吹簫伴。

葉小紈

字蕙綢。吳江人。同邑沈永禎室。

浣溪沙

爲侍女
隨春作

髻薄金釵半鞦輕。佯羞微笑隱湘屏。嫩紅染面太多情。
長怨曲闌看鬥鴨。慣
嗔南陌聽啼鶯。月明簾下理瑤箏。

沈憲英

字惠思
吳江人

點絳脣

憶瓊
章姊

簾外輕寒。謝娘風絮無人見。桃花如面。腸斷春歸燕。
人去瑤臺。祇覺東風賤。
湘簾卷。綠楊千線。煙鎖深深院。

項蘭貞

字孟晚·秀水人·黃卯錫
室·有葳雲、月露、二草。

攤破浣溪沙

淅淅寒風撼玉鈎。起來斜日照紅樓。簾外一聲鸚鵡喚。喚梳頭。
花發小春情
脈脈。笛吹長夜恨悠悠。多少淚珠彈不斷。倩誰收。

商景蘭

字媚生·會稽人·祁彪佳室·

搗練子

長相思久離別。爲誰憔悴憑誰說。卷簾貪看月明多。斜風恰打銀釭滅。

李玉照

會稽人·吳江沈白徵繼室·

漁歌子

愁思縈懷懶賦詩。黃昏深院月來遲。人靜處。漏殘時。一片幽情祇自知。

葉紈紈

字昭齊·吳江人·葉紹袁女·有愁言·

蝶戀花

盡日重簾垂不捲。庭院蕭條。已是秋光半。一片閑愁難自遣。空憐鏡裏年華換。寂寞香殘門半掩。脈脈無端。往事思量遍。正是銷魂腸欲斷。數聲新雁南樓晚。

浣溪沙

幾日輕寒懶上樓。重簾低控小銀鈎。東風深鎖一窗幽。畫永香消春寂寂。夢殘燭跋思悠悠。近來長自只知愁。

葉小鸞

字瓊章。吳江人。崑山張立平聘室。有返生香。

鈕玉樵云。小鸞父仲韶。風神雅令。工六朝駢體。同沈宜人宛君偕隱汾湖。與子女刻意詩詞。以自娛樂。小鸞生十歲。能韻語。秋夜仲韶命以句云。桂寒清露濕。卽對曰。楓冷亂紅彫。是時以爲天折之徵。及未婚而歿。見有五彩雲捧足而去。知前身爲嶺南女仙。今當歸月府。適有冥中比邱尼智泐。傳天台教起無葉堂。以收女士慧業而早亡者。小鸞從之。泐師審戒。信口答應。如研香製就夫人字。鏤雪吟成幼婦詞。凡十餘聯。皆晚唐名句也。泐師留之堂中。與姊昭齊薰習梵行。所存詩詞。皆似不食人間烟火者。

南歌子

門掩瑤琴靜。窗消畫卷閒。卷庭香霧透闌干。一帶淡煙紅樹。隔樓看。雲散青天瘦。風來翠袖寒。嫦娥眉又小檀彎。照得滿階花影。只難攀。

虞美人 燈

深深一點紅光小。薄縷微煙裊。錦屏斜背漢宮中。曾照阿嬌金屋。淚痕濃。朦朧穗落輕煙散。顧影渾無伴。香消午夜漫凝思。恰似去年秋夜。雨窗時。

點絳脣

新柳垂條。困人天氣。簾慵捲。瘦寬金釧。珠淚流妝面。凝佇憑闌。忽覩雙飛燕。閑愁倦。黛眉淺淡。誰畫青山遠。

浣溪沙

紅袖香濃日上初。幾番無力倩風扶。綠窗時掩悶妝梳。一晌多情兼刺繡。近來聊喜學臨書。鳥啼春困落花疎。

又

幾日東風倚畫樓。碧天清靄半空浮。韶光多半杏梢頭。垂柳有情留夕照。飛

花無計却春愁。但憑天氣困人休。

又

曲曲闌干遠樹遮。半庭花影帶簾斜。又看暝色入窗紗。
樓外遠山橫寶髻。天邊明月伴菱花。空教芳草怨年華。

又

曲榭鶯啼翠影重。紅妝春惱淡芳容。疎香滿院閉簾櫳。
流水畫橋愁落日。飛花飄絮怨東風。不禁憔悴一春中。

謁金門

情脈脈。簾捲西風爭入。漫倚危樓窺遠色。晚山留落日。
芳樹重重凝碧。影浸澄波欲濕。人向暮煙深處憶。繡裙愁獨立。

沈靜專

字曼君。宜修妹。歸吳氏。有適適草。

明詞綜 卷十一

二三五

蝶戀花

詠蝶

舞向低檐依嫩綠。翠冷天涯。影斷吹愁續。幻就雲衣飛態足。粉煙浥露枝頭浴。
風動猶疑翻紫玉。引得佳人。誤入花陰撲。靜斂香鬢還自宿。蜂媒覓伴仍相促。

儲

氏

秦州人。與化成某室。

浣溪沙

紫燕雙雙遶畫梁。重重朱戶鎖斜陽。閉來獨坐繡鴛鴦。
芳草盈階侵砌綠。落花滿院隔簾香。空庭寂寞日偏長。

申

蕙

字蘭芳。長洲人。嘉興沈某室。有縫雲集。

長相思

月滿衣。葉滿衣。玉漏初停銀漢低。砧聲到竹扉。
事已非。人已非。滿目淒涼何

日歸雁沉夢又稀。

張嫺倩

字蓼山·廬州人·
有蕉窗逸韻·

菩薩蠻

連城
山房

風捲落花愁不歇。枝頭燕剪裁桃葉。花氣沁簾香。遊絲掛綠窗。蕉青鸞翅影。草碧龍鬚冷。無語對瑤琴。閑花落膽瓶。

歸淑芬

字素英·嘉興人·許某
室·有雲和閣靜齋詩餘·

東坡引

泛舟訪皆
令閩友

櫻桃紅已足。日觀苔痕綠。綸竿釣罷清溪曲。一村桑落熟。一村桑落熟。閒愁莫展。翠蛾頻蹙。強抱清琴對修竹。池邊有侶堪聯續。山兒畫半幅。山兒畫半幅。

吳

綃

字冰仙·長洲人·常熟許
文玉室·有嘯雪菴稿·

憶王孫

寒砧風急搗衣秋。木落聲中人倚樓。月午涼陰滿地愁。夢悠悠。一夜江南千里舟。

顧道善

字靜簾。吳江人。許季通室。

滿江紅

移居嚴莊有感

禾黍斜陽村皋外。江霞飛滅。回首去、依稀風景。繁華銷歇。沼冷鴛鴦荷碎雨。臺荒麋鹿松搖月。忽一聲、野寺斷鐘過。疎籬缺。清曉怨、簾鈎揭。王孫夢、鶻啼竭。問天涯何處。銅仙金闕。猿鶴三秋淹短草。風雲萬里悲高碣。料明朝好鏡不相。瞞霜侵髮。

謝季蘭

字湘芷。寧都人。魏禧室。

阮郎歸

秋夜

數盡更籌夢未成。秋聲不忍聽。起來且自剔殘燈。誰家玉笛聲。風纔定、月初

升清光漸漸生。一行花影上窗櫺。動人無限情。

陳氏

江南華亭人。有梅龜吟。

謁金門

春欲暮。簾外落紅無數。斜倚曲闌渾不語。笑看雙燕舞。
惆悵夜來風雨。吹散滿城花絮。一段夕陽留不住。馬嘶芳草去。

張引元

字文殊。江南華亭人。楊安世室。

點絳脣

答母

細雨初晴。暖風早入芭蕉院。歸期日盼。鬆盡黃金釧。
病起南樓。愁覩梅梁燕。無由見。白雲天遠。十二闌干遍。

王朗

金壇人。彥泓女。

浪淘沙

閨情

明詞綜

卷十一

二二九

疎雨滴青筵。花壓重檐。繡幃人倦思厭厭。昨夜春寒眠未足，莫捲湘簾。羅袖
護摻摻。怕拂香奩。獸爐香倩侍兒添。爲甚雙蛾常鎖翠，自也憎嫌。

吳

山

字岩子·當塗人·上元卞琳室·有青山集·

鵲橋仙

戊子廣陵七夕有感

思量昨歲秣陵此夕。正水閣、風清天碧。六朝佳處舊繁華，細草路、紅燈月白。
今年萍寄，隋宮咫尺。歎異代、煙花寥寂。情同旅夜起歸思，愁絕是、隔江寒笛。

龐蕙纒

字小畹·吳江人·吳玉川室·

點絳脣

次沈素嘉韻

十載芳隣。自憐一別還如雨。看雲愁緒。隔箇江天樹。佳句曾題小楷紅箋處。
頻看取。相思難據。一瞬情千縷。

沈素嘉

吳江人·葉學山室·

點絳脣 寄吳夫
人小畹

隔過牆頭。幾番同聽黃昏雨。別來情緒。向北看春樹。一院籬花。底是臨書處。

還分取。綠窗朱戶。裊裊茶煙縷。

徐元端

字延香。江都人。范某室。有繡閣集。

清平樂

繡窗無那。自卷簾兒坐。羞覩黃鶯枝上臥。拋去青梅數顆。東風陣陣相摧。胭脂零落蒼苔。春色依然歸去。爲誰留下愁來。

南鄉子

獨坐數歸期。花影重重日影低。無計徘徊思好句。遲遲。除卻春愁沒箇題。閑倚畫樓西。芳草青青失舊堤。猶記當時人去處。依依。紅杏花邊一酒旗。

周蘭秀

字弱英。吳江人。平湖孫某室。

明詞綜 卷十一

二四一

浣溪沙

雨過池塘萬綠生。微風吹滿繡簾輕。遠山一角夕陽明。靜裏荷香來扇底，夢餘蕉影倚窗橫。關情何處玉簫聲。

武氏

三水人·文翔鳳室·

如夢令

畫閣閑吟玉案。寂寂薰風庭院。微悶坐花前。獨把闌干倚徧。簾卷簾卷。秋在桐陰一半。

翁孺安

號靜和居士·常熟人·適同邑顧氏·有浣花居遺藁·

浣溪沙

雁陣纔過字一行。碧天沉影散秋光。涼風初沁白羅裳。墮葉井梧旋靜砌。含英籬菊護低牆。聲聲何處搗衣忙。

李端卿

錢塘人

謁金門

風乍暖△樹底鶯聲欲轉△窗外小梅香數點△枝頭春意淺△
盡日畫屏獨掩△閑卻
繡牀金翦△寶枕初回香夢遠△亂愁天不管△

原书空白页

明詞綜卷十二

青浦 王昶 纂

韓知珩一首

吳 肫一首

顧若璞一首

錢 氏一首

郭 璵一首

紀映淮一首

黃 鴻一首

張紅橋一首

范 妹一首

錢 涓一首

馬守貞一首

劉 勝一首

楊 炎一首

薛素素一首

朱無瑕一首

王毓貞一首

白旃香一首

趙燕二首

馬如玉一首

楊宛三首

王微四首

鄭妥一首

陳冉一首

花夢月一首

景翩翩一首

張婉一首

朔朝霞一首

王月一首

寇皚如一首

崔嫣然一首

頓文一首

王賽玉一首

尹春一首

呼舉一首

沙宛在一首

京師妓一首

蘇世讓一首

鎖懋堅一首

王 氏一首

沈靜筠一首

元妙洞天少女一首

鄭婉娥一首

翠 微一首

王秋英一首

韓智珩 湖州人·金壇于鑾室·

浣溪沙 東盟夫人

玉筋雙垂薄袖寒，十離詩就背人看。閒愁贏得許多般。月轉空堦天欲曙，香

縈倦枕夢初闌。相思一夜小梅殘。

吳 拙 號冰蟾子·江南華亭人·曹某室·

滿江紅

雨抹荷池，添豔了、鬧紅稠綠。更帶着、牽魚藻鑑。浮波鳧玉。榴朵辭枝焚碧蘚。蟬聲送遠翻新曲。向幽軒、一枕夢驚回。風敲竹。絲雨霽，輕涼足。殘照短，纖紅續。

漸雲遮津口。煙黏山麓。涼月照人心似水。此身擬向清虛蹴。記廣寒庭畔素衣中。曾相熟。

顧若璞

字知和。錢唐人。王某室。有臥月軒集。

長相思

梅子青。豆子青。飛絮飄飄長短亭。風吹羅袖輕。恨零星。語零星。正是春歸不忍聽。流鶯啼數聲。

錢氏

湖州人。都憲唐世濟室。

滿庭芳

古樹陰濃。新篁翠淺。乍陰過雨還晴。方塘對岸。留得小紅英。消受茶芽蕨笋。皮几淨。雲母窗明。薰風至。釣絲搖曳。無處立蜻蜓。喜灌園君志。辟廬吾職。兩意相并。把當前好景。直擬蓬瀛。怎便塵勞盡謝。長無事。心境雙清。家園好。藕花如

錦波面想盈盈。

郭

筠

字埭汝·長洲人·顧某室·

思帝鄉

紅燭冷。碧釵留。燭冷釵留。人去恨悠悠。拚得一分憔悴一分愁。試問眉間心上幾多愁。

紀映淮

上元人·

小重山

閨秋

蕭瑟幽閨更漏長。庭前叢桂發。暗飄香。月明露白漸生涼。輕風起。時拂鬱金裳。遠雁一行行。相看還竚立。怯空房。幽懷幾許總難量。蘭缸灺。花影欲窺窗。

黃

鴻

字鴻耀·錢塘人·有廣寒集·

蝶戀花

着意留春春不許。一陣東風。吹落花無數。記取等閒花落處。重游怕是桃源路。
門外青絲垂日暮。偏惹離腸。不繫征帆住。兩兩畫梁新燕語。雙飛又入花間去。

張紅橋

閩縣人。居紅橋之西。因自號紅橋。後歸福清林鴻。

詞約云。紅橋雅麗能詩。豪右委禽。皆不納。長樂王儁有詩名。亦拒之。及鴻託鄰媪投以絕句云。桂殿焚香酒半醒。露華如水點銀屏。含情欲訴心中事。羞見牽牛織女星。紅橋答云。梨花寂寂鬪嬋娟。銀漢斜臨繡戶前。自愛焚香消永夜。從來無事訴青天。遂締婚焉。相與唱和。詩甚夥。後鴻適金陵。作大江東去一闕。留連惜別。又明年鴻自金陵寄摸魚兒一闕。絕句四首。張自鴻去後。獨坐小樓。顧影欲絕。及見鴻詩詞。感念成疾。不數月而卒。惜其詞傳者絕少。

念奴嬌

鳳凰山下。恨聲聲玉漏。今宵易歇。三疊陽關歌未竟。城上栖烏催別。一縷情絲。兩行清淚。漬透千重鐵。重來休問。尊前已是愁絕。還憶浴罷描眉。夢回攜手。

踏碎花間月。謾道胸前懷。荳蔻今日總成虛設。桃葉津頭。莫愁湖畔。遠樹雲煙
疊。剪燈簾幕。相思誰與同說。

范

妹 字洛仙。如皋人。
有貫月舫集。

浣溪沙

月夜懷
延公

庭竹瀟瀟弄晚風。月光如洗露華濃。瑤塔花影自重重。非愛良宵清不寐。因
憐歸燕思無窮。夜深獨倚畫樓東。

錢

涓 字裝文。嘉興
人。有抱雲吟。

秋波媚

芙蓉

豔質誰教託蓼洲。寂莫更誰儔。半竿落日。幾行征雁。一葉歸丹。那堪風雨頻
相妬。紅粉逐波流。深深綺閣。盈盈羅帳。多少清愁。

馬守貞

字月嬌。號湘
蘭。金陵妓。

蝶戀花

天香館寄
陳湖山

陣陣東風花作雨。人在高樓。綠水斜陽暮。芳草垂楊新燕羽。湘煙翦破來時路。
腸斷蕭郎紙上句。深院啼鶯。撩亂春情緒。一點幽懷誰共語。紅絨繡上羅裙去。

劉勝

見青樓
韻語

蘇幕遮

恨桃花憎柳絮。何事春來。浪逐東風去。邂逅從君花下語。無那情痴。夢裏還凝佇。
楚臺風。巫峽雨。暮暮朝朝。無計重相遇。背處偷彈雙玉筯。自笑多情。翻爲多情悞。

楊炎

字玉香
金陵妓

詞苑叢談·閩人林景清過金陵·與院妓楊玉香狎·許終身焉·臨別賦鷓鴣天一闕云·八字嬌蛾恨不開△陽臺今作望夫臺△月方好處人相別·潮未平時僕

已催△聽屬付・莫疑猜△蓬壺有路去還來△麝麝一樹垂絲柳・休
傍他人門戶栽△遂與訣別・後五六年・再訪之・則玉香死矣・

如夢令

新綠釀成楊柳△簾卷和風微透△獨坐抱雲和香篆暗消金獸△回首△回首△花事春
光依舊△

薛素素

蘇州
妓・

臨江仙

喚起提壺池上飲△春殘滿地紅英△忽聞牆外子規聲△不如歸去也△終是不分明△
自抱雲和彈一曲△曲終還擬湘靈△風前淚眼幾時晴△月高星數點△香冷漏三
更△

朱無瑕

字泰玉・
金陵妓・

卜算子

明詞綜 卷十二

二五三

梧葉薦新涼。好夢欺人短。數盡銅壺漏更長。別院砧聲遠。疎雨滴芭蕉。腸被西風斷。何處寒蛩哀雁中。蘆管吟秋怨。

王毓貞

字月妹
揚州妓

如夢令

月影被花搖碎。掩映隔簾紅袂。倚醉殢春嬌。彷彿滿頭珠翠。難記。難記。人在畫屏秋水。

白旃香

字西來
嘉定妓

山花子

一桁垂楊拂畫橈。碧桃花外泛輕舸。六曲紋窗春水碧。赤闌橋。綠酒紅燈風細細。碧天明月夜迢迢。何事春來頻載酒。聽吹簫。

趙

字彩姬
金陵妓

憶王孫

東風惡劣打殘紅。簾幙輕陰漾碧空。倚薰籠。夢斷香消寶鴨中。

長相思

寄張幼子

去悠悠。意悠悠。水遠山長無盡頭。相思何日休。見春愁。對春羞。日日春江認

去舟。含情空倚樓。

馬如玉

字楚嶼。金陵妓。

鳳凰臺上憶吹簫

清夜無眠。湘簾不捲。瀟瀟雨打蕉窗。聽秋聲幾點。滴碎秋腸。望斷天涯芳訊。人寂寞。偏覺更長。燈花落。枕屏斜倚。睡鴨銷香。思量舊歡團扇。只等閑拋卻。塵冷蘭房。數樓頭征雁。影去瀟湘。隔院吹來玉笛。聲幽咽。漸入伊涼。桐葉響。金風陣陣。寒透羅裳。

楊 宛

字宛叔。金陵妓。

古今詞話·宛叔能詩·善草書·與草衣道人王修微爲女兄弟·有金人捧露盤
咏秋海棠云·記春光·繁華日·萬花叢△正李衰·桃謝匆匆△儂家姊妹·妖
枝豔蕊笑東風△薄情曾共·春光去·惆悵庭空△到如今·餘瘦影·空掩映·
夕陽中△珠露點·試沐新紅△斷腸何處·含芳斂韻綺窗東·好秋誰占·小池
畔·休
放芙蓉△

太平時

嫋嫋疎枝帶露輕△
隔簾樵絲絲牽綴別離情△
最難勝△
幽恨祇憑羌管訴△
調淒
清臨風半是斷腸聲△
不堪聽△

浪淘沙

海棠

盡日若含愁△
別樣嬌羞晚涼香散上簾鉤△
帶露摘來斜插鬢△
一段風流
蛩語
玉階幽△
又是深秋相攜閒對小妝樓△
不解斷腸伊似我△
我似伊否△

王 微

字修微·揚州妓·自號草衣道人·

竹窗詞選·王修微初爲青樓·後爲黃冠·詞集甚富·皆言情之作·多有俳調·施子野云·修微色藝雙絕·尤長于詩詞·適從性夙齋聞其名·見憶秦娥一章·有多情月△偷雲出照無情別△之句·風流蘊藉·不減李清照·明日入東余·見修微于眉山莊之喜庵·方據案作字·逸韻可掬·相與談笑者久之·日西·別去·此情依依·因用其調·他日相見·拈出作一話頭耳·周勒卣云·修微本籍華亭·來往竹西·陳仲醇·施子野極賞其才調·而雅致清高·常謁憨山大師于匡廬·題詩石壁上·爲白雲捲去·時許給事譽卿爲東林名人·負重望·修微依之以老·

如夢令

懷譚友夏

月到閒庭如畫修竹長廊依舊對影黯無言欲道別來清瘦春驟春驟風底落紅僂僂

搗練子

心縷縷愁躑躑紅顏可逐春歸去夢中猶殢惜花心醒來又聽催花雨

憶秦娥

多情月偷雲出照無情別無情別清輝無奈暫圓常缺傷心好對西湖說湖

光如夢湖流咽。湖流咽。離愁燈畔。乍明還滅。

鄭

妥

一名如英。字無美。金陵妓。

浪淘沙

日午倦梳頭。風靜簾鉤。一窗花影擁香篝。試問別來多少恨。江水悠悠。新燕語春秋。淚濕羅綃。何時重話水邊樓。夢到天涯芳草暮。不見歸舟。

陳

冉

字月素。金陵妓。

賣花聲

愁壓遠山低。此恨誰知。吳綾淺碧濕胭脂。無限秋光憔悴意。殘葉疎枝。多病損腰肢。檀袖雙垂。紗窗月上影遲遲。漏冷蓮花人靜也。寒雁來時。

花夢月

字紅兒。金陵妓。

浣溪沙

梳罷鳴蟬淺畫眉。習池香鴨篆煙遲。一窗日影到罨眉。只說頻來桃葉渡。不期猶隔柳花堤。數聲風外嚙春鷗。

景翩翩字三妹·建昌妓·

憶秦娥

秋蕭索。西風一夜吹香閣。吹香閣。挑燈獨坐。半垂簾幕。滿階明月梧桐落。滿階明月梧桐落。窗涼露。吳衫薄。吳衫薄。菱花閑對。鬢雲斜掠。

張婉字婉仙·松江妓·有效響吟·

如夢令

陌上鶯啼綠柳樓。上花飛寶鬢。晴日晚春天。畫篋香消荳蔻。消瘦。消瘦。又是斷腸時候。

朔朝霞字曙光·金陵妓·有紅于詞·

桂殿秋

秦淮渡。碧波流。冷月斜明花外樓。仙人掌滿金莖露。桂子香寒玉殿秋。

王

月字微波。
金陵妓。

破陣子

宮粉香消睡鴨。仙衣塵滿紅絨。寂寞畫屏春月白。冷淡花裊夜燭紅。誰家玉笛風。

寇皚如

字貞素。金陵妓。有遜雪堂集。

鞦韆毬

柳外裊晴絲。正晴日、遲遲停午。牆頭曾見。去年攜手。花前款語。爲伊忘卻繡窗鸚鵡。不奈韶光如許。對簾箔、幾回凝竚。綠酒銀燈。甚時歡聚。歸來燕子。休遲到、畫橋飛絮。

崔嫣然

字重文·金陵妓·
有幻影閣集·

謁金門

風蕭瑟。遠聽寒砧聲急。應念征鴻無信息。夜涼吹玉笛。幾許紅樓岑寂。夢斷楚江蘭澤。明月梧桐清露滴。暗蛩吟敗壁。

頓

文字少文·金陵妓·
有翠擁樓詞·

點絳脣

纔長芭蕉。碧紗窗外風和雨。聲聲杜宇。不解留春住。欲問春光。此日歸何處。春無語。亂紅流去。兩岸楊花絮。

王賽玉

字儒卿·
金陵妓·

點絳脣

水院粧殘。桐陰滿地新涼夜。湘簾輕下。牆角疎更打。漸近黃昏。明月移花榭。

愁偏惹。珮環休卸。繡鴨熏香麝。

尹春

字子春
金陵妓

醉春風

池上殘荷盡。籬下黃花嫩。重陽還有幾多時。近、近、近。曾記舊年。那人索句。評香鬪茗。望斷蕭郎信。懶去勻官粉。蝦鬚簾外晚風生。陣、陣、陣。雙袖生寒。一燈明滅。博山香燼。

呼舉

字文如
江夏妓

玉樓春

夜坐

一燈半滅愁無數。河畔清蟾涼印戶。閒庭細草亂蛩鳴。似共離人分泣露。玉樓遙隔湘江浦。黯黯離魂尋得去。秋鐘夜半遠隨風。短夢驚回忘去路。

沙苑在

字嫩兒
金陵妓

醉花陰

翡翠樓頭風幾陣。斷送殘紅盡。薄暮掩羅幃。睡鴨香寒。冷卻沉檀印。夢回寶
枕垂雲鬢。愁壓娥彎損。窗外雨聲疎。響入芭蕉。又是黃梅信。

京師妓

瑞鷓鴣

少年曾侍漢梁王。濯錦江邊醉幾場。拂石坐來衫袖冷。踏花歸去馬蹄香。當
初酒餞寧辭滿。今日閒愁不易當。暗想勝遊還似夢。芙蓉城下水茫茫。

蘇世讓

朝鮮人

憶王孫

和薛萃
軒副使

無端花絮曉隨風。送盡春歸我又東。雨後嵐光翠欲濃。寄征鴻。家在千山萬柳
中。

鎖愁堅

西域人。

詞品·鎖愁堅、西域人·善吟咏·成化間·游苕城·朱文理座間索賦其家假山·愁堅賦沉醉東風一闋云·風過處·香生院宇△雨收時·翠濕琴書△移來小朵峯·幻出天然趣△倚闌干·盡日披圖△漫說蓬萊本是虛△只此是·神仙洞府△為一時所稱·

菩薩蠻

送春

曉鐘纔到春偏度。一番日永傷遲暮。誰送斷腸聲。黃鸝知客情。山光青黛濕。仍帶傷春泣。綠酒瀉杯心。卷簾空抱琴。

王氏

亂仙

見沈宜修伊人思。

秋波媚

流水東回憶故秋。疎雨滴更愁。雁來楚峽。風淒江渚。瘦損輕柔。誰憐絕世嬌。愁在斜倚小粧樓。慵窺寶鏡。淚懸情眼。恨鎖眉頭。

沈靜筠

亂仙

林下詞選·吳江女士沈玉霞·名靜筠·呂
元洲室·沒後降乩·作鷓鴣天一闕云云·

鷓鴣天

一片春光遍九宵。這回風月也全消。重來繡閣吟殘句。不數緱山弄玉簫。身
外事。等閒拋。萬層雲路碧迢迢。香南雪北何由見。直比人間午夢遙。

元妙洞天少女

詞統·元之夢遊仙詞序云·夏夜倦寢·神遊異境·榜曰元妙洞天·見少女獨
立朗然歌謁金門云云·歌竟·命侍兒傳語曰·與君有緣·今時未至·請辭·
遂翻然而醒·

謁金門閨情

真堪惜。錦帳夜長虛擲。挑罷銀燈情脈脈。繡花無氣力。女伴聲停刀尺。蟋蟀
爭吟四壁。自起捲簾窺夜色。天青星欲滴。

鄭婉娥

女鬼

詞苑叢談·吳江沈詒·洪武初·登琵琶亭·月下聞歌聲·明日復往·見一麗人曰·妾僞漢婕妤鄭婉娥·死葬于亭側·爲沈歌念奴嬌曰·昨夜郎所聞也·

念奴嬌

離離禾黍。嘆江山似舊。英雄塵土。石馬銅駝荆棘裏。閱遍幾番寒暑。劍戟灰飛。旌旗鳥散。底處尋樓艣。暗嗚叱咤。只今猶說西楚。憔悴玉帳虞兮。燈前掩淚。雙鬢流紅雨。鳳輦羊車行不返。九曲愁腸漫苦。梅瓣凝粧。楊花翻雪。回首成終古。翠螺青黛。絳仙慵畫眉嫵。

翠微 女鬼

詞苑叢談·嘉靖初·清河邱生泊舟江陵·有一女子·自稱兩淮運使何公之妾翠微·引生至一亭就枕·臨別賦詞云云·明日視之·乃其墓也·

憶秦娥

楊枝裊。恩情無限天將曉。天將曉。漏窮難喚。教人煩惱。郵亭一夜風流少。匆後會應難保。應難保。最傷情處。殘雲風掃。

王秋英

女鬼

詞苑叢談：福清諸生韓夢雲，嘉靖甲子過石湖山，遇一女子，自稱楚人，秋英，從父德育宦閩，遇寇，石湖山投崖而死。

瀟湘逢故人慢

春光將暮，見嫩柳拖煙，嬌花染霧。頃刻間風雨把堂上深恩，閨中遺事，鑽火留
錫，都付卻落花飛絮。又何心，挈榼提壺，鬪草踏青盈路。子規啼，蝴蝶舞，遍南
北山頭，紙錢綠醕，奠一邱黃土。歎海角飄零，湘陰淒楚，無主泉扃，也能得有情
雞黍。畫角聲，吹落梅花，又帶離愁歸去。